

1ካዎታ ማጻፋ ጊደ ቆፋ

ካዎታስ ኮይሮ ማጻፋን ኮይሮ ከፊሌቲ ሳሜላ ማጻፋ ናምእታን ደሚዲ ኢስራኤል ካዎቲ ዴራ ኣይሲዛ ታሪኬታፔ ካሊዛዛ። ሃ ማጻፋዚ ሄሹ ዋና ዋና ከፊሌታን ሻኬታናስ ዳንዳዬስ፤ 1። ሶሎሞንይ ባ ኣዋ ዳዊቲ ሶሆን፤ ኢስራኤል ቦላኔ የሁዳ ቦላ ካዎቲዳይሳኔ ኢዛ ኣዋ ዳዊቲ ሃይቆ ገሻሰ ዮቴስ (1-2)። 2። ሶሎሞን ካዎቲላ ገሻሰኔ ኢዚ ኦሊዳ ኦሶታ ቆንጨሲዛ ታሪኬ ገዲሺን ኢዛ ኦሶታፔ ኣጂ ቤቲዳይ ኢዚ ዬሩሳላሜን ኬጲዳ ጸሳ ኬል (3-11)። 3። ኢስራኤል ዴሬይ ፑዴሃኔ ዲጌሃ ባጋ ካዎቲላን ሻኬቲዳይሳኔ ሄ ካዎቲላቲ ኢሶይ ኢሶይ ኪርሰቶሲ ዬሌታናፔ ካሴ ኡዱፋንላ ጸቱ ላይል ጋካናስ ካዎቲዳ ካዎታ ገሻሰ ዮቴስ (12-22)። ሃ ናምኡ ማጻፋታን ዴሬዛ ካሌሊዛይታ ቦላ ፒርዴቲዛይ ኢስቲ ጸሳን ኣማኔቲዛ ኣማኖ ማላ፤ ሄሳሶካ ዴራ ኣይሲዛይታ ኣማኔቲላ ማላ ዴራ ዲቺኔ ገጋይ ጸሌቴስ። ሃራ ባጋራ ቃሴ ኤቃ ጸሳታ ካሎይኔ ጸሳስ ኣዛዘቶንታ ኢጶይ ዴሬዛኔ ዴራ ካሌሊዛይታ ቆየሶ ኤፌስ፤ ፑዴሃ ባጋራ ዲዛ ዴራ ካዎቲ ኡባይካ ፓጩን ኩንዲዳ፤ ሃንኮ የሁዳን ካዎቲዳይታ ታሪኬይ ገዲኮ ኢታታ ገሻሰ ገዲን ዎይኮ ሎኦታ ገሻሰ ዮቴስ። ካዎታ ማጻፋን ኮይሮ ከፊሌን ዳሮ ኤሬቲዳይቲ፤ ሄይታ ጸሳ ዶና ገዲዲ ቲንቢቲ ዴሬዛስ ዮቲዛይቲኔ ዴሬዚ ኤቃ ጸሳታ ካሎንታ ማላኔ ጸሳስ ኣዛዘቴል ኢጶንታ ማላ ዴሬዛ ታማርሲዛ ሙርታ ናቤቲ ዴቴስ፤ ሄ ናቤታፔ ኬሂ ኤሬቲዛይ ኤልያሳ ገዲሺን ኢዚ ባኣሌ ናቤታራ ኤቄቲዳ ኤቄቴል ቆንጨዴስ። [ሺ 18 ጶላ]

ሃ ማጻፋይ ኦይኪዳ ኩሜላ ቆፋ

ዳዊቲ ካዎቲላ ዉርሴል 1:1—2:12

ሶሎሞን ካዎቲል 2:13-46

ሶሎሞንይ ዴራ ኣይሲዳ ኣይሶ 3:1—11:43

ኮይሮ ላይላታ 3:1—4:34

ጸሳ ኬላ ኦሶ 5:1—8:66

ዉርሴላ ላይላታ 9:1—11:43

ካዎቲላ ሻኬቴል 12:1—22:53

ፑዴሃ ባጋራ ዲዛ ቆሞቲ ዴንሊዳ ሜቶ 12:1—14:20

የሁዳ ካዎታኔ ኢስራኤል ካዎታ 14:21—16:34

ናቤ ኤልያሳ 17:1—19:21

ኢስራኤል ካዎ አካቤኔ ኤልዛቤሎ 20:1—22:40
 የሁዳ ካዎ ኢዮሳፊዬኔ ኢስራኤል ካዎ አካዚያሳ 22:41-53

1 ካዎ ዳዊቲ ኬሂ ጨሚዳ ጊሻሰ ኢዛስ ኦልዛይቲ ኢዛ ሜሳፔ አሻናሰ ማይኦ ኢዛ ቦላ ኮሪን አይኮካ ኢዛ ሆኦናሰ ዳንዳይቤና።

2 ሄሳ ጊሻሰ ኢዛስ ኦልዛይቲ፥ «ካዎ! ኔናራ ዳኦሼ ኔና ሎኤላ ናጋና ማላ ኢሲ ጌላኦ ኔሰ ኮዪ ኤሂኖ? ኢዛ ኔናራ አቂኮ ኔና ሆኦና» ጊዳ።

3 ኢስራኤል ቢታ ኡባን ኮዪዲ አቢሻጎ ጌቴቲዛ ኢሲ ማላ ሎኦ ጌላኢዮ ሱኔሚ ካታማፔ ዳሚዲ ካዎዛሰ ኤሂዳ።

4 ኢዛካ ኬሂ ማላ ሎኦ፤ ካዎዛራ ዳሼ ኢዛሰ ኦላሼ ኢዛ ሎኤላ ኦይካዲሰ፤ ጊዳ ኦቲን ኢዚ ኢዛ ኤኪቤና።

ካዎታናሰ አደኒያሳ ኮሽ

5 ሃጊቲ ና አደኒያሰ፥ «ታ ካዎታና ኮያይሰ» ጊ ዳንዲዴሰ፤ ፓራ-ጋሬታኔ ፓራታ ቃሴካ ኢዛፔ ሲንፍ ሲንፍ ባናሰ 50 አሳታ ጊገሲዴሰ።

6 ኢዛ አዋይካ፥ «አይሰ ሃይሳላ አላይ?» ጊ ሙሊካ ሴሪ ኤሪና። አደኒያሲ ኬሂፔ ማላ ሎኦ አሳ፤ ኢዚ አቤቤሎሜሰ ካሎ አሻ።

7 አደኒያሲ ጹሪያ ና ኢዮኦቤራኔ ቄሴ አቢያታሬራ ሃ ዮኦዛ ዘሬቲዴሰ፤ ኢሰቲካ ኢዛ ማዳናሰ ቆፋ ቃቺዳ።

8 ጊዳ ኦቲን ቄሴ ሳዶቄይ፥ ዮዳሄ ና ባናያይ፥ ናቤ ናታኔይ፥ ሸምኤይ፥ ኤራኤይኔ ዳዊቲ ናጊዛ ዛቤቲ ኢዛ ቆፋ ኤኪቤቴና።

9 ኢሲ ጋላሰ አደኒያሲ ኤን-ሮጌሌ ካታማ ማታን ዘሄሌቴ ዛላ * ጌቴቲዛሶን ዶርሳታ፥ ቦራታኔ ኦሃላ ማራታ ያርሺዴሰ። ካዎ ናይታ፥ ባ አሻታ ካዎ ሹሜ ጊዲዳ የሁዳ አሳታ ኡባ ጴይጊዴሰ።

10 ጊዳ ኦቲን ናቤ ናታኔ፥ ባናያ፥ ካዎ ናጊዛ ዛቤታኔ ባ አሻ ሶሎሞኔ ጴይጊቤና።

ሶሎሞኔ ካዎቲል

11 ሄሳፌ ጉዬ ናታኔይ ሶሎሞኔ አዮ ቤርሳቤሆ፥ «ኦ ጎዳ ዳዊቲ ኤሮንታ ዲሺን ሃጊቲ ና አደኒያሲ ካዎቲዳይሳ ኔ ሲያቤኪ?»

12 ሃኢ ኔኒ ኔ ሸምፖኔ ኔ ናዛ ሶሎሞኔ ሸምፖ ዎሰታ አሻናኮ አኔ ታ ኔና ዞራይሰ።

1:5 2ሳሜ 3:4 * 1:9 ዘሄሌቴ ዛላ ጉሲ ኢብራዊታ ቃላራ ሾሻ ዛላ ጉሳ።

1:11 2ሳሜ 12:24

13 ካዎ ደዋቲኮ ባዳ፥ «ካዎ፥ ታ ጎዳዉ! ታስ ኔ አይሌይስ ኔ ና ሶሎሞኔይ ታፔ ጉዬን ካዎታና፤ ታ አራታንካ ኢዚ ኡታና ጋዳ ጫቃቤኪ? ሂስቲን አዶኒያሲ ዋኒ ካዎቲዳ?» ጋ ኦይቻ።

14 ኔኒ ካዎዛራ ሄን ሃሳያን ዲሺን ታ ጌላዳ ኔ ጌዳይሲ ቱሙ ጌዲዳይሳ ቆንጪሳና» ጌዴሰ።

15 ሱኔሜ ካታማፔ ዪዳ አቢሻጋ ጪሚዳ ካዎዛ ሄሚዛ ኢልፒኔ ጌዶ ቤርሳቤሃ ካዎዛ ሃሳይሳናሰ ጌላዲሰ።

16 ቤርሳቤሃ ካዎዛ ሲንፋን ዛቄላዳ ባ ኩሼ ዴንፋዲሰ፤ ቃሴካ ኢዛ ሲንፋን ጉልባታዲሰ።

ካዎዚካ ኢዞ፥ «አይ ኮያይ?» ጌዲ አይቺዴሰ።

17 ቤርሳቤሃ ኢዛሰ፥ «ታ ጎዳዉ! ታስ ኔ አይሌይስ፥ «ታፔ ጉዬን ኔ ና ሶሎሞኔይ ካዎታና፤ ታ አራታንካ ኢዚ ኡታና» ጋዳ ጎዳን፥ ኔ ጸሳን ኔኒ ጫቃዳሳ።

18 ጌዶ አቲን ሃኢ አዶኒያሲ ካዎቲዴሰ፤ ኔኒ ታ ጎዳይ ካዎይ ሄሳ ኤራካ።

19 ኢዚ ኬሂ ዳሮ ሜሄታ፥ አሃላ ማራታኔ ዶርሳታ ያርሺዴሰ፤ ያርሺሼ ካዎ ናይታ ኡባ፥ ቄሴ አቢያታሬኔ አላ ጋዳዋ ኢዮአቤ ጴይጊዴሰ፤ ጌዶ አቲን ኔ አይሌዛ ሶሎሞኔ ጴይጊቤና።

20 ታ ጎዳዉ፥ ካዎ! ኔፔ ጉዬ ኔ ካዎቲፋ አራታን ኦኒ ኡታናኮ ኤራናሰ ኢሰራኤሌ አሳ ኡባ አይፌይ ኔና ጴሊ ኡቲዴሰ።

21 ሂስቶንታ አጊኮ ታ ጎዳ ካዎይ ሃይቄዲ ባ አዋታን ጋይቲዛ ዋዴ ታኒኔ ታ ና ሶሎሞኔይ ሞሮ ኦሊዳ አሳ ማላ ቆዴታና» ጋዲሰ።

22 ቤርሳቤሃ ቡሮ ካዎዛራ ሃሳያን ዲሺን ናቤ ናታኔይ ጋኪ ዋዲዴሰ።

23 ካዎዛሰ፥ «ናቤ ናታኔይ ዪዴሰ» ጌዲ ዮቲዳ፤ ኢዚካ ካዎዛ ሲንፋን ጉፋኒዲ ባ ኩሼ ዴንፋዲዴሰ።

24 ሄሳፌ ጉዬ ናታኔይ፥ «ታ ጎዳ ካዎ! ኔፔ ጉዬ አዶኒያሲ ካዎታና ማላኔ ኔ አራታን ኡታና ማላ ኤሪሳዲ?»

25 ሃቕ ኢዚ ዲጌ ቢዲ ኬሂ ዳሮ ሜሄታ፥ አሃላ ማራታኔ ዶርሳታ ያርሺሼ ካዎ ናይታ ኡባ፥ አላ ጋዳዋታኔ ቄሴ አቢያታሬ ጴይጊዴሰ፤ ኢዚ ሃኢ ኢዛራ ሚሼኔ ኡዪሼ፥ «ካዎ አዶኒያሲ ሜርናሰ ካዎቶ!» ጌላ ቦላ ዴቲሰ።

26 ጌዶ አቲን ታና ኔ አይሌ፥ ቄሴ ሳዶቄ፥ ዮዳሄ ና ባናያኔ ኔ አይሌ ሶሎሞኔ ጴይጊቤና።

27 ታ ጎዳ ካዎ! ኔፔ ጉዬራ ኔ ካዎቲፋ አራታን ኦኒ ኡታናኮ ኔ አይሌታ ኤሪሶንታ ዳሼ ሃይሳ አዶኒያሲ ካዎታና ማላ ኦሊዳይ ኔኔ?» ጌዴሰ።

28 ሂስቲን ካዎ ዳዊቲ፥ «ቤርሳቤሆ ታስ ጾይጊቱ» ጊዳስ፤
ኢዛካ ካዎዚ ዲዛሶ ጌላዳ ኢዛ ሲንላን ኤቃዱስ።

29 ሄ ዎዳ ካዎዚ ኢዚስ፥ «ታና ሜቶ ኡባፌ ኣሺዳ ዴኦ ጎዳይ
ቤደን!

30 ጎዳን፥ ኢስራኤል ጸሳን ታኒ ኔስ ጫቂዳ ጫቆዛ ቱሙ ሃች
ፖላና፤ ታፔ ጉዬን ኔ ና ሶሎሞኔይ ካዎታና፤ ታ ካዎቴላ ኣራታን
ኢዚ ኡታና» ጊ ጫቂዳስ።

31 ቤርሳቤሃ ካዎዛ ሲንላን ጉፋናዳ ባ ኩሹ ዴንላዱስ፤ «ታ
ጎዳ፥ ካዎ ዳዊቲ ሜርናስ ካዎቶ!» ጋዱስ።

32 ሄሳፌ ጉዬ ካዎ ዳዊቲ፥ «ታስ ቄሴ ሳዶቄ፥ ናቤ ናታኔኔ
ዮዳሄ ና ባናያ ጾይጊቱ» ጊዳስ፤ ሂስቲን ኢስቲ ካዎዛ ሲንላ
ሸቂዳ።

33 ካዎዚ ኢስታስ፥ «ታ ኣይሌታ ኢንቴናራ ኤኪ ቢዲ ታ ና
ሶሎሞኔ ታ ባቁሎ ቶጊሲዲ ዱጌ ጊዮኔ ኤፍቴ።

34 ሄን ቄሴ ሳዶቄይኔ ናቤ ናታኔይ ኢዛ ቲይዲ ኢስራኤል ኣሳ
ቦላ ካዎሌቶ፤ ሄሳፌ ጉዬ ዛዬ ፑኒዲ ኢንቴ ቃላ ቆቁ ሂስቲዲ፥
(ካዎ ሶሎሞኔይ ሜርናስ ካዎቶ!)» ጊቱ።

35 ሄሳፌ ጉዬ ኢንቴ ኢዛ ኣዛቢዲ ሃ ፑዳ ኬዚቴ፤ ኢዚ ዪዲ
ታ ካዎቴላ ኣራታን ኡቶ፤ ኢዚ ታ ሶሆን ኡቲዲ ዴራ ኣይሶ፤ ታኒ
ኢስራኤል ዴራ ቦላኔ ዩሁዳ ዴራ ቦላ ኢዛ ሹማዲስ» ጊዳስ።

36 ዮዳሄ ና ባናያይ ካዎዛስ ዛሪዲ፥ «ኣሚን! ታ ጎዳ ካዎዛ፥
ጎዳይ፥ ጸሳይ ሚንሶ!

37 ጎዳይ፥ ታ ጎዳ ካዎዛራ ጊዲዳ ማላ ሶሎሞኔራካ ጊዶ፤
ኢዛ ካዎቴላ ኣራታ ታ ጎዳ ካዎ ዳዊቲ ኣራታፔካ ኣሊዲ ጊታሶ»
ጊዳስ።

38 ሄሳ ጊሻስ ቄሴ ሳዶቄይ፥ ናቤ ናታኔይ፥ ዮዳሄ ና ባናያይ፥
ኬሊቴቲኔ ፔሊቴቲ ሶሎሞኔ ካዎ ዳዊቲ ባቁሎ ቶጊሲዲ ዱጌ
ጊዮኔ ኣዛቢ ኤፌዳ። †

39 ቄሴ ሳዶቄይ ጋይቶቴላ ዱንካኔፔ ዛይቲ ካጩዛ ኤኪዲ
ሶሎሞኔ ቲይዲ ካዎሊዳስ፤ ሄሳፌ ጉዬ ዛዬ ፑኒዳ፤ ኡባ ኣሳይካ
ባ ቃላ ቆቁ ሂስቲዲ፥ «ካዎ ሶሎሞኔይ ሜርናስ ካዎቶ!» ጊዳ።

40 ኣሳይ ኡባይካ ኢዛ ኣዛቢዲ ፑዳ ቢዳስ፤ ኢስቲ ዲንኬ ፑኒ
ፑኒ ካኢሹ ኬሂ ኡፋዬቲዳ፤ ኣሳ ሆምቦጩኣን ቢታይ ቃጺዳስ።

† 1:38 ኬሊቴቲኔ ፔሊቴቲ ካዎ ኬላ ናጋናስ ዶሬቲዳይታራ ናጊዛ ካሬ ዴሬፔ
ቃጺሬቲዳይታ ቤሴስ። 2ሳሜ 8:18፥ 20:23፥ 1 ሳሜ 30:14 ጸላ።

41 አደረያሲኔ ኢዛራ ዲዛ ኢማላቲ ገቢራ ሚ ወርሲሽ ሄሳ ሲዪዲ፤ ኢዮኣቤይ ዲንኬዛ ገሪሳ ሲዪዲ፤ «ሃይሲ ካታማን ሴቴቲዛ ገሪሳይ ኣዜ?» ገ ኦይቺዴሰ።

42 ኢዚ ቡሮ ሃሳያን ዲሺን ቄሴ ኣቢያታሬ ና ዮናታኔይ ጋኪ ዋጲዴሰ። ሂስቲን አደረያሲ፤ «ኣኔ ሃ ጌላ፤ ኔ ማላ ኣማኔቲዳ ኣሲ ሎኦ ዋሬ ኤኪ ዮንታ ኣጌና» ገዴሰ።

43 ዮናታኔይካ ዛሪዲ፤ «ቺ፤ ዮኦይ ሙሌካ ሄሳ ማላ ገዴና፤ ኦ ጎዳይ ካዎ ዳዊቲ ሶሎሞኔ ካዎሊዴሰ።

44 ኢዛ ኣዛባና ማላ ካዎይ ቄሴ ሳዶቄ፤ ናቤ ናታኔ፤ ዮዳሄ ና ባናያ፤ ኬሊቲታኔ ፔሊቲታ ኢዛራ ዩዲዴሰ፤ ኢስቲ ኢዛ ካዎ ባቁሎ ቶጊሲዳ።

45 ቄሴ ሳዶቄይ ናቤ ናታኔይ፤ ገዮኔን ኢዛ ቲይዲ ካዎሊዴ፤ ሄፔ ኢስቲ ሆምቦጨሽ ፑዴ ቢዳ፤ ሄሳን ካታማይ ኮሹሜሰ፤ ሃኢ ኢንቲ ሲዪዛ ኮሹንቻይ ሄሳ።

46 ሄሳፌ ቦላራካ ሶሎሞኔይ ካዎቲላ ኣራታን ኡቲዴሰ።

47 ቃሴ ካዎ ሹሜቲ ኦ ጎዳ ካዎ ዳዊቲኮ ዩዲ፤ ሳጳይ ሶሎሞኔ ሱንሳ ኔ ሱንሳፌ ቶቄ ሂስቶ! ኢዛ ካዎቲላ ኣራታካ ኔይሳፌ ኣጴል ሂስቶ! ገዲ ኣንጂዳ፤ ሂስቲን ካዎይ ባ ኣልጋን ዲሼ ሆኪ ጸሳስ ጎይኒሼ፤

48 ታ ካዎቲላ ኣራታን ኡቲዲ ታ ሶሆን ካዎቲዛይሳ ታና ሃች ታ ኣይፌን ቤሲዳ ጎዳ ኢስራኤሌ ጸሳይ ጋላቲቶ! ገዴሰ» ገ ዮቲዴሰ።

49 ሄሳ ሲዪዲ አደረያሲ ጸይጊዳ ኢማላቲ ኡባይ ዳጋሚ ዴንዲዲ ላሊቲዳ።

50 አደረያሲ ገዲኮ ሶሎሞኔሰ ያዩዲ ቢ ያርሺዛሶዛ ካጩታ ኦይኪዴሰ።

51 ሄሳፌ ጉዬ ኣሳይ ሶሎሞኔሰ፤ «አደረያሲ ካዎ ሶሎሞኔሰ ያዩዲ ያርሺዛሶዛ ካጩታ ኦይኪዲ፤ ሳዎ ሶሎሞኔይ ታና ባ ኣይሌዛ ገላ ማሻን ዋጶንታ ማላ ታስ ሃች ጫቆ ጌሰ» ገዲ ዮቲዳ።

52 ሶሎሞኔይ ዛሪዲ፤ «ኢዚ ባ ሄሜል ሎኤሊኮ ሃራይ ኣቶሺን ኢዛ ሁኤ ቢናናፔ ኢሲናካ ጋዴን ዋጶኩ፤ ገዶ ኣቲን ኢዛ ቦላ ኢታቲል ቤቲኮ ኢዚ ሃይቃና» ገዴሰ።

53 ሄሳፌ ጉዬ ካዎ ሶሎሞኔይ ኣሰ ከቲን ኢስቲ ቢዲ ኢዛ ያርሾ ያርሺዛሶፔ ዲጌ ዋሊዳ፤ ሂስቲን ኣደረያሲ ዩዲ ሶሎሞኔሰ ዘጊዴሰ፤ ሶሎሞኔይካ ኢዛ፤ «ጌዴ ኔሶ ባ» ገዴሰ።

2

ዳዊቱ ሶሎሞንን ባዚዳ ባሴ

¹ ዳዊቱ ሃይቂዛ ዋዴይ ማቲን ባ ና ሶሎሞን ጸይጊዲ ኢዛሰ ባሴ ባዚዳሰ፤

² ዳዊቱ፡ «ታኒ ሃይቃና ዋዴይ ማቲዳሰ፤ ሄሳ ጊሻሰ ሚና፤ አሰ ጊዳ።»

³ ጎዳ ኔ ጸሳ አዛዞ ናጋ፤ ኢዛ ኦጌታን ሄሜታ፤ ሙሴ ዋጋን ጸፊቲዳ ማላ ኢዛ አዋጀታ፡ አዛዞታ፡ ዋጋታን ማራታ ናጋ፤ ሂሰቲኮ ኔኒ ኦሊዛ ሚሽ ኡባይኔ ኔኒ ቢዛ ሶሆ ኡባይ ኔሰ አንጃታና።

⁴ ጎዳይ ታሰ፡ ሩኔ ዜሬላቲ ባንታ ኦጌ ናጊኮ፡ ታ ሲንሳን ባንታ ኩሚላ ዋዚናፔኔ ባንታ ኩሚላ ሸምፖፌ አማኔቲዲ ሄሜቲኮ ኔ ዜሬላፌ ኢሰራኤሌ ካዎታ አራታን ኡቲዛ አሰ ሙሊካ ጳይሲኬን ጊዳ ሂደታ ቃላ ፖላና።

⁵ «ጸራያ ና ኢዮኣቤይ ታ ቦላ ኦሊዳይሳ ሄሳላካ ኢሰራኤሌ ኦላ ጋዳዋታ ናምኦታ፡ ኔሬ ና አቢኔሬኔ ዮቶሬ ና አማሳ ቦላ ኦሊዳይሳ ኔኒ ኔ ሁኤራ ኤራሳ፤ ኢሰቲ ኦላ ዋዴ ዋጂዳይሳሰ ሃሎ ኬሳናሰ ኦላይ ባይንዳ ሳሮ ዋዴ ኢዚ ኢሰታ ዋጂዲ ሄ ሱላን ባ ጸሳ ቃባቶኔ ባ ቶሆ ጫማ ቱኒሲዳሰ።»

⁶ ኦላና ቤሲዛይሳ አጽ ኤራቴላን ኦላ፤ ኢዚ ጨጊዲ ሳሮ ዱፎን ጌሎንታ ማላ ኦላ።

⁷ «ታኒ ኔ አሻ አቤሴሎሚፔ ባቃቲዛ ዋዴ ኢሰቲ ታሰ ሚሊ ጊዲዳ ጊሻሰ ጋላኦይ ቢታን ዲዛ ባርዚሌ ናይታሰ ሎኦ ኦላ፤ ኢሰቲ ኔ ማዳን ሚዛ አሳራ ኢሲፌ ሜቶ።»

⁸ «ታኒ ማሃናይሚ ቢዳ ዋዴ ታና ኢታ ቃንጌላ ቃንጊዳ ቢኒያሚ ቢታን ባሂሪሚ ካታማፔ ዪዳ ጌራ ና ሸምኤይ ኔናራ ዲዛይሳ ሃሳኣ፤ ኢዚ ታና ሞካናሰ ዮርዳኖሴ ሻፋ ዱጌ ዪዳ ዋዴ፡ «ታኒ ኔና ዋጂኬን ጋዳ ኢዛሰ ጎዳን ጫቃዲሰ።»

⁹ ጊዶ አቲን ሃኢ ኔኒ ኢዛ ጸሎ አሳ ማላ ቆዶፓ፤ ኔሰ አጽ ኤራቴሊ ዲዛ ጊሻሰ ኦላናሰ ቤሲዛ ዮኦታ ኔ ኤራሳ፤ ኢዛ ፑሉንላ ሱላራ ዱጌ ዱፎን ጌልላ» ጊዳሰ።

ዳዊቱ ሃይቆ

¹⁰ ሄሳፌ ጉዬ ዳዊቱ ሃይቂዲ ባ አዋታን ጋይቲዳሰ፤ ባ ካታማን ዬሩሳላሚን ሞጌቲዳሰ።

11 ዳዊቲ ኬብርኔን 7 ላይል፥ ዬሩሳሌምን 33 ላይል፥ ኢሲ ቦላ ኢስራኤልን 40 ላይል ካዎቲደሰ።

12 ሶሎሞን ያለው ዳዊቲ ካዎቲዳ አራታን ኡቲደሰ፤ ኢዛ ካዎቲዳ ከሄረሰ።

አድረያሳ ሃይቆ

13 ሃገቲ ና አድረያሲ ሶሎሞን አዮ ቤርሳቤሂኮ ቢደሰ፤ ቤርሳቤሂ ኢዛ፥ «ኔኒ ታኮ ሳርሰ ያዲ?» ጋዳ ኦይቻዲሰ።

ኢዛካ ኢዛሰ፥ «ኤ፤ ሳርሰ ያዲሰ» ገደሰ።

14 ቃሴካ ጉጂዲ፥ «ታ ኔሰ ዮታና ዮኦይ ደሰ» ገደሰ።

ኢዛካ ኢዛሰ፥ «ኣኔ ዮታ» ገደሰ።

15 አድረያሲ ኢዛሰ፥ «ካዎታናሰ ቤሲዛይ ታና ገዲዳይሳኔ ኢስራኤል አሳይ ኡባይ ታና ባ ቦላ ካዎላናሰ ባ አይፌ ታ ቦላ ዬገዳይሳ ኔ ኤራሳ። ገደ አቲን ዮኦቲ ጎዳፔ ገዲዳ ገሻሰ ላሜቲ ዋጂን ካዎቲዳይ ታ ኢሻሰ ዩዩደሰ።

16 ሃኢ ታ ኔና ኢሲ ሚሽ ኦይቸኮ ኔ ታሰ አካይ ጎፓ» ገደሰ።

ኢዛካ፥ «ኣኔ ኦይቻ» ገደሰ።

17 ኢዛካ፥ «ካዎ ሶሎሞን ያለው ኔ ኦይቸዳ ሚሽ አካይ ጎንታ ገሻሰ ሱኔሜ ዳሬ ማጫሳዮ አቢሻጎ ጌቲቲዛ ጌላኢዮ ታና ኤኪሳና ማላ ኢዛ ታሰ ኦይቻርኪ!» ገደሰ።

18 ቤርሳቤሂካ ዛራዳ፥ «ዳር ሎኦ፤ ታኒ ሄሳ ካዎዛሰ ዮታና» ገደሰ።

19 ሄሳ ገሻሰ ቤርሳቤሂ አድረያሳ ኪታ ዮታናሰ ካዎ ሶሎሞን ጌሊን ካዎዚ ኢዛ ሞካናሰ ዳንዲ ኤቂዲ ኢዛ ሳርኪዳፔ ጉዬ ሲሚዲ ባ ካዎቲዳ አራታን ኡቲደሰ። ቃሴ ባ አዮ ኡቲሳናሰ ሃራ አራታ ኤሂሲዲ ኢዛ ባፔ ኡሻቻ ባጋራ ኡቲሲደሰ።

20 ኢዛ ኡቲዳፔ ጉዬ፥ «ታ ኔና ኦይቸዛ ቂሪ ሚሽ ዳዉሰ፤ ኔ ኢዛ ታሰ ኤር ጋርኪ!» ገደሰ።

ካዎዚካ ዛሪዲ ኢዛሰ፥ «ታ አዬ፥ ታ ኔና ዬላሲኬ፤ ኔ ኮዬዳይሳ ኦይቻ» ገደሰ።

21 ኢዛካ ኢዛሰ፥ «ሱኔሜ ዳሬፔ ዩዳ አቢሻጎ ኔ ኢሻ አድረያሲ ኤካና ማላ ኢዛሰ ኢማርኪ!» ገደሰ።

22 ካዎ ሶሎሞን ያለው ዛሪዲ ባ አዮ፥ «ሱኔሜ ዳሬፔ ዩዳ አቢሻጎ ጸላ ኔኒ አድረያሳሰ አይሰ ኦይቻይ? ኢዛ ታሰ ባይራ ገዲዳ ገሻሰ ኢዛሰ ታ ካዎቲዳካ ኦይቻናይሳ አጋዳሳ! ሄሳጸካ ኢዛሰ

ጸላ ጊደንታ ዲሺን ቄሴ አቢያታሬሲኔ ጸሪያ ና ኢዮኣቤስካ ኦይቻናይሳ አጋዳሳ! » ጊዴስ።

23 ካዎ ሶሎሞኔይ ጎዳን ጫቂዲ፥ «አደኒያሲ ሃይሳ ኦይቹዳ ጊሻስ ታኒ ኢዛ ዎጵንታ አጊኮ ጎዳይ ታና ዎጵ!

24 ሃኢ ታና ታ አዋ ዳዊቲ ካዎቲላ አራታን ኡቲሲዲ ባ አሚዳ ሂዶታ ማላ ታ ካዎቲላ ሚንሊዳ ጎዳይ ቤዪን አደኒያሲ ሃቶ ሃይቃና!» ጊዴስ።

25 ሄሳ ጊሻስ ካዎ ሶሎሞኔይ ዮዳሄ ና ባናያ አዛዚን ኢዚ ቢዲ አደኒያሳ ዎጵዴስ።

26 ሄሳፌ ጉዬ ካዎ ሶሎሞኔይ ቄሴ አቢያታሬ፥ «ኔኒ ኔ ዴሬ አናቶቲ ሲማ ባ፤ ኔስ ሃይቆይ ቤሴሲሺን ኔና ታኒ ሃኢ ዎጵኬ። አይስ ጊኮ ኔኒ ታ አዋ ዳዊቲ ሲንላን ኡባ ሃሪዛ ጎዳ ታቦታ ቶካዳሳ፤ ቃሴ ታ አዋራ ሜቶ ኤካዳሳ» ጊዴስ።

27 ጎዳይ ሴሎን ቄሴ ኤሌ ኬላ አሳ ጊሻስ ዮቲዳይሳ ፖላናስ ሶሎሞኔይ አቢያታሬ ጎዳስ ቄሴቲላን ኦሊዛሶፔ ዲጊዴስ።

ኢዮኣቤ ሃይቆ

28 አቤሴሎሜራ ጊደንታ አደኒያሳራ ኢሲፌ ዙፔቲዳ ኢዮኣቤኮ ሃ ዮኦይ ጋኪዴስ፤ ሂስቲን ኢዮኣቤይ ጎዳ ዲንካኔኮ ባቃቲ ቢዲ ያርሺዛሶ ካጩታ ኦይኪዴስ።

29 ኢዮኣቤይ ጎዳ ዲንካኔኮ ባቃቲ ቢዲ ያርሺዛሶዛ ላንቄን ዲዛይሳ ካዎ ሶሎሞኔስ ዮቲዳ፤ ሂስቲን ሶሎሞኔይ ዮዳሄ ና ባናያ፥ «ባዳ ኢዛ ዎጵ!» ጊ አዛዚዴስ።

30 ባናያይ ጎዳ ዲንካኔዛ ጊዶ ጌሊዲ ኢዮኣቤ፥ «ካዎይ ኔና፥ (ሃይሳፌ ኬዛ) ጌስ» ጊዴስ።

ጊዶ አቲን ኢዚ ዛሪዲ፥ «ታ ሃይሳን ሃይቃና አቲን ኬዚኬ» ጊዴስ።

ባናያይ ካዎዛስ፥ «ኢዮኣቤይ ታስ አሚዳ ዛርይ ሄሳ» ጊዲ ዮቲዴስ።

31 ካዎ ሶሎሞኔይ ባናያ፥ «ኢዚ ጊዳ ማላ ዎጵዳ ዎጋ! ሂስታዳ ኢዮኣቤይ ጸሎታ ሱሐ ጉሲዳ ጎሜፔ ታናኔ ታ አዋ ኬላ ጌሻ።

32 ታ አዋ ዳዊቲ ኤርንታ ዲሺን ኢዮኣቤይ ናሞኡ አሳታ ጊላ ማሻን ዎጵዳ ሱላ ጊሻስ ጎዳይ ኢዛ ኦሶ ማላ ኢዛስ ዛራና፤ ኢስራኤሌ ኦላ ጋዳዋ ኔሬ ና አቢኔሪኔ ዩሁዳ ኦላ ጋዳዋ ዮቶሬ ና አማሲ ኢስቲ ናሞኣይካ ኢዛፔ ኬሂ ሱሬ አሳ።

33 ኢስታ ሱላ አጮይ ሜርናስ ኢየኣቤ ቦላኔ ኢዛ ዜሬላ ቦላ ጊደ፤ ጊደ ኣቲን ዳዊቲ ቦላኔ ኢዛ ኩላ ኣሳ ቦላ፤ ኢዛ ዜሬላታ ቦላኔ ኢዛ ካዎቲላ ኣራታ ቦላ ሜርናስ ጎዳ ሳርይ ጊደ» ጊደስ።

34 ሄሳ ጊሻስ ዮዳሄ ና ባናያይ ፑዴ ኬዚዲ ኢየኣቤ ዎጲን ኢዚ ባዘን ዲዛ ባ ጋዴን ሞጌቲደስ።

35 ካዎ ሶሎሞኔይ ዮዳሄ ና ባናያ ኢየኣቤ ሶሆን ኦላ ጋዳዎ ሂስቲዲ ሹሚደስ፤ ቃሴ ኣቢያታሬ ሶሆን ቄሴ ሳዶቄ ሹሚደስ።

ሺምኤ ሃይቆ

36 ሄሳፌ ጉዬ ካዎ ሶሎሞኔይ ሺምኤስ ከቲዲ፡ «ኔስ ዬሩሳላሜን ኬላ ኬጻዳ ሄን ዴኣ፤ ሄፔ ሃራሶ ኣዎካ ቦፓ።

37 ኔኒ ካታማፔ ኬዛዳ ቄዲሮኔ ሾባ ፒኒዳ ጋለስ ሃይቃናይሳ ኤራ፤ ኔ ሱላ ጎሜይ ኔና ኦይካና» ጊደስ።

38 ሺምኤይ ዛሪዲ ካዎዛስ፡ «ኔኒ ጊዛይሲ ሎኦ፤ ታኒ ኔ ኣይሌይ ኔኒ ታ ጎዳይ ካዎይ ጊዳይሳ ታ ፖላና» ጊደስ። ኢዚካ ዬሩሳላሜን ዳሮ ዎዴ ዴኢደስ።

39 ጊደ ኣቲን ሄሹ ላይሳፌ ጉዬ ሺምኤ ኣይሌታፔ ናምኣቲ ቤቲዲ ማኢካ ና ጌቲ ካዎ ኣንኩሴኮ ቢዳ፤ ሄ ዎሬይ፡ «ኔ ኣይሌቲ ጌቲን ዴቲስ» ጌቲቲዲ ሺምኤስ ዮቲቲደስ።

40 ሄሳ ሲዬዲ ሺምኤይ ባ ሃሬ ኮሪ ኤኪዲ ባ ኣይሌታ ኮያናስ ኣንኩሴኮ ጌቲ ቢዲ ባ ኣይሌታ ኤኪ ዬደስ።

41 ሺምኤይ ዬሩሳላሜፔ ጌቲ ካታማ ቢዲ ሲሚዳይሳ ሶሎሞኔይ ሲዬዲ፡

42 ሺምኤ ጸይጊሲ ሺሺዲ፡ « የሩሳላሜፔ ኬዛዳ ሃራሶ ቢዛ ጊዲኮ ኔ ሃይቃና» ጋዳ ጎዳ ሱንላን ጨቄላዳ ኔስ ሚንላ ዮታቤኪና? ሄ ዎዴ ኔኒ፡ «ኔ ጊዛይሲ ሎኦ፤ ኤኖ፡ ታ ኣዛዜታና» ጋዳሳ።

43 ሂስቲን ጎዳስ ጨቄዳ ጨቆኔ ታ ኣዛዘ ኣይስ ናጋቤኪ?» ጊደስ።

44 ቃሴካ ካዎይ ሺምኤስ፡ «ታ ኣዎ ዳዊቲ ቦላ ኔኒ ኦሲዳ ኢታ ኦሶ ኡባ ኔ ዎዚናይ ኤሬስ። ሃኢ ጊዲኮ ኔ ኢታ ኦሶ ማላ ጎዳይ ኔስ ዛራና።

45 ጊደ ኣቲን ካዎ ሶሎሞኔይ ኣንጂታና፤ ዳዊቲ ካዎቲላ ኣራታይካ ጎዳ ሲንላን ሜርናስ ሚኒ ዳና» ጊደስ።

46 ሄሳፌ ጉዬ ካዎዚ ዮዳሄ ና ባናያ ኣዛዚን ቢዲ ሺምኤ ዎጲደስ።

ሄሳ ጋሶን ካዎቲላይ ሶሎሞኔ ኩሼን ሚኒ ዴኢደስ።

3

ጎዳይ አጽ ኤራቴል አማና ማላ ሶሎሞኔ ዋሳ
(2ታሪ 1:3-12)

1 ሶሎሞኔይ ጊብጼ ካዎ ፓሮኔራ ላጌቲዲ አዛ ናዮ ማቾ ኤኪዴስ፤ ካዎ ኬላ፥ ጎዳ ኬላኔ ዩሩሳላሜ ዩሾን ዲዛ ዲርሳ ገምቢ ፖላናሽ ጋካናስ አዞ ኤሂዲ ዳዊቲ ካታማን ዋሊዴስ።

2 ጎዳ ሱንፋስ ጸሳ ኬል ኬጼታናሽ ጋካናስ አሳይ ያርሾ ዙምቡላታ ቦላ ሺሼስ።

3 ሶሎሞኔይ ጎዳ ሲቄስ፤ ባ አዋ ዳዊቲ ዋጋ ማላ ዴስ፤ ጊዶ አቲን ዙምቡላታ ቦላ ያርሾ ያርሼሲኔ ኤጻኔ ጨዋሴስ።

4 ጌባኦኔይ ኡባፌ አጲ ኤሬቲዳ ያርሾሆ ጊዲዳ ጊሻስ ካዎ ሶሎሞኔይ ያርሾ ያርሻናስ ሄ ቢዴስ፤ ሶሎሞኔይ 1,000 ሜሄ ኤሂዲ ሄን ጽጌቲዛ ያርሾ ያርሺዴስ።

5 ጎዳይ ሶሎሞኔስ ጌባኦኔን አማርስ አጉሞን ቆንጨዴስ፤ ጸሲ ኢዛስ። «ታ ኔስ አማና ማላ ኔ ኮይዛ አይ ሚሺካ ታና ኦይቻ» ጊዴስ።

6 ሶሎሞኔይ ኢዛስ። «ታ አዋ ዳዊቲ ኔ ሲንፋን ጸሎቴላን፥ ቱማቴላኒኔ ሱሬቴላ ዋዚናን ሲሜሬቲዳ ጊሻስ ኔ አይሌዛ ጌታ ኪያቴል ቤሳዳሳ፤ ኔኒ ሄ ጌታ ኪያቴላ አጎንታ ሃቕ አዛ ካዎቴላ አራታን ኡቲዛ አቱማ ና ኢዛስ አማዳሳ።

7 «አቤት ጎዳዉ፥ ታ ጸሳዉ! ኔኒ ታና ኔ አይሌዛ፥ ታ አዋ ዳዊቲ ሶሆን ካዎሳዳሳ፤ ጊዶ አቲን ታኒ ቡሮ ዬላጋ ጊዲዳ ጊሻስ አሳ ዋስታ አይሳናኮ ታ ኤሪኬ።

8 ታኒ ኔ አይሌይ ኔኒ ዶሪዳ አሳ ጊዶኒኔ ቆዳይ ባይንዳ ኬሂ ዳሮ አሳ ጊዶን ዴኦይስ።

9 ሄሳ ጊሻስ ታኒ ኔ አሳ አይሳናስ ሎኦኔ ኢታ ሻካዳ ኤራና ማላ ታስ ኔ አይሌዛስ አኬኪዛ ዋዚና አማ፤ ሂስቶንታ አጊኮ ሃ ጌታ ዴሬዛ ኦኒ ካሌላና ዳንዳይዜ?» ጊዴስ።

10 ሶሎሞኔይ ሄሳ ኦይቺዳ ጊሻስ ጎዳይ ኡፋዬቲዴስ።

11 ቃሰካ ጸሳይ ኢዛ። «ኔኒ ኔስ ላይሊ አዲቃና ማላ ዎይኮ ዲሬታና ማላ፥ ዎይኮ ኔ ሞርኬቲ ሃይቃና ማላ ጊዶንታ ዴራ ዋጋራ አይሳናስ አጽ ኤራቴል ኦይቺዳ ጊሻስ።

12 ሄሳ ኔ ኦይቺዳይሳ ታ ኔስ አማና፤ ኔፔ ካሴ ኦናሰካ አሜቶንታኒ ኔፔ ጉዬ ኦኒካ ዴሞንታ አጽ ኤራቴላኒኔ አኬካይ ኩሚዳ ዋዚና ታ ኔስ አማና።

13 ሄሳፌካ ቦላራ ኔ ዴኦ ላይላን ኡባን ካዎታ ጊዶን ኔናራ ጊናቲዛ ካዎይ ዶንታ ማላ ኔኒ ታና ኦይቾንታ ዱሬቴሊኔ ቦንቾ ታ ኔሰ ኢማና።

14 ኔ ኣዎ ዳዊቲ ታ ኦጌራ ቢዳ ማላ ኔካ ታ ኦጌራ ቢኮ፥ ታ ዎጋኔ ታ ኣዛዘታ ናጊኮ ኔ ላይላ ታ ኣዲሳና» ጊዴሰ።

15 ሄሳፌ ጉዬ ሶሎሞኔይ ቋሰኮፌ ቤጊዲ ሄሲ ኣጉሞ ጊዲዳይሳ ኣኬኪዴሰ፤ ኢዚ ዩሩሳላሜ ሲሚ ቢዲ ጎዳ ጫቆ ቃላ ታቦታ ሲንላን ኤቂዴሰ፤ ጽጌቲዛ ያርሾኔ ኢሲፌቴላ ያርሾ ያርሺዴሰ። ሂሰቲዲ ባ ሹሜ ኡባታሰ ጊቢራ ኬሲዴሰ።

ሶሎሞኔይ ኣጵ ኤራቴላን ፒርዲዳ ፒርዳ

16 ሄ ዎዴ ላይማን ኣቂዛ ናሞኡ ማጫሳቲ ካዎ ሶሎሞኔኮ ዩዲ ኢዛ ሲንላን ኤቂዳ።

17 ኢሰታፌ ኢሲኒያ፥ «ታ ጎዶ! ታኒኔ ሃ ማጫሳያ ኢሲ ኬላን ዶሰ፤ ሄን ኢዛ ታናራ ኢሲፌ ዲሺን ታኒ ና ዩላዲሰ።

18 ታ ዩሊዳ ሄቫንላ ጋላሰ ኢዛካ ና ዩላዲሰ፤ ሄ ኬላን ኑ ናሞኣታፔ ኣቲን ሃራይ ኦኒካ ዴና።

19 «ኢሲ ጋላሳ ኦማርሰ ሃና ማጫሳያ ባ ናዛ ቦላ ኢቺን ናዚ ሃይቂዴሰ።

20 ሂሰቲን ኢዛ ጊዶላ ዴንዳዳ ታኒ ኔ ኣሽካሪያ ቋሰኮን ዲሺን ታ ናዛ ታ ኪኦፔ ኤካ ኤፋዳ ባ ኪኦን ዎላዲሰ፤ ቃሴ ሃይቂዳ ባ ናዛ ኤሃዳ ታ ኪኦን ዎላዲሰ።

21 ዎንቲን ታኒ ታ ናዛ ቋንላናሰ ዴንዲሺን ሃይቂ ቤቲዴሰ፤ ጊዶ ኣቲን ታኒ ማላዶ ፖኦን ቲሺ ሂሰታ ጸሊን ታ ዩሎዛ ጊዶንታይሳ ታ ኤራዲሰ» ጋዲሰ።

22 ሃንኮ ናሞኣንላ ማጫሳያ ቃሴ፥ «ቺ! ፓጻ ዲዛ ናዚ ታይሳ፤ ሃይቂዳ ናዚ ኔይሳ» ጋዲሰ።

ጊዶ ኣቲን ኮይሮ ማጫሳያ ዛራዳ፥ «ቺ! ሃይቂዳ ናዚ ኔይሳ፤ ፓጻ ዲዛ ናዚ ታይሳ» ጋዲሰ፤ ኢሰቲ ናሞኣይካ ካዎ ሲንላን ሄሳላ ጊሼ ፓላሜቲዳ።

23 ካዎ ሶሎሞኔይ ኢሰታሰ፥ «ሃ ማጫሳያ፥ ፓጻ ዲዛ ናዚ ታይሳ፤ ሃይቂዳ ናይ ኔይሳ» ጋወሰ፤ ሃንኮራካ፥ «ቺ! ሃይቂዳይሲ ኔ ናዛ፤ ፓጻ ዲዛ ናዚ ታ ናዛ» ጋወሰ» ጊዴሰ።

24 ካዎዚካ፥ «ታሰ ጊላ ማሻ ኤኪ ዪቴ» ጊዴሰ፤ ሂሰቲን ኢሰቲ ኢዛሰ ጊላ ማሻ ኤሂዳ።

25 ሄ ዎዴ ካዎዚ፥ «ፓጻ ዲዛ ናዛ ናሞኡ ኬሲ ጳለቂዲ ኢሲ ባጋ ኢሲኔይሰ፥ ኢሲ ባጋ ሃንኮርሰ ኢሚቴ» ጊ ኣዛዚዴሰ።

26 ፓጻ ዲዛ ናዛ እያ ባ ናዛስ ኬሃ ሚሼቲዛ ጊሻስ ካዎዛስ፡
«ታ ጎዶ! ፓጻ ዲዛ ናዛ ኢዚስ ኢማጋ! ዎጵፓርኪ!» ጋዲስ፡
ጊዶ እቲን ሃንኮራ፡ «ኔስካ ታስካ ኢሜቶፎ፤ ናሞኡ ኬዚ
ሻኬቶ» ጋዲስ፡

27 ሄሳፌ ጉዬ ካዎዚ፡ «ሃ ፓጻ ዲዛ ናዛ ሃ ኮይሮ ማጫሳይስ
ኢሚቲ፤ ናዛ ዎጵፓቲ፤ ናዛ እያ ሃኖኮ!» ጊዲ ፒርዲዴስ፡

28 አሳስ ጸሎቴላን ፒርዳናስ ኢዛስ አጵ ኤራቴላይ ጸሳፌ
ኢሜቲዳይሳ ቤኢዳ ጊሻስ ኢስራኤል አሳይ ኡባይ ካዎይ ፒርዲዳ
ፒርዳ ሲዪዳ ዎዶ ካዎዛስ ኬሂፔ ያዪዴስ፡

4

ሶሎሞኔይ ሱንሊዳ ሹሚታ

1 ካዎ ሶሎሞኔይ ኢስራኤል ቢታ ኡባ ቦላ ካዎቲዴስ፡

2 ኢዚ ሹሚዳ አላፌቲ ሃይሳፌ ካሊ ጸፊቲዳይታ፡

ሳዶቄ ና አዛሪያሲ ቄሴ፡

3 ሺሻ ናይቲ ኤሊሆሬፊናይኔ

አካያይ ዋና ጸፊታ፤

አሂሉዴ ና ኢዮሳፊጾይ

ታሪኬ ጸፊ፤ *

4 ዮዳሄ ና ባናያይ

ኦላ ጋዳዋ፤

ሳዶቄይኔ

አቢያታሬይ ቄሴታ፤

5 ናታኔ ና አዛሪያሲ

ዴሬ አይሲዛይታስ አላፊ፤

ናታኔ ና ዛቡዴይ ቄሴኔ

ካዎስ ማታ ዞራንቻ፤

6 አሂሻሬይ ካዎ ኬላ አላፊ፤

አቢዳ ና አዶኒራሚ

ኡንኤቲዲ ዎልቃ ኦሶ

ኦሊዛይታ አላፊ፡

7 ቃሴ ሶሎሞኔስ ኢስራኤል ቢታ ኡባን ታማኔ ናሞኡ ዴሬታ
አይሲዛይቲ ዴቲስ፤ ኢስቲ ካዎሲኔ ካዎሶን ዲዛ አሳ ኡባስ ሚዛ
ካል ሺሻዛይታ፤ ኢስቲ ታራን ታራን ላይላ ጊዶን ኢሲ ኢሲ አገናስ
ጊዲዛ ካል ኤሄቲስ፡

* 4:3 ሺሻ ጌቲቲዛ አዴዚ ኦይዱ ዱማ ዱማ ሱንላን ጸይጌቲስ፡ 2ሳሜ 8:17፤
20:25ኔ 2ታሪ 18:16 ጸላ፡

8 ኢስታ ሱንሐኔ ኢስታ ኣይሲዛ ዘኔቲ ሃይሳፌ ካሊዲ
ጸፊቲዳ።

ቤኒ-ሁሬይ ኤፍሬማ

ጌዜ ኣይሴስ።

9 ቤኒ-ዲቃሬይ

ማቃጻ፣ ሻኣልቢማ፣

ቤቲ-ሼሚሼኔ ኤሎኔኔ

ቤቲ-ሃናኔ

ዴሬታ ኣይሴስ።

10 ቤኒ-ሄሴዲ ኣሩቦቲ

ዴሬን ዲዛ ሶኮኔ

ሄፌፌ ዴሬ ኡባ ኣይሴስ።

11 ቤኒ-ኣቢናዳቢ

ናፎቲ-ዶሬ ቢታ ኣይሴስ፤

ኢዚካ ሶሎሞኔ ናዮ ጸፊቲ ኣዚና።

12 ኣሂሉዴ ና ባኣናይ ታኢናኬኔ ማጊዶ ዴሬ፣ ጳርታኔፔ ዲጌ ቢዲ
ኢዝራኤልን ዲዛ ቤቲ-ሻኣኔ ጋካናስ፣ ሄፔካ ቢዲ ዮቂማኣማ
ፒኒዲ ኣቤሊ-ማሆሌ ዴሬ ጋካናስ ዲዛይሳ ኣይሴስ።

13 ቤኒ-ጌቤሪ ጋላኣዴን ዲዛ ኤራሞቲ ዴሬ፣ ጋላኣዴን ሚናሴ
ና ያኢሬ ዴሬታ፣ ኢዛ ዩሾን ገምቤኔ ገምቤ ፔንጌታን ጸርቂማላ
ቢራታ ኮላታቲ ዲዛ 60 ጌታ ካታማታኔ ባሳኔ ቢታን ዲዛ ኣርጎባ
ዴሬ ኣይሴስ።

14 ኢዶ ና ኣሂናዳቢ ማሃናይማ ዴሬ ኣይሴስ።

15 ኣሂማኣሲ ኒፍታሌማ

ዴሬ ኣይሴስ፤

ኢዚ ሶሎሞኔ ናዮ

ባሴማቲ ኣዚና።

16 ሁሼ ና ባኣናይ ኣሴሬኔ

ባኣሎቲ ዴሬ ኣይሴስ።

17 ፓሩሄ ና ኢዮሳፊጾይ

ዪሳኮሬ ዴሬ ኣይሴስ።

18 ኤላ ና ሸምኤይ

ቢኒያማ ዴሬ ኣይሴስ።

19 ኡሬ ና ጌቤሪ

ጋላኣዴ ቢታን ዲዛ

ኣሞሬታ ካዎ ሲሆኔ ዴሬኔ

ባሳኔ ካዎ

ኣጌ ዴሬ ኣይሴስ።

ሄ ዳሬታ ኡባ ኣይሲዛይታ ቦላ ኣላፊቴሉ ዲዛ ኢሲ ኣሲ ዴስ።

ዲሬቴሉ ኩሚዳ ሶሎሞን ካዎቴል

20 ዩሁዳ ኣሳ ቆዳይን ኢስራኤሌ ኣሳ ቆዳይ ኣባ ሻሚንታ ማላ ጮራቴዴስ፤ ኢስቲ ሚሼን ኡዩሼ ኡፋይሳን ዴኢዳ።

21 ሶሎሞንይ ኤፊራዲሴ ሻፋፔ ዶሚዲ ፊሊስጾሜ ቢታ ጋካናስ፤ ሄሳፊካ ቦላራ ጊብጼ ዛዋ ጋካናስ ዲዛ ካዎቴላታ ኡባ ሃሪዴስ፤ ሄ ቢታ ኣሳቲ ኢዛስ ገራ ገሪዳ፤ ኢስቲ ኢዚ ዲዛ ላይል ኡባን ኢዛስ ሃሪቴዳ።

22 ሶሎሞንስ ሃች ሃች ቁማስ 50 ኮንታሌ ሙሩታ ዲሌ፤ 100 ኮንታሌ ዲሌ፤

23 ዲኬቴዳ 10 ቦራታ፤ ዩዳ ሚዛ 20 ቦራታን 100 ዶርሳታ፤ ኢስታ ቦላካ ጮፎሾታ፤ ጋራታ፤ ጌንሳታን ሎኦ ካፎታ ኮሼስ።

24 ሶሎሞንይ ኤፊራዲሴ ሻፋፔ ኣርሼይ ወሊዛ ባጋራ ዲዛ ካዎቴላታ ኡባ ቲፊሳ ካታማፔ ዶሚዲ ጋዛ ካታማ ጋካናስ ሃሪዴስ፤ ባ ዩሹን ዲዛ ኡባ ዳሬታራካ ሳሮን ዴኢዴስ።

25 ሶሎሞንይ ዴኢዳ ላይል ኡባን ዳኔፔ ቢዲ ቤርሳቤሄ ጋካናስ ዩሁዳ ኣሳይን ኢስራኤሌ ኣሳይ ኡባይ ባ ዎይን ቱራ ኩዋኒን ባ ኤላ ኩዋን ዎፓን ኡቲዳ።

26 ሶሎሞንስ ፓራ-ጋሬታ ጎቺዛ 40,000 ፓራቲን 12,000 ቶጋ ኣሳቲ ዴቲስ።

27 ሄ ዞንታ ኣይሲዛይቲ ባና ጋኪዳ ኣጊናን ታራን ታራን ካዎ ሶሎሞንሲን ኢዛ ማዳፌ ማናስ ዩዳ ኣሳስ ኡባስ ኣይኮካ ፓጪሶንታ ሺሼቴስ።

28 ቃሴካ ጋሬ ጎቺዛ ፓራቲን ሃንኮ ፓራቲ ባንጋን ሃርቆ ኤሂዲ ዎሊዛሶን ዎሊቴስ።

29 ጸሳይ ሶሎሞንስ ኣጼ ኤራቴል፤ ኬሂ ጊታ ኣኬካን ዛዋይ ባይንዳ ኤራቴል ኢሚዴስ።

30 ሶሎሞንስ ዲዛ ኣጼ ኤራቴላይ ኣርሼይ ሞኪዛ ባጋራ ዲዛይታ ኣጼ ኤራቴላፊን ጊብጾታስ ዲዛ ኣጼ ኤራቴላ ኡባፊካ ኣጼሳ።

31 ኢዚ ኣሳ ኡባፊ ኣጼ ኤራንቻ፤ ቃሴ ኢዚ ኤዚራሄ ኣስ ኤታንፔ፤ ማሆላ ናይታፔ ሄማንፔ፤ ካልኮሌፔን ዳሪዳፔካ ኣጼ ኤራንቻ፤ ኢዛ ጎባቴሉ ኢዛ ዩሹን ዲዛ ካዎቴል ኡባን ሲዬቴዴስ።

³² እዚ 3,000 ሌሚሶታ ሃሳይደስ፤ ቃሴካ 1,005 ዬላታ ዬዲደስ።

³³ ሶሎሞን ደረሰው ዚጋፔ ቢዲ ኬላ ገሞቤ ቦላ ሞኪዛ ሂሶጾ ሚላ ጋካናሰ ዲዛ ዶዛታ ገሻሰ ዮቲደስ፤ ሄሳቶካ ሜሄታ፡ ዶኣታ፡ ካፎታ፡ ሳኦራ ጎሼቲዛ ሜዴቴላታ ገሻሰኔ ሞሌታ ገሻሰ ታማርሲደስ።

³⁴ እዛ አቶ ኤራቴላ ሲዬዳ ሳኦ ካዎታ ኡባፌ ከቴቲዳይቲ እዛ አቶ ኤራቴላ ሲያናሰ ዬዳ።

5

ጸሓ ኬል ኬጸና ሶሎሞን ገጌቴል

(2ታሪ 2:1-18)

¹ ጸረሴ ካዎ ከራሜይ ዳዊቴራ ባ ዲዛ ላይል ኡባን ሲቆን ጋሞኢዳ ገሻሰ ሶሎሞን ደረሰው ካዎ ዳዊቴ ሶሆን ካዎታናሰ ቴቴዳይሳ ሲዬዳ ባ ኦሳንቻታ ሶሎሞን ከቲደስ።

² ሶሎሞን ደረሰው ከራሜይ ዳዊቴ፡

³ «ታ ካዎ ዳዊቴ ቦላ ኡባሶራ ዳንዲዳ ኦላ ጋሶን ጎዳይ እዛ ሞርኬታ እዛ ቶሆፔ ጋርሳራ ሃሪሳና ጋካናሰ ጎዳ ባ ጸሓ ሱንላሰ ኬል እዚ ኬጸና ዳንዳዮንታ ኣገዳይሳ ኔ ኤራሳ።

⁴ ሃኢ ገዲኮ ጎዳ ታ ጸሓይ ታሰ ኡባሶራ ሳርቴል እሚዳ ገሻሰ ታሰ ሞርኬይ ወይኮ እታ ሚሺ ዳና።

⁵ ጎዳይ ታ ካዎ ዳዊቴስ፡ ታኒ ኔ ሶሆን ኔ ካዎቴላ ኣራታን ካዎላዛ ኔ ናይ ታ ሱንላሰ ኬል ኬጸና፡ ገዳ ማላ ታኒ ጎዳ ታ ጸሓ ሱንላሰ ጸሓ ኬል ኬጸናሰ ቆፓዲስ።

⁶ ሄሳ ገሻሰ ለባናሴፔ ዚጋ ታሰ ቃንጺዛ ኣሳታ ኣዛዛ፤ ታ ኣሳቲ ኔ ኣሳታራ ኦላና፤ ኔ ኣሳታሰ ኔኒ ቃንጸ ገዳ ዳሞዛ ታኒ ቃንጸና። ሲዶና ኣሳ ማላ ሚላ ቃንጸ ሂላ ኦ ኣሳይ ኤርንታይሳ ኔኒ ኤራሳ» ገ ከቲደስ።

⁷ ከራሜይ ሶሎሞን ከታዛ ሲዬዳ ኬሂፔ ኡፋይቲዳ፡ «ሃ ዎልቃማ ዳራ ኣይሳናሰ ዳዊቴስ ኣቶ ኤራቴላን ኩሚዳ ና እሚዳ ጎዳይ ሃኛ ጋላቲቶ» ገደስ።

⁸ ሄሳፌ ጉዬ ከራሜይ ሶሎሞን፡ «ኔኒ ታሰ ከቲዳ ከታይ ታና ጋኪደስ። ኔኒ ኮዬዳይሳ ኡባ ታኒ ኦላና፤ ዚጋ ሙዴላታ* ጸዳ ሙዴላታ ታኒ ኔሰ ሺሻና።

4:32 ለሚ 1:1፤ 10:1፤ 25:1፤ ሲቆ 1:1 5:5 2ሳሚ 7:12-13 * 5:8
ሙዴላ፡ ሙዴላ እሲ እሲ ባጋ ጋሞላ ቃላን ጨሬል ወይኮ ጩኬል ጌቴቴስ።

9 ታ አሳይ ሙዴሳታ ሊባኖሴፔ ዱጌ አባ ማታ ጋካናሰ ሚያና፤ ታኒካ ኢሰታ ቃቻ ጫናዳ አባ ቦላራ ቶኬቲዱ ኔኒ ማላቲዳሶ ጋላዳ ታ ቢርሺሳና፤ ኔኒ ሄፔ ኤካዳ ኔ ባጋራ ታ ካዎቲላ ኬላን ዱዛ አሳሰ ሚዛ ካል ዬዱዳ ታ አሞ ኩንላ» ጊ ከቲዴሰ።

10 ሄሳሶ ኦሊዱ ከራሜይ ሶሎሞኔይ ኮዪዳ ኬና ዚጋ ሙዴሳታኔ ጸዱ ሙዴሳታ ኡባ ሺሺዴሰ።

11 ሶሎሞኔይካ ካዎ ከራሜ ካዎቲላ ኬላን ዱዛ አሳታሰ ቃላባ ጊዳና ማላ 20,000 ኮንታሌ ጊሰቴኔ ሙሩታ ዎጋራ ዛይቲ 400,000 ሊቲሮ ላይላን ላይላን ፓጩይ ባይንዳ ከራሜሰ ሺሺዴሰ።

12 ጎዳይ ሶሎሞኔሰ ኢሚዳ ሂዶታ ቃላ ማላ ኢዛሰ አቆ ኤራቴል ኢሚዴሰ። ከራሜሰኔ ሶሎሞኔሰ ሎኦ ጋይቶቴሊ ዱዛ ጊሻሰ ባንታ ጊዶን ጫቂቲዳ።

13 ካዎ ሶሎሞኔይ ኢሰራኤሌ አሳ ኡባፌ 30,000 ጋባራታ ዶሪዴሰ።

14 አደኒራሜ ኢሰታ ቦላ ሃላቃ ሂሰቲ ሹሚዴሰ። ጋባራታካ ታሙ ታሙ ሺያን ሻኪ ሄቩ ኬሲዴሰ፤ ኢሲ ኢሲ ቡቴይ ኢሲ ኣጊና ሊባኖሴን ኦላና ማላኔ ናሞኡ ኣጊና ባሶን ባሶን ሸሞፓና ማላ ታራ ኦይሊዴሰ።

15 ሶሎሞኔሰ ቶሆ ቶኪዛ 70,000 አሳቲኔ ሹቕ ቄሪዛ 80,000 አሳቲ ጌዜን ዴቴሰ።

16 ቃሴካ ኦሶዛ አዋቲላን ካሌቲ ኦሲሲዛ 33,000 አላፌቲ ዴቴሰ።

17 ኢሰቲካ ካዎ ሶሎሞኔይ ኣዛዚን ጸሳ ኬላሰ ዮቕ ጊዳና ማላ ዎጋ ሙሩታ ሹቻታ ቄሪዱ ማሲዳ።

18 ኩሼ ሂላቴል ኤሪዛ ሶሎሞኔ አሳቲ፥ ከራሜ አሳቲኔ ጌባሌ አሳቲ ጸሳ ኬላሰ ኮሺዛ ሚሊኔ ሹቕ ቄሪ ጊግሲዳ።

6

ሶሎሞኔይ ኬጲዳ ጸሳ ኬል

1 ኢሰራኤሌ አሳይ ጊብጼ ቢታፌ ኬዚዳ ኦይዱ ጴታኔ ኦሰፑን ታማንላ ላይላን ሶሎሞኔይ ኢሰራኤሌ ቦላ ካዎቲዳ ኦይዳንሶ ላይላን ዚፌ ጌቴቲዛ ናሞኣንሶ ኣጊናን ጎዳ ኬል ኬጼ ደሚዴሰ።

2 ሶሎሞኔይ ጎዳሰ ኬጲዳ ኬላሰ ኣዱሳቴላይ 60 ዋቋ፥ ጎሞፓይ 20 ዋቋ፥ ቆቃቴላይ 30 ዋቋ።

3 ጸሳ ኩላ ዳራንቻዛ ጎምፓይ 20 ዋቋ ጊዲሺን ኢዛስ ኣዲሳቴላይ 10 ዋቋ ካሬ ኬዜስ።

4 ጸሳ ኩላስ ሶ ባጋራ ኣኪዲ ካሬ ባጋራ ጸሚዳ ማስኮቴቴ ዴቴስ።

5 ጸሳ ኩላ ዩሾን ኡባፌ ዱማቲዳ ጊዶ ቆልኣ ኪፊሌ ጎዳራ ኦይሴሊዲ ሃራ ኪፊሌታ ኬጺዴስ፤

6 ፖቄዛስ ጋርሳ ኪፊሌዛ ጎምፓይ 5 ዋቋ፣ ቦላ ናምኣንሶ ኪፊሌዛ ጎምፓይ 6 ዋቋ፣ ቦላ ሄቫንሶ ኪፊሌዛ ጎምፓይ 7 ዋቋ፤ ኣይኮይካ ጸሳ ኩላ ጊምቤዛ ካንሊ ጌሎንታ ማላ ኢዛ ዩሾን ካሬ ባጋራ ኬላታ ኬሊዴስ።

7 ጸሳ ኩላዚ ጊምቤቲዳ ሹቻቲ ማሴቲ ጊጊዳይ ሄን ባ ዲዛሶን ጊዲዳ ጊሻስ ጸሳ ኩላይ ኬጾቲሺን ናሪቃ ጊሪሲ፣ ካልታ ጊሪሲ ዋይኮ ሃራ ቢራታታ ጊሪሲ ጸሳ ኩላ ሄራን ሴቴቲቤና።

8 ፖቄዛስ ጋርሳ ኪፊሌዛ ጌሊዛ ፔንጌይ ጸሳ ኩላፌ ዱጌሃ ባጋራ ዴስ፤ ሄፔ ፑዴ ናምኣንሶ ፖቄዛኔ ሄቫንሶ ፖቄዛ ባናስ ዬቂ ዬቂ ኬዚዛ ኬቺ ዴስ።

9 ሄሳሶ ኦሊዲ ሶሎሞኔይ ኬላ ኬጺ ፖሊዴስ፤ ሂስቲዲ ካራዛ ሶ ባጋራ ዚጋ ሳንቃን ካሚዴስ።

10 ቃሴ ጸሳ ኩላ ዩሾን ኢስታስ ጶቃቴላይ ኢቻሹ ኢቻሹ ዋቋ ጊዲዳ ኪፊሌታ ኬጺዴስ፤ ሂስቲዲ ጸሳ ኩላ ጎዳራ ዚጋ ሳንቃን ኦይሴሊዴስ።

11 ጎዳ ቃላይ ሶሎሞኔኮ ዪዴስ፤

12 ሂስቲዲ፣ «ሃይሳ ኔኒ ኬጺዳ ጸሳ ኩላን ታ ዋጋ፣ ታ ኣዛዞኔ ማራ ኔ ናጊኮ ታኒ ኔ ኣዋ ዳዊቴስ ኢሚዳ ሂዶታ ቃላ ኔ ባጋራ ፖላና።

13 ሂስታዳ ታኒ ኢስራኤሌ ኣሳ ጊዶን ዴኣና፤ ታኒ ታ ዴራ ኢስራኤሌ ዬጋ ኣጊኬ» ጊዴስ።

(2ታሪ 3:8-14)

14 ሶሎሞኔይ ጸሳ ኩላ ኬጺ ጊጊዴስ።

15 ጸሳ ኩላ ጎዳ ሶ ባጋራ ዚጋ ሳንቃን ካሚዴስ፤ ወይጌዛ ቃሴ ጺዳ ሳንቃፌ ኦሊዴስ።

16 ጸሳ ኩላ ጊዶን ጉዬ ባጋራ 20 ዋቋዚ ኡባፌ ዱማቲዳ ጊዶ ቆልኣ ጊዳና ማላ ወይጌፔ ቢዲ ካራ ጋካናስ ዚጋ ሳንቃን ጎርዲዴስ።

17 ሄ ኡባፌ ዱማቲዳ ጊዶ ቆልኣፌ ሲንላ ባጋራ ዲዛ ወይጌዛስ ኣዲሳቴላይ 40 ዋቋ።

18 ጸሳ ከላሰ ሶ ባጋይ ፑዲዛ ጨሻታኒኔ ጨሻታ ሚሰሌን አሌቄቲዳሰ፤ ጌዶ ባጋራ ዚጋ ሳንቃን ካሜቲዳ ጌሻሰ ሙሌካ ጊምቤ ሹቺ ቤቲና።

19 ሶሎሞኔይ ጫቆ ታቦታ ዋላናሰ ኡባፌ ዱማቲዳ ጌዶ ቆልኣ ገግሲዳሰ።

20 ኡባፌ ዱማቲዳ ጌዶ ቆልኣ አዱሳቴላይ 20 ዋቋ፣ ጎምፓይ 20 ዋቋ፣ ቋቃቴላይ 20 ዋቋ። ሶሎሞኔይ ሄ ኡባፌ ዱማቲዳ ጌዶ ቆልኣሰ ሶ ባጋ ሙሩታ ዋርቃን ሜሺዳሰ፤ ዚጋፔ ኦሴቲዳ ያርሾ ያርሺዛሰዛካ ዋርቃን ሜሺዳሰ።

21 ሶሎሞኔይ ጸሳ ከላሰ ጌዶ ባጋዛ ሙሩታ ዋርቃን ሜሺዳሰ፤ ዋርቃን ሜሺቲዳ ኡባፌ ዱማቲዳ ጌዶ ቆልኣሰ ሲንላ ባጋራ ዋርቃ ሳንሳላታን አሌቄሲዳሰ።

22 ሂሰቲዱ ከላሰ ሶ ጌዶዛ ዋርቃን ሜሺዳሰ፤ ሄሳሶካ ኡባፌ ዱማቲዳ ጌዶ ቆልኣዛን ዱዛ ያርሾሶዛ ሙሩታ ዋርቃን ሜሺዳሰ።
*

23 ኡባፌ ዱማቲዳ ጌዶ ቆልኣዛን ዋላናሰ ኢሳሰ ኢሳሰ ጌሳይ 10 ዋቋ ጌዱዛ ናምኡ ከሩቤ ሚሰሌታ ዋጋራ ሚላፌ ማሲዱ ገግሲዳሰ።

24 ኮይሮ ከሩቤዛ ቄፌይ ኢሶይ ኢቻሹ ዋቋ፤ ናምኣንሶዚ ኢቻሹ ዋቋ፤ ኮይሮ ቄፌ ዴራፔ ቢዱ ናምኣንሶ ቄፌዛ ዴራ ጋካናሰ ታሙ ዋቋ።

25 ናምኣንሶ ከሩቤዛ ቄፌይካ ታሙ ዋቋ፤ ናምኡ ከሩቤታ ሜቋይኔ ጉባይ ኢሲ ጌና።

26 ኢሲ ኢሲ ከሩቤ ጌሳይ ታሙ ዋቋ።

27 ሶሎሞኔይ ጸሳ ከላን ዱዛ ኡባፌ ዱማቲዳ ጌዶ ቆልኣን ከሩቤታ ዋሊዳሰ፤ ኢሰታ ቄፌይ ሚጨቲ ኡቲዳሰ፤ ኢሲ ከሩቤዛ ቄፌይ ኢሲ ባጋ ጎዳ ቦቺሺን ሃንኮ ከሩቤዛ ቄፌይ ሃንኮ ባጋ ጎዳ ቦቺሰ፤ ኢሰታ ናምኣታ ቄፌይ ሶ ጌዶን ኢሶይ ኢሳራ ጋይቲሰ።

28 ሶሎሞኔይ ከሩቤታካ ዋርቃን ሜሺዳሰ።

29 ኡባፌ ዱማቲዳ ጌዶ ቆልኣዛ ሶ ባጋራኔ ካሬ ባጋራ ጎዳ ከሩቤ ሚሰሌታን፣ ዛምባ ሚሰሌታኒኔ ጨሻ ሚሰሌታን አሌቄሲዳሰ።

30 ቃሴካ ኡባፌ ዱማቲዳ ጌዶ ቆልኣዛኔ ጸሳ ከላ ዉይጌዛ ኡባ ዋርቃን ሜሺዳሰ።

* 6:22 ሃ ያርሾሶዚ ኤጻኔ ጨዋሲዛሶ።

6:22 ኬሳ 30:1-3

6:28 ኬሳ

25:18-20

31 ኡባፌ ዲማቲዳ ጊዶ ቆልኣ ጌሊዛሶዛሰ ፔንጌዛ ዋጋራ ሚላፌ ሳንቃታ ገግሲዳሰ፤ ቆሲላላታሲኔ ቆሬታሰ ኢቻሹ ዘዘይ ዳሰ።

32 ዋጋራ ሚላፌ ኦሴቲዳ ናምኡ ሳንቃታ ኪሩቤ ሚሰሌታን፤ ዛምባታ ሚሰሌታን፤ ጨሻ ሚሰሌታን ኣሌቂሲዳሰ፤ ሄይታ ኡባ ዋርቃን ሚሺዳሰ።

33 ሄሳልካ ጸሳ ኬላ ጌሊዛሶ ፔንጌዛን ዋጋራፔ ኦሴቲዳ ኦይዱ ዘዘራ ዲዛ ቆሲላላ ኤሲዳሰ።

34 ናምኡ ናምኡ ሳንቃቲ ማጻፋን ኢሲ ቦላ ኦይኬቲዳ ናምኡ ሳንቃታ ገግሲዳሰ።

35 ኢሰታ ቦላ ኪሩቤ ሚሰሌታ፤ ዛምባ ሚሰሌታን፤ ጨሻ ሚሰሌታ ሜዲዳሰ፤ ሄ ሚሰሌታ ሙሩታ ዋርቃን ሚሺዳሰ።

36 ጸሳ ኬላን ጊዶ ዉይጌን ማሴቲዳ ሹቕ ሄሹ ማራን ሊጨዳሰ፤ ቃሴ ኢሲ ማራን ዚጋ ሳንቃ ሊጨዳሰ።

37 ሶሎሞኔይ ካዎቲዳ ኦይዳንሶ ላይላን፤ ዚፌ ጌቴቲዛ ናምኣንሶ ኣገናን ጎዳ ኬላ ዮቺ ዬጌቲዳሰ።

38 ሶሎሞኔይ ካዎቲዳ ታማኔ ኢሲንሳ ላይላን፤ ቡሌ ጌቴቲዛ ኦስፑንሳ ኣገናን ጸሳ ኬላይ ካሴ ኬጸናሰ ቆፒዳ ማላ ኬጸቲ ጊጊዳሰ፤ ሶሎሞኔይ ጸሳ ኬላ ላቸን ላይላን ኬጸ ኩንሒዳሰ።

7

ሶሎሞኔይ ኬጸዳ ካዎ ኬላ

1 ሶሎሞኔይ ባ ኬላ ኬጸ ጊጋናሰ 13 ላይላ ኤኪዳሰ።

2 ሊባኖሴ ዋራ ጌቴቲዛ ካዎቲላ ኬላ ኬጸዳሰ፤ ሄ ኬላሰ ኣዱሳቲላይ 100 ዋቋ፤ ጎምፓይ 50 ዋቋ ጌሳይ 30 ዋቋ፤ ኦይዱ ማራን ኤቂዳ ዚጋ ቱሳቲ ቱቂ ኦይኪዳ ዚጋፔ ኦሴቲዳ ዘንጋልላቲ* ዳቴሰ።

3 ቱሳቲ ቶኪ ኦይኪዛ ጌዳ ዋቋዛ ሚላቲ ዳቴሰ፤ ኢሲ ማራ ቦላ 15 ዘንጋልላቲ ዳቴሰ፤ ሄይቲ ኢሲ ቦላ ኦይዱ ታማኔ ኢቻሻ። ሄ ዘንጋልላቲ ቦላራ ካራ ካሚዛ ዚጋ ሳንቃቲ ዳቴሰ።

4 ሄ ኬላ ማሰኮቲቲ ሄሹ ማራን ቶቁ ጊ ኦሴቲዳ፤ ኢሰቲ ኢሶይ ኢሳራ ገናን ዳቴሰ።

5 ፔንጌታሲኔ ማሰኮቲታሰ ኦይዱ ዘዘራ ዲዛ ቆሲላላቲ ዳቴሰ፤ ማሰኮቲቲ ሄሹ ማራን ኦሴቲዳ፤ ኢሰቲ ኢሶይ ኢሳራ ገናን ዳቴሰ።

* 7:2 ዘንጋልላ፡ ዘንጋልላ ጊዛይሳ ኢሲ ኢሲ ባጋ ጋሞሶ ቃላን ጸርባ ጌቴቲሰ።

6 ሶሎሞን ደሮ ቱሳታራ ዲዛ ከሌ ጌቴቲዛ ከሌ ከጸደሰ፤ ሄ ከላሰ አዲሳቲላይ 50 ዋጃ፣ ጎምፓይ 30 ዋጃ፤ ሲንላ ባጋራ ቱሳን ኡቲዳ ካራይ ዲዛ እሲ ሲሜሬቲዛ ዳራንቻይ ደሰ።

7 ቃሴ ኢዚ ፒርዳ ፒርዳናሰ ኡቲዛ ሺሎታ ከሌ ከጸደሰ፤ ሄ ከላይ ወይጌፔ ቢዲ ካራ ጋካናሰ ዚጋ ሳንቃን ጎርዴቲዳሰ።

8 ፒርዳ ከላፌ ጉዬ ባጋራ ዲዛ ዛጎን ካዎቲላ ከላ ባሰ ዳናሶ ሃንኮ ከላ ማላ ኦሊ ከጸደሰ፤ ሶሎሞን ደሮ ማሻ ፓርኔ ናዩሰ ሄሳ ማላ ካዎቲላ ከሌ ከጸደሰ።

9 ሄ ከላቲ ኡባይ ካሬፔ ቢዲ ጌታ ዛጎዛ ጋካናሰ፣ ዮቻፌ ቢዲ ካራ ጋካናሰ ጌናን ጌናን ቃንጾቲ ማሴቲዳ ሹቻታን ከጾቲዳ።

10 ዮቻዚካ ዋጂዳይ 10 ዋጂኒኔ 8 ዋጃን ሎኢ ማሴቲዳ ጌታ ሹቻታና።

11 ኢዛፔ ቦላ ባጋራ ሚጾን ሚጾን ማሴቲዳ ሎኦ ሹቻቲኔ ዚጋ ሳንቃቲ ዴቲሰ።

12 ጳሳ ከላ ወይጌይ ያኔ ሃ ሲሜሬቲዛ ዳራንቻራ ጉጂን ጌታ ዛጎዛ ማላ ሎኢ ማሴቲዳ ሄቩ ዩሾ ሹቻን፣ ኢሲ ዩሾ ዚጋ ሳንቃን ጌምቤቲዳሰ።

ኪራሜ ኦሶ

13 ካዎ ሶሎሞን ከቲዲ ኪራሜ ጌቴቲዛ እሰ ጸርሴ ካታማፔ ኤሂሲዳሰ።

14 ኒፍታሌሜ ቆሞፌ ጌዲዳ ኪራሜ እያ አምኦ፤ ኢዛ አዋይ ጸርሴ አሳ፤ ጸርቂማላ ኦሶንካ ኤሬቲዳ ሂላንቻ፤ ኪራሜይ ጸርቂማላ ቆጶዛ ሂላቲሊ ዲዛ አሳ፤ ኢዚ ጸርቂማላፔ ቆጶዲ ከሲዛ ኦሶ ኡባን አኬካን፣ ኤራቴላኒኔ ሂላቲላን ከሂ ሎሂዳ አሳ፤ ኢዚካ ካዎ ሶሎሞን ዩዲ ባሰ ኢሜቲዳ ኦሶ ኡባ ኦሊዳሰ።

15 ኪራሜይ ኢሲ ኢሲ ጌሳይ 18 ዋጃ፣ ዩዩ አፋናሰ ኦርዴቲላይ 12 ዋጃ ጌዲዳ ናምኡ ጸርቂማላ ቱሳታ ኦሊዳሰ።

16 ሄሳላካ ቱሳታ ጸራን ዋላናሰ ናምኡ ቁሰቲታ ጸርቂማላፔ ሴሪሲዲ ኦሊዳሰ፤ ኢሲ ኢሲ ቁሰቲይ ኢቻሽ ዋጃ አዲቁሰ።

17 ቱሳ ሁኤን ዲዛ ቁሰቲታሰ አሌቆ ጌዳና ማላ ኢሲ ቁሰቲሰ ጌቲ ሚሳቲዛ ላፑን ሳንሳላታ ኦሊዳሰ።

18 ቱሳታ ቦላ ዲዛ ቁሰቲታ አሌቁሳናሰ ኢሲ ኢሲ ጌቲ ሳንሳላታ ዩሾን ናምኡ ማራን ኦርማኔታ ኦሲሲዳሰ፤ ናምኡ ቁሰቲታሰካ ሄሳላ ኦሊዳሰ።

19 ዳራንቻን ኤቂዳ ቱሳታ ሁኤን ዲዛ ቁሰቲታ አዲሳቲላይ 4 ዋጃ፤ ኢሰታ ቦላ ሱፌ ጨሽ ሚሳቲዛ ጨሽ ደሰ።

20 ናምኤ ቱሳታ ሁኤ ቦላ ዲዛ ጊቴ ሳንሳላታታፔ ካሊዲ ዲዛ ኤቭይ ኡተዳሶሆፔ ቦላ ባጋራ 200 ኦሮማኔ ቴራ ሚሰሌቴ ናምኤ ማራን ዩዩ አዲ ዴቴስ።

21 ኪራሜይ ሄ ናምኤ ቱሳታ ሄ ሃ ሲሜሬቲዛሶን ጸሳ ኬላ ዳራንቻን ኤሲዴስ፤ ዳጌሃ ባጋራ ኤሲዳ ቱሳ ያኪኔ †፡ ፑዴሃ ባጋራ ኤሲዳይሳ ቦኤዜ ‡ ጊ ሰንሊዴስ።

22 ቱሳታ ሁኤን ዲዛ ቁሰቴቲ ሱፌ ጨሽ ሚሳቴቴስ፤ ሄሳ ማላን ቱሳታ ኦሶይ ፖሌቴዴስ።

ጸርቂማላፔ ኦሴቲዳ ጊታ ጋባቴ

(2ታሪ 4:2-5)

23 ኪራሜይ ኢዛስ ሜዳይ ኤቭ ማላ ጊታ ጋባቴ ጸርቂማላፔ ሴሪሲ ሜዲዴስ፤ ሄ ጊታ ጋባቴዛ ዶናይ ሃ ጋጽፔ ያ ጋጽ ጋካናስ 10 ዋዳ፤ ጌሳይ 5 ዋዳ፤ ዩዩ አዳናስ ቃሴ 30 ዋዳ።

24 ጊታ ጎንጌዛ ዶናን ካሪ ባጋራ ዚቂ ጊዲ ኢዛራ ኦይኬቲ ሜዴቲዳ ጎሴ ሚሰሌቴ ዴቴስ፤ ሄ ሚሰሌቴ ናምኤ ማራን ኢሲ ኢሲ ዋዳን ታማይ ታማይ ዩዩ አዳናስ ሹዬቴዴስ።

25 ሄ ጊታ ጋባቴይ ጸርቂማላፔ ሜዴቲዳ 12 ቦራ ሚሰሌታ ዘኮን ኡቲዴስ፤ ቦራታ ሚሰሌታፔ ሄቫቲ ፑዴሃ ባጋ፡ ሄቫቲ አርሼይ ወሊዛ ባጋ፡ ሄቫቲ ዳጌሃ ባጋ፡ ሄቫቲ ቃሴ አርሼይ ሞኪዛ ባጋ ሲሚ ኡቲዳ፤ ጊታ ጋባቴዚ ኢስታ ቦላ ኡቲዴስ፤ ኢስታስ ጉዬ ባጋይ ጊዶ ሲሚ ኡቲዴስ።

26 ሄ ጊታ ጎንጌዛስ ኦርዴቴላይ ኩሼ ቃኦ ሊኬ፤ ኢዛ ዶናይ ጨሻ ሚሳቲዲ ዋንጫ ሚሳቴስ፤ ሄ ጊታ ጋባቴዚ 40,000 ሊቲሮ ጊዲዛ ሃል ኦይኬስ።

ጸርቂማላፔ ኦሴቲዳ ጋሪታ

27 ኪራሜይ ቃሴ ዲማ ዲማ ሚሻታ ዋሊዛ ታሙ ጋሪታ ጸርቂማላፔ ሜዲዴስ፤ ሄ ጋሪታስ ኢሳስ ኢሳስ ኢዳሳቴላይ 4 ዋዳ፡ ጎሞፓይ 4 ዋዳ፡ ጌሳይ 3 ዋዳ።

28 ሄ ጋሪቲ ሄሳሶ ኦሴቲዳ፤ ፑዴ ኤቂዳ ኦይዱ ቢራታታ ቦላ ፒዲ ጊዳ ሎቻ ጸርቂማላቴ ኦይኬቲ ኡቲዳ።

29 ሄ ጸርቂማላታ ቦላ ጋሞታ፡ ቦራታኔ ኪሩቤታ ሚሳቴሲዲ ሜዲዳ ሚሰሌቴ ዴቴስ፤ ጋሞታ ሚሰሌታፔኔ ቦራታ ሚሰሌታፔ ቦላ ባጋራኔ ጋርሳ ባጋራ ቆጾቲ ጊጊዳ ጨሻ ኤንጨርሳ ሚሰሌቴ ዴቴስ።

† 7:21 ያኪኔ፡ ያኪኔ ጉሲ ኢብራዊታ ቃላራ ጸሳይ ኤሴስ ጉሳ። ‡ 7:21 ቦኤዜ ጉሲ ኢብራዊታ ቃላራ ጸሳ ዋልቃን ጉሳ።

30 ሚሻታ ኢስታ ቦላ ዋሊ ዳርቂማላፔ ኦሴቲዳ ኦይዱ ጋሬቲ ዴቲስ፤ ሄ ጋሬቲ ጌንዴራና ማላ ኦይኪዳ ማርጮቲ ዴቲስ፤ ሄሳሶካ ኦይዱ ባጋራ ሜቻ ጎንጌይ ኢስታ ቦላ ኡቲዛ ዳርቂማላፔ ኦሴቲዳ ጨሻ ኤንጨርሳታን ኣሌቁቲ ኡቲዳ።

31 ሜቻ ጎንጌዛ ቆጼ ጌሳይ ኢሲ ታዳኮ፤ ቃሴ ጎንጌዛ ጌሳይ ኢሲ ዋዳ ማላ፤ ኢዚካ ኤቭ ማላ፤ ጎንጌዛ ቆጼይ ሚስሌታን ኣሌቁቲ ኡቲዳስ፤ ኢዛ ቶኪ ኦይኪዳ ኦይዱ ጉላይ ዴስ ኣቲን ኤቭ ዴና።

32 ኦይዱ ጋሬታስ ኢሳስ ኢሳስ ጌሳይ ኢሲ ዋዳ ባጋ፤ ሄ ጋሬቲ ሎቻ ዳርቂማላፔ ጋርሳ ባጋራ ዴቲስ፤ ጋሬቲ ኢስታ ቦላ ሚሼ ዋሊዛሶታራ ኢሲፌ ማርጮን ኦይኬቲ ኡቲዳ።

33 ጋሬቲ ኦላ ፓራ-ጋሬ ሚሳቲቲስ፤ ጋሬታ ኢሲ ቦላ ጋሊ ዋዳዛ ማርጮቲ፤ ቻርኬቲኔ ታጎቲ ኡባይካ ዳርቂማላፔ ኦሴቲዳ።

34 ሄ ጋሬታ ኡባ ዘዜታሰካ ኢስታ ቶሆሶራ ቶሆሶራ ኢስታራ ኢሲኖ ጊዱ ኦይኬቲዱ ዳርቂማላፔ ሜዴቲዳ ዘምፖቲ ዴቲስ።

35 ኢሲ ኢሲ ጋሬዛ ሁኤ ዩሾን ኢዛስ ጌሳይ ኢሲ ዋዳስ ባጋ ፒሬሜይ ዴስ፤ ዘምፖቲኔ ሎቻ ዳርቂማላፔ ጋሬዛራ ኦይኬቲ ኢሲኖ ጊዱ ኦሴቲዳ።

36 ሃ ዘምፖታፔኔ ሎቻ ዳርቂማላታፔ ጊዶን ዱዛ ሃንኮ ኣቲዳ ሶሆቲ ኡባይ ኪራቤታን፤ ጋሞታኒኔ ዛምባታ ሚስሌታን ኣሌቁቲ ኡቲዳ፤ ቃሴ ኢስታ ዩሾይ ጨሻ ኤንጨርሳ ሚስሌን ኣሌቁቲ ኡቲዳስ።

37 ታሙ ጋሬቲካ ሄሳሶ ኦሴቲዳ፤ ኢስቲ ሴሪዱ ሜዴቲዳ ሚሻይ ኢሲኖ ጊዱዳ ጊሻስ ኢስታ ጌሳይኔ ሜዳይ ኢሲ ማላ።

38 ኪራሜይ ታሙ ሜቻ ጎንጌታ ዳርቂማላፔ ሜዴዴስ፤ ኢሲ ኢሲ ጎንጌ ጎምፓይ 4 ዋዳ ጊዱዱ፤ 880 ሊቲሮ ሃላ ኦይኬስ፤ 10 ጋሬታስ ሁኤን ሁኤን ኢሲ ኢሲ ሜቻ ጎንጌይ ዴስ።

39 ኪራሜይ ኢቻሽ ጋሬታ ጸሳ ኬላስ ፑዴሃ ባጋራ፤ ኢቻሻታ ቃሴ ጸሳ ኬላስ ዴጌሃ ባጋራ ዋሊዴስ፤ ቃሴ ዳርቂማላፔ ኦሴቲዳ ጌታ ጋባቲዛ ጸሳ ኬላፌ ዴጌሃ ባጋራ ኣርሼይ ሞኪዛ ባጋራ ጉላ ቦላ ኤሲዴስ።

ጸሳ ኬላ ሚሻታ
(2ታሪ 4:11—5:1)

40 ቃሴ ኪራሜይ ጸርታ፥ ቃጵታኔ ዲሰቲታ ሜጲዳሰ፤ ሂስቲዲ ካዎ ሶሎሞኔስ ጎዳ ኬፋ ኦሶታ ሃይሳፌ ካሊዛይሳ ማላ ኦሊ ፖሊዳሰ።

41 ሂይቲካ ናምኡ ቱሳታ፤

ሂ ቱሳታ ሁኤ ቦላ ዋሊዛ

ኤቭ ማላ ኦሴቲዳ

ናምኡ ቁስቲታ፥

ቱሳታ ቦላ ዲዛ

ቁስቲታ ኣሌቂሲዛ

ናምኡ ጊቲ ማላ ሳንሳላታታ፥

42 ቁስቲታ ቦላኔ ቱሳታ ቦላ ናምኡ ማራን ኦሴቲዳ ጊቲ ማላ ሳንሳላታታ፥

ኣሌቂሲዛ 400 ኦርማኔ

ቴራ ሚሰሌታ፥

43 ታሙ ጋሬታ፥

ታሙ ሜቻ ጎንጌታ፥

44 ጊታ ጎንጌዛኔ

ኢዛ ቶኪዳ 12 ቦራ ሚሰሌታ፥

45 ጸርታ፥ ቃጵታኔ ዲሰቲታ።

ኪራሜይ ካዎ ሶሎሞኔይ ጎዳ ኬፋ ኦሶስ ጎኤታና ማላ ሃ ሚሻታ ኡባ ቁጨቲዲ ጸልቂዛ ጸርቂማላፔ ኦሊዳሰ።

46 ካዎ ሶሎሞኔይ ሱኮቴፔኔ ጸርታኔፔ ጊዶን ዮርዳኖሴ ዴምባን ዴኢዛ ጸርቂማላ ሴሪሲዛሶን ሃይታ ኡባ ኦሲሲዳሰ።

47 ጸርቂማላፔ ሜጴቲዳ ሃ ሚሻይ ኡባይ ኬሂ ዳር ጊዲዳ ጊሻሰ ሶሎሞኔይ ኢዛ ሜዛኒሲቤና፤ ሄሳ ጊሻሰ ሃ ሜጴቲዳ ሚሻቲ ኣይ ኬና ዴጾኮ ኤሬቲቤና።

48 ቃሴካ ሶሎሞኔይ ጎዳ ኬፋ ጊዶን ጎኤታና ማላ ኦሲሲዳ ሚሻቲ ኡባይ ሃይሳፌ ካሊዛይታ። ዋርቃፌ ኦሴቲዳ ያርሾ ያርሺዛሶ፥ ጎዳ ሲንፋን ዋሊዛ ኡኬፋቲ ኡቲዛ ዋርቃ ጸራጵዛ፥

49 ኡባፌ ዲማቲዳ ጊዶ ቆልኣፌ ሲንፋን ኢቻሻቲ፥ ኡሻቻ ባጋራ ኢቻሻቲ፥ ሃዲርሳ ባጋራ ኤቂዳ ዋርቃፌ ኦሴቲዳ ጸምፔ ዋሊዛ ባላታ፥ ጨሻታ፥ ጸምፔታኔ ቃጵታ፥

50 ጸኣታ፥ ጸምፔ ቶይሲዩዛይታ፥ ጸርታ፥ ኤጻኔ ኢሰታ ቦላ ጨዋሲዛይታ፥ ታማ ኤኪዛ ሚሻታኔ፥ ኡባፌ ዲማቲዳ ጊዶ ቆልኣ ፔንጌታሲኔ ጸሳ ኬፋ ፔንጌታሰ ጊዲዛ ማጻፋታ። ሃ ሚሻቲ ኡባይ ዋርቃፌ ኦሴቲዳ።

⁵¹ ካዎ ሶሎሞን፣ ጎዳ ኬላ አሶ ኡባ ፖሊዳ፣ ጉዬ ኢዛ አዋዳዊ፣ ጎዳሰ ዱማሲ ዋሊዳ ቢራ፣ ዋርቃኔ ሃራ ሚሻታካ ኡባ ኤሂዱ ጸሳ ኬላ ሚሽ ሚንጂዛሶን ዋሊዳሰ።

8

ታቦታዛ ጸሓ ኬል ጌልሉ

(2nd 5:2—6:2)

¹ ሂሳፌ ጉዬ ካዎ ሶሎሞኔይ ታቦታዛ ዳዊቲ ካታማ ጲዮኔፔ ኬሲዲ ጳሳ ኬሐ ኤሃናሰ ኢሰራኤል ጨማታ፥ ኮራፒኔታኔ ኢሰራኤል ኬላ ኣሳ ሃላቃታ ባ ዲዛሶ ዩሩሳሌም ካታማ ሽሽዱሶ።

² ኤታኒሜ ጌቴተዛ ላፑንግ ኣጊናን ደሴ ባኣሌይ ቦንቼተዛ ዎዴ ኢሰራኤል ኣቲማ ኣሳይ ኡባይ ካዎ ሶሎሞኔኮ ሸቂዴስ።

³ ኢሰራኤል ጨማጥ ኡባይ ሺቂን ቄሴቴ ታቦታዛ ዴንላ ቶካዳ።

⁴ ለወጥኔ ቄሴቲ ታቦታ፡ ዲንካኔዛኔ ኢዛ ጊዶን ዲዛ ጌሻ ሚሻታ ኡባ ቶኪዲ ኤሂዳ።

⁵ ካዎ ሶሎሞንይን ኢዛራ ዲዛ ኢስራኤል አሳይ ኩሜል ታቦታ ሲገኝ ሺቂዲ ቆዳናስ ዳገዳዬቶገታ ጮራ ደርሳታን ቦራታ ያርሽዳ።

6 ሄሳፌ ጉዬ ቄሴቲ ታቦታ ጸሓ ከላ ጊደን ዲዛ ኡባፌ ዲማቲዳ ጊደ ቆልኣን ከሩቤ ሚስሌታ ቄፌታፔ ጋርሳ ባጋራ ዎላዳ።

7 ሚሰጠዎት ኢትዳ ከሩቤታ ቄፊት ታቦታኔ ታቦታ ቶኪዛ ሚሰጥኩኝ።

8 ቶሆ ሚላቲ ከሂፔ አዲሳ ጊዲዳ ገሻስ አስታ ጸራይ ኦባፌ ዲማቲዳ ጊዶ ቆልኣፌ ሲንላ ባጋራ ዲሼ ቤቴቲስ፤ ጊዶ አቲን ኦባፌ ዲማቲዳ ጊዶ ቆልኣስ ሲንላ ባጋራ ጊደንታ ሃራ ባጋራ ዲዛይታስ ቤቴቴና፤ አስቲ ሃኖ ጋካናስ ሄን ዴቴስ።

⁹ ኢስራኤል ላሳይ ጊብጽ ቢታፌ ከዚያ ዋዳ ጎዳይ ኢስታራ ጫቄቲዳ ሲና ዙማ ቦላ ሙሴይ ታቦታ ጊደን ዋሊዳ ማሴቲዳ ናምኦ ሹቸታፔ ኣቲን ሃራይ ኣይኮ ሚሺካ ባዋ።

¹⁰ ቁሴቲ ጌሻሶዛፔ ኬዚን ሻራይ ጎዳ ኬል ኩሚ ኡተደሰ።

11 ሄ ሻራ ጊደን ዲዛ ጸሳ ቦንቾይ ሶሆዛ ኩሚዳ ጊሻሰ ቄሴቲ ባንታ ኦሶ ኦፋናሰ ዳንዳይቤቴና።

ሶሎሞኔ ዋሳ

12 ሄሳፌ ጉዬ ሶሎሞኔይ፥ «አቤት ጎዳዉ፥ ኔኒ፥ ታኒ ዱማ ሻራን ዳኣና፥ ጋዳሳ።

13 ሄኮ ታኒ ኔኒ ኢዛን ሜርናሰ ዳኣና ማላ ጌታ ኬል ኬጸዲሰ» ጌ ዋሲዴሰ።

ሶሎሞኔይ ዳራሰ ሃሳይዳ ሃሳያ

(2ታሪ 6:3-11)

14 ኢሰራኤል አሰ ኡባይ ዱላታን ኩሚ ኤቂዲሺን ካዎይ ኢሰታኮ ሲሚዲ፥

15 «ጎዳ ኢሰራኤል ጸሳይ ጋላቴቶ! ታ አዋ ዳዊቴሰ ባ ዶናን ዮቲዳ ሂዶታ ቃላ ባ ኩሼን ፖሊዴሰ፤ ሄ ኢዚ አሚዳ ሂዶታይ፥

16 ታ ዳራ ኢሰራኤል ታኒ ጌብጼ ቢታፌ ኬሲዳ ጋላሳፌ ዶሚን ታ ሱንላይ ኢዛን ጼይጌታና ማላ ጸሳ ኬል ኬጸናሰ ኢሰራኤል ቆሞታ ካታማታፔ አሳካ ዶራቤኬ፤ ጌዶ አቲን ታ ዳራ ኢሰራኤል ካሌፋና ማላ ዳዊቴ ዶራዲሰ፤ ጌሰ።

17 «ታ አዋ ዳዊቴ ጎዳ ኢሰራኤል ጸሳ ሱንላሰ ጸሳ ኬል ኬጸናሰ ባ ዋዚናን ቆፒዴሰ።

18 ጎዳይ ታ አዋ ዳዊቴሰ፥ ሳኒ ታ ሱንላሰ ጸሳ ኬል ኬጸናሰ ኔ ዋዚናን ቆፒዳይሲ ሎኦ፤

19 ጌዶ አቲን ጸሳ ኬል ኬጸናይ ኔና ጌዳካ፤ ታ ሱንላሰ ጸሳ ኬል ኬጸናይ ኔ ጉልባቴፔ ዬሌታና ኔ ና፤ ጌዴሰ።

20 «ጎዳይ ባ አሚዳ ሂዶታ ቃላ ፖሊዴሰ፤ ጎዳይ አሚዳ ሂዶታ ቃላ ማላ ታኒ ታ አዋ ዳዊቴ ሶሆን ካዎታዳ ኢሰራኤል ካዎቴላ ኣራታን ኡታዲሰ። ቃሴካ ጎዳ ኢሰራኤል ጸሳ ሱንላሰ ጸሳ ኬል ኬጸዲሰ።

21 ጎዳይ ኑ አዋታ ጌብጼፔ ኬሲዳ ዋዴ ኢሰታራ ጫቂቲዳ ጫቆ ቃላይ ኢዛን ዲዛ ታሶታይ ዳናሶ ታ ኢዛ ጌዶን ጌሳዲሰ» ጌ አንጂዴሰ።

ሶሎሞኔ ዋሳ

(2ታሪ 6:12-42)

8:11 ኬሳ 40:34-35 8:12 ማዛ 18:11፤ 97:2 8:16 2ሳሚ 7:4-11፤
1ታሪ 17:3-10 8:18 2ሳሚ 7:1-3፤ 1ታሪ 17:1-2 8:19 2ሳሚ 7:12-13፤
1ታሪ 17:11-12

22 ሄሳፌ ጉዬ ሶሎሞኔይ ጎዳሰ ያርሾ ያርሺዛሶ ሲንላን ኩሜላ ኢሰራኤል ዳራ ዱላታይ ዲዛሶን ኤቂዲ ባ ኩሼ ፑዴ ሳሎ ዴንሲዴሰ፤

23 ሂሰቲዲ፥ «አቤት ጎዳዉ፥ ኢሰራኤል ጸሳዉ! ቦላ ሳሎን ዎይኮ ጋርሳ ሳኣን ኔ ማላ ጸሲ ዴና፤ ባ ኩሜላ ዎዚናን ኔ ሲንላን ሚኒ ኤቂዳ ኔ ኦሳንቻታሰ ኔ ጫቂዳ ቃላ ናጊዛይኔ ኔ ሚኖ ሲቆዛ ቆንጨሲዛይ ኔና።

24 ኔ አሽካራሰ ታ አዋ ዳዊቲሰ ኔኒ ኦላና ጋዳ ኢሚዳ ሂዶታ ናጋዳሳ፤ ኔኒ ካሴ ኔ ዶናን ዮቲዳ ሂዶታ ቃላ ኔ ኩሼን ሃቶ ፖላዳሳ።

25 «ሃኢካ አቤት ጎዳዉ፥ ኢሰራኤል ጸሳዉ! ኔኒ ኔ አሽካራሰ ታ አዋ ዳዊቲሰ፥ ሳኒ ታ ሲንላን ሲሜሬቲዳ ማላ ኔ ናይቲካ ታ ሲንላን ሲሜሬቲኮ ታ ሲንላን ኢሰራኤል ካዎቴላ ኣራታን ኡቲዛ ኣሲ ሙሊካ ቆዬና፥ ኔኒ ጊዳ ቃላ ፖላ።

26 ሃኢካ አቤት ኢሰራኤል ጸሳዉ! ኔኒ ኔ አሽካራሰ ታ አዋ ዳዊቲሰ ኢሚዳ ሂዶታ ቃላይ ፖሌቶ።

27 «ቱማፔ ጸሲ ሳኣ ቦላ ዴኢ ኤሪዜ? ቤኣ ሳሎይ፥ ሳሎታፔ ቦላን ዲዛ ሳሎይካ ኔና ኦይካና ዳንዳዬና፤ ሂሰቲን ሃይሲ ታ ኬዲዳ ጸሳ ኬላይ ኔሰ ኣይ ጊዳኔ!

28 ጊዲኮካ አቤት ጎዳዉ፥ ታ ጸሳዉ! ታኒ ኔ አሽካራይ ሃቶ ዎሲዛይሳኔ ሾቢዛይሳ ኔኒ ኤዘጋ።

29 ኔኒ፥ ታ ሱንላይ ሄ ሶሆን ዳና፥ ጊዳ ሃይሳ ጸሳ ኬላ ኔ ኣይፌይ ኦማርሲኔ ጋላሰ ጽሎ፤ ታኒ ኔ አሽካራይ ሃይሳ ኬላኮ ሲማዳ ዎሲዛ ዎሳ ኔኒ ሲያ።

30 ታኒ ኔ አሽካራይኔ ኔ ዴሬ ኢሰራኤላይ ሃይሳ ጸሳ ኬላኮ ሲሚዲ ሾቢ ዎሲዛ ዎሳ ኔ ሲያ፤ ኔ ዱሳሶን ሳሎን ዳሼ ሲያዳ ኑሰ ኣቶ ጋ።

31 «ኢሲ ኣሲ ባ ላጌ ቆሂዲ ካሺ ጊን ኢዛ ጫቁላናሰ ኤሂን ሃይሳ ጸሳ ኬላ ጊዶን ዲዛ ያርሺዛሶዛ ሲንላን ኢዚ ጫቁኮ፥

32 ኔኒ ሳሎን ዳሼ ሄሳ ሲያዳ ፖላ፤ ኔ ኣይሌታ ጊዶን ፒርዳ ቆሂዲዴሰ ኢዛ ኦሶ ማላ ኢዛሰ ዛራ፤ ጸሎዛሰ ኢዛ ጸሎቴላ ቆንጨሳዳ ሻቱሚሳ።

33 «ኔ ዴሬ ኢሰራኤላይ ኔና ቆሂዳ ጋሶን ባ ሞርኬታን ጸኔቲዲ ኢሰቲ ኔኮ ሲሚዲ ኔ ሱንላ ጴይጊኮ ሃ ጸሳ ኬላን ኔና ዎሲኮኔ ኔና ሾቢኮ፥

34 ኔኒ ሳሎን ዳሼ ሲያ፤ ኔ ዴሬ ኢሰራኤል ናጋራ አቶ ጋ፤ ሂስታዳ ኔኒ ኢስታ አዋታሰ ኢሚዳ ቢታዮ ኢስታ ዛራ ጌልላ።

35 «ኔ አሳይ ኔ ቦላ ኦሊዳ ናጋራ ጋሶን ሳሎይ ጎርዳቲን ኢራይ ቡኮንታ ኢጲኮ፡ ኢስቲ ሃይሳ ኬላኮ ሲሚ ኔ ሱንላ ጾይጊ ዋሲኮ፡ ኢስቲ ባንታ ናጋራ ሲሚኮ ኔኒ ኢስታ ዋሳ ሳሎን ዳሼ ሲያ።

36 ሂስታዳ ኔ አሽካራ ኢሰራኤል ዴራ ናጋራ አቶ ጋ፤ ኢስቲ ሄሜታናሰ ቤሲዛ ሎኦ ኦጌ ኢስታ ታማርሳ፤ ሄሳፌ ጉዬ ኔኒ ኔ ዴራ ላቲሲዳ ቢታን ኢራ ቡኪሳ።

37 «ቢታ ቦላን ኮሻይ ዋይኮ ኢታ ሃርጌይ፡ ዋይኮ ኩቱልኤይ ሾጪኮ ዋይኮ ቆይኮ፡ ዋይኮ ቦሌይ፡ ዋይኮ ጉምባርይ ቢታ ቦላን ዪኮ፡ ዋይኮ ሞርኬይ ኢስታ ካታማታ ዶዲኮ፡ ዋይኮ አይ ባሽካ ዋይኮ ሃርጌይ ዪኮ፡ *

38 ኔ ዴሬ ኢሰራኤል፤ ኦኒካ ባ ዋዚናን ኡንኤቲዳይሳ ኤሪዲ ባ ኩሼታ ሃ ጾሳ ኬላኮ ሚጪዲ ሾቢ ዋሲኮ፡

39 ኔኒ ኢስታ ዋሳ ሳሎን ዳሼ ሲያዳ ኢስታ ናጋራ አቶ ጋ፤ ሂስታዳ ኢስታሰ ኦላ፤ ኔኒ ጸላ አሳ ኡባ ዋዚና ኤሪዛ ጊሻሰ ኢዛዴ ኦሶ ኦሶ ማላ ኢዛሰ ኢማ።

40 ሂስቲኮ ኔኒ ኦ አዋታሰ ኢሚዳ ቢታን ዲዛ ዋዴ ኡባን ኢስቲ ኔሰ ያያና።

41 «ኔ ዴሬ ኢሰራኤል ጊዶንታይቲ ኔ ጌታ ሱንላ ጊሻሰ ሲዪዲ ሃሆ ቢታፌ ዪዳ ካሬ ዴሬ አሲ ዲኮ፡

42 አሳይ ሃሆ፤ ዪዛይ ኔ ጌታ ሱንላ ጊሻሰ፡ ኔ ሚኖ ቄሴ ጊሻሲኔ ሚጩቲዳ ኔ ኩሼ ጊሻሰ ሲዪዳ ጊሻሳ። ሂስቲኮ ሃይሳ ጾሳ ኬላን ዋሳናሲኔ ጎይናናሰ ዪኮ፡

43 ኔኒ ኔ ዲዛሶን ሳሎን ዳሼ ሲያ፤ ኔ አሳቲ ኢሰራኤልቲ ኤሪዛ ማላ ሳኦን ዲዛ አሳይ ኡባይ ኔ ሱንላ ኤራና ማላኔ ኔሰ ያያና ማላ፡ ቃሴ ታኒ ኬጲዳ ሃ ጾሳ ኬላይ ኔሰ ጎይኖሶ ጊዲዳይሳ ኢስቲ ኤራና ማላ፡ ሄ ካሬ ቢታ አሲ ኔና ዋሲዛይሳ ኢዛሰ ፖላ።

44 «ኔ ዴሬይ ባንታ ሞርኬታ ኦላና ማላ ኔኒ ከቲዳሶ አዋካ ቢዲ ኢስቲ ኔኒ ዶሪዳ ሃ ካታማን ታኒ ኔ ሱንላሰ ኬጲዳ ጾሳ ኬላኮ ሲሚዲ ኔና ጎዳ ዋሲኮ፡

45 ኔኒ ኢስታ ዋሳኔ ሾቤላ ሳሎን ዳሼ ሲያዳ ኢስታ ማዳ።

46 «ናጋራ ኦሶንታ አሲ ባይንዳ ጊሻሰ ኢስቲ ናጋራ ኦሊን ኔኒ ኢስታ ቦላ ሃንቄታዳ ሞርኬታሰ ኢስታ አላ ኢሚን ሞርኬቲካ ኢስታ ዲኢዲ ሃኮ ዋይኮ ማታ ጊዲን ባንታ ቢታ ኤኪ ኤፊን፡

* 8:37 ቆዮ ጊዛይሲ ኢሲ ኢሲ ባጋ ጋሞላ ቃላን ሆኖ ጌቱቲሰ።

47 ኢስቲ ባ ዲኤቲዳ ቢታን ዲሼ ባንታ ዋዚናን ናጋራፔ ሲሚኮ፤ ኢስቲ ሄን ዲኤቲ ቢዳ ዳሬን ዲሼ፤ ሓኒ ናጋራ ኦሊዶስ፤ ኔና ቆሂዶስ፤ ኢታ ሚሺካ ኦሊዶስ፤ ጊዲ ኔና ሾቢኮ፤

48 ባንታና ዲኤዲ ኤፊዳ ሞርኬታ ቢታን ዲሼ ኢስቲ ባንታ ኩሜላ ዋዚናፔኔ ባንታ ኩሜላ ሽምፖፌ ኔኮ ሲሚኮ፤ ኔኒ ኢስታ ኣዋታሰ ኢሚዳ ኢስታ ቢታኮ፤ ኔኒ ዶሪዳ ካታማይኮኔ ታኒ ኔ ሱንሳሰ ኬጺዳ ጸሳ ኬላኮ ሲሚዲ ኔና ዋሲኮ፤

49 ኔኒ ኢስታ ዋሳኔ ሾቤላ ሳሎን ዳሼ ሲያዳ ኢስታ ማዳ።

50 ኔ ዳሬይ ኦሊዳ ናጋራኔ ኔና ቆሂዳ ቆሆዛ ኣቶ ጋ፤ ኢስቲ ዲኤዲ ኤፊዳ ኣሳይ ኢስታሰ ቃዴታና ማላ ኦላ።

51 ጋሶይካ ኢስቲ ቢራታ ሴሪሲዛ ኢቱኔ ታማ ማላ ጊዲዳ ጊብጼ ቢታፌ ኔኒ ኔሰ ሻካ ኬሲዳ ኔ ዳሬታኔ ኔ ጸንጾታ።

52 «ታኒ ኔ ኣሽካራይኔ ኔ ዳሬ ኢስራኤሌይ ሾቢዛይሳ ኔ ኣይፌይ ጸሎ፤ ቃሴ ኢስቲ ዋሲዛ ዋዴ ኣይዴካ ኔኒ ኢስታ ዋሶ ኣላ።

53 ኣቤት ጎዳዉ፤ ታ ጸሳዉ! ኔኒ ኑ ኣዋታ ጊብጼፔ ኬሲዳ ዋዴ ኔ ኣሽካራ ሙሴ ባጋራ ዮቲዳ ማላ ኢስታ ኔኒ ሳኣን ዲዛ ካዋቲላታ ኡባ ጊዶፌ ኔሰ ጸንጾ ጊዳና ማላ ዱማሳዳሳ» ጊዲ ዋሲዳሰ።

ኩሻ ዋሳ

54 ሶሎሞኔይ ዋሳኔ ሾቤላ ጎዳኮ ሺሺዳፔ ጉዬ ባ ኩሼ ፑዴ ሳሎ ዴንሊዲ ያርሾ ያርሺዛሶ ሲንሳን ጉልባቲዳሶፔ ዴንዲ ኤቂዴሰ።

55 ኩሜላ ኢስራኤሌ ዱላታ ዳራ ኡባሰ ባ ቃላ ጶቁ ሂስቲዲ፤

56 «ኢዚ ካሴ ኢሚዳ ሂዶታ ቃላ ማላ ባ ዳሬ ኢስራኤሌሰ ሽምፖ ኢሚዳ ጎዳሰ ጋላታይ ጊዶ፤ ኢዚ ባ ኣሽካራ ሙሴ ባጋራ ኢሚዳ ሂዶታ ቃላ ኡባ ፖሊዴሰ።

57 ጎዳ ኑ ጸሳይ ካሴ ኑ ኣዋታራ ዲዛ ማላ ኑናራካ ዴኦ፤ ኢዚ ኑና ሙሊካ ኣጎፎ ዋይኮ ዬጎፎ።

58 ኑኒ ኢዛ ኦጌታ ኡባን ሄሜታና ማላኔ ኢዚ ኑ ኣዋታሰ ኢሚዳ ኣዛዘታ፤ ዋጋታኔ ማራታ ናጋና ማላ ኑ ዋዚና ባኮ ዛፎ።

59 ሃቕ ሃቕ ዴኦሰ ኮሺዛ ማላ፤ ጎዳይ ታና ባ ኣሽካራኔ ባ ዳራ ኢስራኤሌ ማዳና ማላ፤ ታኒ ጎዳ ሲንሳን ዋሳዳ ጊዳ ሃ ቃላቲ ቃማኔ ጋላሰ ጎዳ፤ ኑ ጸሳኮ ሺቁቶ።

60 ሄሲካ ሳኣን ዴኢዛ ኣሳይ ኡባይ ጸሲ ጸላ ጎዳ ጊዲዳይሳኔ ኢዛፔ ኣቲን ሃራ ጸሲ ባይንዳይሳ ኢስቲ ኤራና ማላሳ።

61 ሃቻይሳልካ ኢንቴ ኢዛ ዎጋን ዳና ማላኔ ኢዛ አዛዞታ ናጋና ማላ ጎዳሰ፥ ኑ ጸሳሰ ኢንቴ ዎዚናይ አማኔቲዛ ጊዶ» ጊ አንጂዴሰ።

ጸሳ ኬላዛ አንጂሶ
(2ታሪ 7:4-10)

62 ሄሳፌ ጉዬ ካዎዚኔ ኢሰራኤሌ አሳይ ኡባይ ኢሲፌ ጎዳ ሲንላን ያርሾ ያርሺዳ።

63 ሶሎሞኔይ ጎዳሰ ኢሲፌቲላ ያርሾ ያርሻናሰ 22,000 ቦራታኔ 120,000 ዶርሳታ ሺሺዴሰ። ሄሳሶ ኦሊዲ ካዎዚኔ ኢሰራኤሌ አሳይ ኡባይ ጎዳ ኬላ አንጂሲዳ።

64 ካዎ ሶሎሞኔይ ጸሳ ኬላሰ ሲንላ ባጋን ዴኢዛ ዴምባሰ ጊዶ አዳ ሄ ጋላሰ ዲማሲዴሰ። ሄን ጽጌቲዛ ያርሾ፥ ካላ ያርሾኔ ኢሲፌቲላ ያርሾፌ ሃንዳዛ ያርሺዴሰ። ኢዚ ሄሳ ኦሊዲይ ጎዳ ሲንላን ዴኢዛ ጸርቂማላፔ ኦሴቲዳ ያርሾ ያርሺዛ ሶሆይ ጽጌቲዛ ያርሾ፥ ካላ ያርሾኔ ኢሲፌቲላ ያርሾፌ ሃንዳዛ ያርሻናሰ ጉጺዳ ጊሻሳ።

65 ሄ ዎዴ ሶሎሞኔይኔ ኢሰራኤሌ አሳይ ኡባይ ላፑን ጋላሰ ዳሴ ባኣሌ ቦንቹዳ፤ ቃሴካ ሃራ ላፑን ጋላሰ ጉጂዲ ኢሲ ቦላ ታማን ኦይዱ ጋላሰ ቦንቹዳ፤ ኢሰራኤሌ ዛዋን ሃማቲ ፒኒዛ ፑርዴፌ ቢዲ ጊብጼ ሻፋ ጋካናሰ ዴኢዛ ጮራ አሳይ ጎዳ ኑ ጸሳ ሲንላን ባኣሌ ቦንቻናሰ ሺቂዴሰ።

66 ዎንቲላ ጋላሰ ካዎይ አሳ ሞይዚዴሰ፤ አሳይ ካዎዛ አንጂዲ ጎዳይ ባ ኣይሌ ዳዊቲሲኔ ባ አሳ ኢሰራኤሌሰ ኦሊዳ ኪያቲላን ዎዚናፔ ኡፋዬቲሼ ባሶ ባሶ ቢዴሰ።

9

ጎዳይ ሶሎሞኔሰ ናምኣንሶ ቆንጩላ
(2ታሪ 7:11-22)

1 ሶሎሞኔይ ጎዳ ኬሊኔ ካዎ ኬላ ኬጺ ጊጊዲ ባ ኦላናሰ አሞቲዳ አሞ ኡባ ፖሊዳፔ ጉዬ፥

2 ጌባኦኔ ካታማን ካሴ ቆንጪዳ ማላ ጎዳይ ናምኣንሶ ኢዛሰ ቆንጪዴሰ።

3 ሂሰቲዲ ጎዳይ ኢዛሰ፥ «ኔኒ ታ ሲንላን ዎሲዳ ዎሳኔ ሾቤላ ታኒ ሲያዲሰ፤ ኔኒ ኬጺዳ ጸሳ ኬላይ ሜርናሰ ታ ሱንላይ ኢዛን

ጸይጌታና ማላ ኦላዳ ታኒ ጌሻዲሰ፤ ታ አይፌይኔ ታ ዋዚናይ ኡባ ዋዴ ሃ ኬላን ዳና።

4 «ኔኒ ጌዲኮ ኔ አዋ ዳዊቲ ሲሜሬቲዳ ማላ ቦሬይ ባይንዳ ሱሬቲላን ታ ሲንላን ሲሜሬቲኮ፤ ታ አዛዙ ኡባ ኦሊኮኔ ታ ዋጋኔ ታ ማራ ኔ ናጊኮ፤

5 ታኒ ኔ አዋ ዳዊቲ፤ ለኢሰራኤል ካዎቲላ አራታን ኡቲዛ አሰ ኔኒ ሙሉካ ጳያካ፤ ጌዳ ማላ ኔ ካዎቲላ አራታ ኢሰራኤል ቦላ ማርናሰ ሚንላ ኤሳና።

6 «ጌዶ አቲን ኔኒ ዋይኮ ኔ ናይቲ ታና ካሎ አጊዲ ጉዬ ሲሚኮ፤ ታኒ አንቴና አዛዚዳ ታ አዛዘኔ ታ ዋጋ ናጎንታ አጊኮ፤ ሃራ ጸሳታሰ አላናሲኔ ጎይናናሰ ቢኮ፤

7 ኢሰራኤል ዴራ ካሴ ታኒ አሚዳ ቢታፌ ጾቃላና፤ ታኒ ታ ሱንላሰ ዱማሲዳ ሃ ጸሳ ኬላካ አጋጋና፤ ሄሳፌ ጉዬ ኢሰራኤል አሳይ ካዎቲላታ ኡባ ጌዶን ቂጼሲኔ ሚቻሰ አታና።

8 ሃይሲ ሃ ጸሳ ኬላይ ማላሊሲዛዝ ጌዲኮካ ላሌቲዲ ዶሬ ጌዳና፤ ቢዛይ ዪዛይ ወሪ ሚጪሼ፤ ሃሃና ፖራ! ጎዳይ ሃ ቢታኔ ሃይሳ ጸሳ ኬላ አይሰ ሃይሳሉ ኦሊዴ?» ጌ ቂጼና።

9 አሳይ፤ ለኢሰታ አዋታ ጌብጾፔ ኬሲዳ ጎዳ ባንታ ጸሳ አጊዲ ኢሰቲ ሃራ ጸሳታ ካሊዳ ጌሻሲኔ ኢሰታሰ ጎይኒዳ ጌሻሰ ጎዳይ ኢሰታ ቦላ ሃ ኢታ ሚሽ ኡባ ኤሂዴሰን ጌዲ ዛራና» ጌዴሰ።

ሶሎሞኔይ ኦሊዳ ሃራ ኦሶታ

(2ታሪ 8:1-18)

10 ሶሎሞኔይ ጸሳ ኬላኔ ካዎ ኬላ ኬዲ ጊጊዳ ናምኡ ታማንላ ላይላ ወርሴላን፤

11 ጸርሴ ካዎ ኪራሜይ ኢዛሰ ኮሺዛ ጸዳ፤ ዚጋኔ ዋርቃ ኡባ አሚዳ ጌሻሰ ጋሊላን ዲዛ ናምኡ ታሙ ካታማታ ሶሎሞኔይ ኢዛሰ አሚዴሰ።

12 ጌዶ አቲን ኪራሜይ ጸርሴ ካታማፔ ኬዚዲ ሶሎሞኔይ ኢዛሰ አሚዳ ካታማታ ቤአናሰ ቢዳ ዋዴ ኢዚ ካታማታን ኡፋዬቲቤና።

13 ሂሰቲን ኪራሜይ ሶሎሞኔ፤ «ታ አሻዉ! ሃይቲ ኔኒ ታሰ አሚዳይቲ አይ ካታማ?» ጌዴሰ። ሄሳ ጌሻሰ ኢዚ ሄ ካታማታ ካቡሌ ጌ ጸይጌዴሰ፤ ሄ ሄራይ ሃቕ ጋካናሰካ ሄ ሱንላን ጸይጌቲሰ። *

9:5 1ካዎ 2:4 9:8 2ካዎ 25:9፤ 2ታሪ 36:19

*

9:13 ካቡሌ ጉሲ

ኢብራዊታ ቃላራ ፓልንታዛ ዋይኮ ጎኡንታዛ ጉሳ

14 ኪራሜይ 4,000 ኪሎ ጊራሜ ዋርቃ ካዎ ሶሎሞኑስ ዩዲዲዳስ።

15 ጎዳ ጸሳ ኬላ፣ ባ ኬላ፣ ኬላ፣ ዩሩሳሌም ካታማ ጊምቤ፣ ሃጸሬ፣ ማጊዶኔ ጌዜሬ ካታማታ ጊምባናስ ካዎ ሶሎሞኑስ ጋባራቲ ዴቲስ።

16 ጊብጼ ካዎ ፓሮኔይ ካሴ ጌዜሬ ካታማ ቦላ ዳፋ ጋሊዲ ኦሊ ኦይኪዴስ፤ ሂስቲዲ ካታማ ታማን ጸጊዴስ፤ ኢዚን ዲዛ ካናኔ አሳ ዋዲዲ ሶሎሞኑ ጌሊዳ ባ ናይስ ዋይቶ ኢሚዴስ፤

17 ሶሎሞኔይካ ጌዜሬ ካታማ ዛሪ ኬጺዴስ።

ሂሳሶካ ቃሴ ሶሎሞኔይ ጋርሳ ቤቲ-ሆሮኔ፤

18 ባኦላቲ፣ ዩሁዳ ባዘን ዴኢዛ ታጺሞሬ ካታማ ኤሲዴስ፤

19 ሺንቄ ሚንጂ ዋሊዛ ካታማታ ኡባ፣ ባ ፓራታኔ ፓራ-ጋሬታ ዋሊዛ ካታማታኔ ዩሩሳሌምን፣ ሊባኖሴኒኔ ባ ሃሪዛ ቢታ ኡባን ኬጸናስ ኦሞቲዳ ኡባ ኬጺዴስ።

20 ኦሞሬታፔ፣ ሂቲታፔ፣ ፓሪዜታፔ፣ ሂዌታፔኔ ያቡሴታፔ ኦቲዳ ኦሳቲ ኡባይ ኢሰራኤሌ ኦሳቲ ጌዴቲና።

21 ኢስታ ኢሰራኤሌ ኦሳቲ ቢታፌ ዉርሲ ዳይሳናስ ዳንዳዮንታ ኦጊን ሄ ቢታን ኦቲዳ ኦሳታ ዜሬላታ፤ ሶሎሞኔይ ኢስታ ሻኪ ኦይሌሲዲ ጋባራቲላን ኦሲሲዴስ፤ ኢስቲ ሃቶ ጋካናስካ ኦይሌቲላን ኦፊቲስ።

22 ጊዶ ኦቲን ሶሎሞኔይ ኢሰራኤሌ ኦሳቲ ኦናካ ኦይሌቲላን ኦሲሲቤና፤ ኢስቲ ኢዛስ ኦሳንቻታ፣ ኦላንቻታ፣ ኦላንቻታ ሃላቃታኔ ጋዳዋታ፣ ፓራ-ጋሬታ ላጊዛይታ ሃላቃታኔ ፓራ ኦሳታ ጊዲዲ ኦሊዳ።

23 ሄይቲካ ሶሎሞኔይ ኬጺሲዛ ኬላ ካሌቲ ኬጺሲዛይታ፤ ኢስታስካ ቆዳይ ኢቻሽ ጾታኔ ኢቻሽ ታማ።

24 ጊብጼ ካዎ ናዖ ዳዊቲ ካታማፔ ሶሎሞኔይ ኢዚስ ኬጺሲዳ ኬላ ፑዴ ቢዳፔ ጉዬ ሶሎሞኔይ ኢዚስ ኬላ ኬሊዴስ።

25 ሶሎሞኔይ ጎዳስ ኦሲሲዳ ያርሾሳዛ ቦላ ጸጌቲዛ ያርሾኔ ኢሲፌቲላ ያርሾ ላይላን ሄቹቶ ያርሾሴስ፤ ጎዳ ሲንላን ኤጸኔካ ጨዋሴስ፤ ሂስቲዲ ጸሳ ኬላ ኦሶ ፖሊዴስ።

26 ሂሳፌ ጉዬ ካዎ ሶሎሞኔይ ኤዶሜ ቢታን ዘኦ ኦባ ዶናን ኤላቲ ጌቲቲዛ ካታማ ማታን ዲዛ ኤጺዮን-ጋቢሬን ማርካቤታ ሚዲዴስ።

27 ካዎ ኪራሜይ ሶሎሞኑ ኦሳታራ ኦላና ማላ ማርካቤ ላጎን ሎሂዳ ባ ኦሳታ ከቲዴስ።

28 ሂስቲን ኢስቲ ኦፊሬ ቢታ ቢዲ 14,000 ኪሎ ጊራሜፔ ዳሪዛ ዋርቃ ካዎ ሶሎሞኔስ ኤኪ ዪዳ።

10

ሳባ ካዎዮ

(2ታሪ 9:1-12)

1 ሳባ ካዎያ ጎዳይ ሶሎሞኔስ ኢሚዳ አጽ ኤራቴላ ሲያዳ ዳጾ ኦይሻታ ኤካዳ ኢዛ ፓጫናስ ያዱሰ።

2 ጌታ አዛባን ሺቶ፥ ኬሂ ዳሮ ዋርቃኔ አልኦ ሹቻ ዳሮ ጋሜላታን ጫናዳ ዩሩሳላሚ ጋኪዳፔ ጉዬ ሶሎሞኔስ ጌላዳ ባ ዋዚናን ዲዛ ኦይሻ ኡባ ሺሻዱሰ።

3 ሶሎሞኔይ ኢዛ ኦይቺዳይሳ ኡባ ዛሪዳስ፤ ኢዚሰ ቢርሼቶንታ ኢዛፔ ጌሚ አቲዳይ አይኮይካ ባ።

4 ሳባ ካዎያ ሶሎሞኔስ ኢሚቲዳ አጽ ኤራቴላ፥ ኢዚ ኬጺዳ ካዎቴላ ኬላ።

5 ኢዛ ማዳን ሸቂዛ ቁማ፥ ኢዛ ሹሜቲ ኡቲዛ ኡቴላ፥ ኢዛ አሽካራቲ ኦሊዛ ኦሶኔ ማይኢዛ ማይኦ፥ ኢዛሰ ኡሹ ዱቂዛይታኔ ጎዳ ኬላን ኢዚ ሺሺዛ ጸጌቲዛ ያርሾዛ ቤኣዳ ኬሃ ማላሌታዱሰ።

6 ሄሳፌ ጉዬ ኢዛ ካዎዛሰ፥ «ኔ ኦሊዛ ኦሶኔ ኔ አጽ ኤራቴላ ጊሻሰ ታኒ ታ ዳሬን ዳሼ ሲዪዳይሲ ቱማ።

7 ጊዶ አቲን ታኒ ያዳ ታ አይፌን ቤኣናሼ ጋካናስ ኢስቲ ታሰ ዮቲዳይሳ አማናቤኬ፤ ታሰ አሳይ ዮቲዳይሲ ታ ቤኢዳይሳሰ ባጋ ጊዳና፤ ኔ አጽ ኤራቴላይኔ ዱሬቴሊ ታ ሲዪዳይሳፌ ቦላ።

8 ኡባ ዋዳ ኔ ሲንሳን ኤቂዱ ኔ አጽ ኤራቴላ ሲዪዛ ሹሜታሲኔ ኔ ኦሳንቻታሰ ቃዳይ አይ ማላ ሎኦ!

9 ኔናን ኡፋዬቲዱ ኔና ኢሰራኤሌ ካዎታ ኣራታን ኡቲሲዳ ጎዳ ኔ ጸሳይ ጋላቴቶ! ጎዳይ ኢሰራኤሌ ኣሳ ሜርናስ ሲቂዳ ጊሻሰ ሱሬ ፒርዳይኔ ጸሎቴሊ ዳና ማላ ኢዚ ኔና ካዎሊዳስ» ጋዱሰ።

10 ሂስታዳ ካዎያ 4,000 ኪሎ ጊራሜ ዳጺዛ ዋርቃ፥ ኬሂ ዳሮ ሺቶኔ አልኦ ሹቻ ካዎዛሰ ኢማዱሰ። ሳባ ካዎያ ካዎ ሶሎሞኔስ ኢሚዳይሳ ኬና ዳሮ ሺቶ ሄሳፌ ሲሚን ኦኒካ ኤሂቤና።

11 (ካዎ ኪራሜ ማርካቤቲ፥ ኦፊሬፔ ዋርቃ ኤሂዳይቲ ሄፔ ሳንዳሌ ጌቲቲዛ ኬሂ ዳሮ ሚሊኔ አልኦ ሹቻ ኤሂዳ።

12 ካዎ ሶሎሞን ይህ ሳንዳሌዛፔ ጎዳ ከላሲኔ ካዎ ከላሲ ቱቄታ፡ ዩዲዛይታሰ ዲሊኔ ማሲንቆ ሜዲሲዴስ። ሄሳ ማላ ሳንዳሌ ይህ ጋላሳፊ ሃ ሲሚን ዩ ኤሬና፤ በቲካ ኤሬና።)

13 ካዎ ሶሎሞን ካዎ ደህንናሰ በሲዛ ኢሞታፔ ሃራ፡ ሳባ ካዎን ኣሞታዳ ኢዛ ኮዩዲይሳኔ ኦይቺዲይሳ ኡባ ኢዚሰ ኢሚዴስ፤ ሄሳፊ ጉዬ ሳባ ካዎን ባ ኣዡባራ ዴንዳዳ ባ ዴሬ ሲማዴስ።

ሶሎሞን ዲዛ ኣቆታ (2ታሪ 9:13-28)

14 ሶሎሞን ዳይላን ላይላን ኤኪዛ ዋርቃይ 23,000 ኪሎ ጊራሜ ኬና ጊዴስ።

15 ሄሲካ ቃራጸፔ፡ ዛልኤን ጌሊዛ ዋጄፔ፡ ኣራቤ ቢታ ካዎታ ኡባፊኔ ኢሰራኤል ቢታ ሃሪዛይታፔ ኤኪዳ ጊራ ጉጃና።

16 ሶሎሞን 200 ዋጋ ጎንዳሌታ ኦሲሲዴስ፤ ኢሲ ኢሲ ጎንዳሌ ዳፑን ኪሎ ጊራሜ ጊዲዛ ዋርቃን ሚሺሲዴስ።

17 ቃሴካ ኢዚ 300 ቄሪ ጎንዳሌታ ኦሲሲዴስ፤ ኢሲ ኢሲ ጎንዳሌ ናሞኡ ኪሎ ጊራሜ ጊዲዛ ዋርቃን ሚሺሲዴስ፤ ካዎይ ሄ ጎንዳሌታ ሊባኖሴ ዋራ ጌቲቲዛ ከላን ዋሊዴስ።

18 ቃሴካ ካዎይ ጌታ ኣራታ ዳንጋርሳ ዛሌፔ ኦሲሲዲ ሙሩታ ዋርቃን ሚሺዴስ።

19 ሄ ኣራታይ ዲዛሶ ፑዴ ኬዛናሰ ኡሱፑን ጄካቲ ዴቲስ፤ ሄ ኣራታይ ጉዬ ሁኤሶ ባጋራ ኤቭ ሚሳቲስ፤ ኣራታሰ ናሞኡ ባጋራካ ቄሴ ዜምፒሲዛሶቲ ዴቲስ፤ ሄ ዜምፒዛሶታ ሚሊን ጋሞ ሚሰሌ ናሞኣቲ ኤቂዳ።

20 ኡሱፑን ጄካታሰ ሃዲርሳ ባጋራኔ ኡቫቻ ባጋራ ኡሱፑን ኡሱፑን ጋሞ ሚሰሌቲ ኤቂዳ፤ ሙሊራ 12 ሚሰሌቲ ዴቲስ፤ ሃይሳ ማላ ኣራታይ ሃራ ኣዋ ዴሬ ካዎታንካ ኦሴቲቤና።

21 ካዎ ሶሎሞን ኡሹ ኡዩዛ ዋንጫ ኡባይ ዋርቃፌ ኦሴቲዴስ፤ ሊባኖሴ ዋራ ጌቲቲዛ ካዎ ከላን ዲዛ ሚሺ ኡባይካ ሙሩታ ዋርቃፌ ኦሴቲዴስ፤ ካዎ ሶሎሞን ዋዴን ቢራይ ሂራይሶ ጊዲዳ ጊቫሰ ቢራፔ ኦሴቲዳ ሚሺ ሙሊካ ዴና።

22 ካዎ ሶሎሞን ኪራሜ ማርካቤታራ ኢሲፊ ዋጋ ጌታ ኣባ ቦላራ ቢዛ ታርሴሴ ዛልኤ ማርካቤቲ ዴቲስ፤ ሄ ማርካቤቲ ዋርቃ፡ ቢራ፡ ዳንጋርሳ ዛሌ፡ ጌሌሾታኔ ቃሬታ ጫኒ ኤኪዲ ሄቭ ላይላን ላይላን ኢሲቶ ኤሄቲስ።

23 ካዎ ሶሎሞን ዱሬቴላኒኔ ኣቶ ኤራቴላን ቢታ ቦላ ዲዛ ካዎታ ኡባፊ ኣጄስ።

24 ቢታ ቦላ ዲዛ አሳይ ኡባይ ጸሲ ሶሎሞኔ ወዚናን ዋሊዳ አጽ ኤራቴላ ሲያናሰ ኢዛኮ ያና ኮዬቴሰ።

25 ላይላን ላይላን ኢዛኮ ዪዛ አሲ ኡባይ ቢራቴኔ ዋርቃፌ ኦሴቲዳ ሚሸ፣ ማይኦ፣ ኦላ ሚሸ፣ ሺቶ፣ ፓራታኔ ባቁሎታ ኢዛሰ ኢሞታ ኤኪ ዬሰ።

26 ሶሎሞኔይ ፓራ-ጋሬታኔ ፓራታ ሺሺዴሰ፤ ኢዛሰ 1,400 ፓራ-ጋሬታኔ 12,000 ፓራቲ ዴቴሰ፤ ኢዚ ኢሰታ ፓራ-ጋሬታ ካታማታኔኔ ባናራ ዬሩሳላሚን ዋሊዴሰ።

27 ካዎይ ዬሩሳላሚን ቢራይ ሹቻሉ ኮሬታና ማላ፣ ዚጋይካ ሻራ ሜንጾን ሞኪዛ ኤላሉ ጮራታና ማላ ኦሊዴሰ።

28 ሶሎሞኔ ፓራቲ ገብጾቴኔ ቃዌቴ ዱዳ፤ ካዎ ዛልኣንቻቲ ኢሰታ ቃዌቴ ሻሚ ሻሚ ኤሄቴሰ።

29 ኢሰቲ ኢሲ ኢሲ ፓራ-ጋሬ 600 ሳቁሌ ቢራን፣ ኢሲ ኢሲ ፓራ 150 ሳቁሌ ቢራን ገብጾቴ ሻሚ ሻሚ ኤሄቴሰ፤ ሂሰቲዲ ሂቴ ካዎታሲኔ አራሜ ካዎታሰ ኤፊ ባይዜቴሰ።

11

ሶሎሞኔይ ኦሊዳ ሞሮ

1 ካዎ ሶሎሞኔይ ዳር አላጋ ቢታ ማጫሳታ ሲቂዴሰ፤ ሄይቲካ ገብጾ ካዎ ቢዬይ ቦላ ጉጂን ሞኣቤ ማጫሳታ፣ አሞኔ ማጫሳታ፣ ኤዶሜ ማጫሳታ፣ ሲዶና ማጫሳታኔ ሂቴ ዴሬ ማጫሳታ።

2 ጎዳይ ኢሰራኤሌ አሳሰ፣ «ኢሰቲ ኢንቴ ወዚና ቱማቴ ባንታ ኤቃ ጸሳታኮ ዛርንታ ማላ ኢንቴ ሄ አሳታራ ኤኮኔኔ ጌሎን ዋላኬቶፍቴ» ገ ዮቲ ዋሊዴሰ፤ ገዶ አቲን ሶሎሞኔይ ኢሰታራ ሲቆን ዋጾቲዴሰ።

3 ሶሎሞኔሰ ካዎታቴ ዬሌቲዳ 700 ማቹቲኔ 300 ላጌሶቲ ዴቴሰ፤ ሄ ማጫሳቲ ኢዛ ወዚናይ ጸሳ ዋጋቴ ካሬ ኬዛና ማላ ኦሊዳ።

4 ሶሎሞኔይ ጨሚ ጨሚ ቢሸን ኢዛ ማቹቲ ኢዛ ወዚና ሃራ ጸሳታኮ ዛሪዳ፤ ሂሰቲን ኢዛ አዋ ዳዊቲ ኩሜላ ወዚናቴ ጎዳ ባ ጸሳ ሲቂዳ ማላ ኢዚ ሲቂቤና።

5 ሶሎሞኔይ ኣሰታሮቲ ጌቲቲዛ ሲዶናታ ኤቃ ጸሳይሲኔ ሃራሲዛ አሞኔታ ጸሳ ሞሎኬሰ ጎይኒዴሰ።

6 ሂሰቲዲ ሶሎሞኔይ ጎዳ ሲንላን ኢታ ኦሶ ኦሊዴሰ፤ ባ አዋ ዳዊቲ ማላ ዉርሴል ጋካናሰ ጎዳ ካሊቤና።

7 ሄሳፌ ጉዬ ሶሎሞኔይ ሃራሲዛ ሞክቤታ ጸሳ ካሞሽሲኔ አሞኔታ ጸሳ ሞሎኬስ ዬሩሳላሜ፤ ኣርሼይ ሞኪዛ ባጋን ዲዛ ዙሞቡላታ ቦላ ጎይኒዛሶታ ገግሲዴስ።

8 ኢስቲ ባንታ ኤቃ ጸሳታስ ሄን ኤጻኔ ጨዋሲዛይታሲኔ ያርሾ ሺሺዛ ሃራ ማቼታሰካ ሄሳሐካ ኦሊዴስ።

9 ኢዛስ ናሞኡቶ ቆንጨዳ ጎዳ ኢስራኤሌ ጸሳፌ ሶሎሞኔ ዎዚናይ ሃራሶ ሲሚዳ ገሻስ ጎዳይ ኢዛ ቦላ ሃንቄቲዴስ።

10 ሃራ ጸሳታ ካሎንታ ማላ ጎዳይ ሶሎሞኔ ኣዛዚዴስ፤ ኢዚ ጎዳ ኣዛዘ ናጊቤና።

11 ሄሳ ገሻስ ጎዳይ ሶሎሞኔስ፤ «ኔ ሃይሳ ኦሊዳ ገሻስ፤ ታ ኢሚዳ ጫቆ ቃላኔ ታ ኢሚዳ ማራ ኔኒ ናንንታ ኢጲዳ ገሻስ፤ ታኒ ኔ ካዎቴላ ኔፔ ዎላ ኤካዳ ኔ ኣይሌታፔ ኢሳስ ኢማና።

12 ገዲኮካ ኔ ኣዎ ዳዊቴ ገሻስ ጋዳ ኔ ካዎቴላ ላይላን ገደንታ ኔ ናዛ ካዎቴላ ላይላን ታኒ ሃይሳ ኦላና።

13 ኔ ናዛፔ ገዲኮካ ካዎቴላ ኢዛፔ ሙሌራ ዎላ ኤኪኬ፤ ታ ኣሸካራ ዳዊቴ ገሻሲኔ ታኒ ዶሪዳ ካታማ ዬሩሳላሜ ገሻስ ኢሲ ቆሞ ታ ኢዛስ ኢማና» ገዴስ።

ሶሎሞኔ ቦላ ዴንዲዳ ሞርኬታ

14 ሄሳፌ ጉዬ ጎዳይ ኤዶሜ ካዎታ ዛሬፔ ሃዳዴ ሞርኬ ሂስቲ ሶሎሞኔ ቦላ ዴንሊዴስ።

15 ሃይሳፌ ካሴ ዳዊቲ ኤዶሜ ኣሳታራ ኦሌቲዳ ዎዴ ሃይቂዳይታ ሞጊሳናስ ፑዴ ቢዳ ኦላ ጋዳዎ ኢዮኣቤይ፤ ኤዶሜን ዲዛ ኣቱማሳ ኡባ ዎጲ ዉርሲዴስ።

16 ኤዶሜን ዲዛ ኣቱማሳ ኡባ ጳይሳና ጋካናስ ኢዮኣቤይኔ ኢስራኤሌ ኣሳይ ኡባይ ሄን ኡሱፑን ኣጊና ኡቲዴስ።

17 ገዶ ኣቲን ሄ ዎዴ ሃዳዴይ ዬላጋቴላን ዲሼ ባ ኣዋስ ኦሊዛ ኤዶሜ ኦሳንቻታፔ ጉላታራ ገብጾ ቢታ ባቃቲዴስ።

18 ኢስቲ ሚዲያሚፔ ዴንዲዲ ፓራኔ ቢታ ቢዳ፤ ፓራኔፔ ባንታናራ ኣሳ ኤኪዲ ገብጾ ካዎ ፓሮኔኮ ቢዳ። ካዎዚ ሃዳዴስ ኬሊኔ ጋዴ ኢሚዴስ፤ ማና ካሊካ ኣዛዚዴስ።

19 ካዎ ፓሮኔይ ሃዳዴ ኬሂ ዶሲዳ ገሻስ ባ ማቾ ጳፊኔሲ ሚቼዮ ኢዛስ ማቾ ኢሚዴስ።

20 ጳፊኔሲ ሚቼያ ኢዛስ ጋኑባቲ ጌቴቲዛ ና ዬላዲስ፤ ጳፊኔሲ ኢዛ ካዎ ኬላን ዲቻዲስ፤ ጋኑባቲይ ሄን ካዎ ናይታራ ኢሲፌ ዲጨዴስ።

21 ሃዳዴይ ገብጸን ዲሼ ዳዊቲ ሃይቂ ባ አዋታን ጋይቲዳይሳኔ ኦላ ጋዳዋ ኢዮኣቤይካ ሃይቂዳይሳ ሲዪዴሰ፤ ሂሰቲዲ ሃዳዴይ ካዋዛሰ፡ «ታኒ ታ ቢታ ሲማና ማላ ታና ዬዳ» ገዴሰ።

22 ካዋይ ኢዛ፡ «ኔሰ ሃይሳን ኣዚ ፓጪን ኔኒ ኔ ቢታ ሲማ ባና ኮያይ?» ገዲ ኦይቺዴሰ።

ሂሰቲን ሃዳዴይ፡ «ታሰ ኣይኮይካ ፓጪቤና፤ ገዲኮካ ታኒ ባና ማላ ታሰ ኤሮ ጋርኪ!» ገዴሰ።

23 ሂሳሶካ ጸሳይ ጸባ ካዋ ሃዳዲኤዜሬፔ ባቃቲ ቢዳ ኤልኣዳ ና ኤራዞኔ ጌቲቲዛይሳ ሶሎሞኔ ቦላ ሞርኬ ሂሰቲ ዴንሒዴሰ።

24 ዳዊቲ ጸባ ቢታ ኦላንቻታ ቆይሲዳ ዋዴ ኤራዞኔይ ባቃቲዳ ኣሳ ሺሺዲ ፓንጋታ ሃላቃ ገዲዴሰ፤ ኢሰቲ ዳማሰቆ ቢዲ ሄን ኢዛ ካዋሒዳ።

25 ሃዳዴይ ጋሒዳ ሜቶዛ ቦላ ጉጂዲ ሶሎሞኔይ ዴኢዳ ላይሰ ኡባን ኤራዞኔይ ኢሰራኤሌታሰ ሞርኬ ገዲዴሰ፤ ኤራዞኔይ ኣራሜን ካዋቲዲ ኢሰራኤሌታራ ኤቂቲዴሰ።

ሶሎሞኔ ቦላ ኢዮርባኣሜይ ማካሊዳ ማካላ

26 ቃሴካ ናባጼ ና ኢዮርባኣሜይ ሶሎሞኔ ቦላ ማካላቲላን ዴንዲዴሰ፤ ኢዚ ሶሎሞኔ ሹሜታፔ ኢሳ ገዲሺን ኤፍሬሜ ቢታ ጸሬዴፔ ዪዴሰ፤ ኢዛ ኣዬያ ጸሩኦ ጌቲቲዛ አምኤዮ።

27 ኢዚ ካዋ ቦላ ማካላቲላን ዴንዲዳ ጋሶይካ ሶሎሞኔይ ገምቤሰ ኬላ ኬሊሲዴሰኔ ባ አዋ ዳዊቲ ካታማ ዩሽን ዲዛ ገምቤዛሰ ፓጪሶ ኩንሒዴሰ።

28 ኢዮርባኣሜይ ኦሶዛሰ ኬሂ ሂላቲሒ ዲዛ ናቴላ ኣሳ፤ ሶሎሞኔይ ሃ ናቴላዚ ኦሶዛ ኣይ ማላ ኦሒዛኮ ቤኢዲ ጋባራ ኦሒ ኣቂዛ ዮሴፌ ቆሞታ ቦላ ኣላፌ ኦሒ ሹሚዴሰ።

29 ኢሲ ጋላሲ ኢዮርባኣሜይ ዬሩሳላሜ ካታማፔ ቢሺን ሴሎፔ ዪዳ ናቤ ኣካያይ ኢዛራ ኦጌን ጋይቲዴሰ። ሄ ዋዴ ኣካያይ ኦራላ ማይኦ ማይኢ ኡቲዴሰ። ሄ ሶሆዛን ኢሰቲ ናምኣይ ጸላ ዴቴሰ።

30 ኣካያይ ባ ማይኢዳ ሴሎ ማይኦዛ ታማኔ ናምኡ ኬሲ ፖሺ ዩገዴሰ።

31 ሂሰቲዲ ኢዮርባኣሜሰ፡ «ሃይታ ፖሹቲዳ ታማታ ኔሰ ኤካ። ጋሶይካ ጎዳ ኢሰራኤሌ ጸሳይ፡ ሳኦኦ፡ ታኒ ካዋቲላ ሶሎሞኔ ኩሺፔ ፖሻዳ ታሙ ቆሞታ ኔሰ አማና።

32 ገዶ ኣቲን ታ አሽካራ ዳዊቲ ገሻሲኔ ኢሰራኤሌ ቆሞታ ኡባ ገዶፌ ታኒ ዶሪዳ ዬሩሳላሜ ካታማ ገሻሰ ኢሲ ቆሞ ኢዛሰ ኣጋና።

33 ታ ሃይሳ ኦፋናስ ጋሶይካ ሶሎሞኔይ ታና ኣጊዲ ሲዶናታ ጸስ ኣስታሮቲስ፥ ሞኣቤታ ጸስ ካሞሼሲኔ ኣሞኔታ ጸስ ሞሎኬስ ጎይኒዳ ጊሻሳ፤ ቃሴካ ታ ኦጌን ሄሜቶንታ፥ ታ ሲንፋን ሱሬ ኦሶ ኦፋንታ ኣጊዲ ኢዛ ኣዋ ዳዊቲ ናጊዳ ማላ ታ ዋጋታኔ ማራታ ናጎንታ ኢጲዳ ጊሻሳ።

34 « ሪዲኮካ ታኒ ካዎቲፋ ሶሎሞኔ ኩሼፔ ኡባ ኤኪኬ፤ ታኒ ኢዛ ዶሪዳ ጊሻሲኔ ታ ኣዛዞኔ ታ ዋጋ ናጊዳ ታ ኣሽካራ ዳዊቲ ጊሻስ ሶሎሞኔይ ሸምፖራ ፓጻ ዴኢዳ ዋዴ ኡባን ኢዚ ሃራና ማላ ኦፋዲስ።

35 ሄሳፌ ጉዬ ታኒ ካዎቲፋ ኢዛ ናዛ ኩሼፔ ዋፋ ኤካዳ ታሙ ቆሞታ ኔስ ኢማና።

36 ታ ሱንሊ ኢዛን ጴይጌታና ማላ ታ ዶሪዳ ዬሩሳላሜ ካታማን ኡባ ዋዴካ ታ ኣሽካራ ዳዊቲ ዛሬይ ፖኦ ጊዳና ማላ ታኒ ኢሲ ቆሞ ኢዛ ናዛስ ኢማና።

37 « ሪዶ ኣቲን ኔና ታኒ ታስ ኤካና፤ ኔ ዋዚናይ ኣሞቲዳ ኡባ ኔ ሃራና፤ ኢሰራኤሌ ቦላካ ኔ ካዎታና።

38 ታ ኣይሌ ዳዊቲ ኦሲዳ ማላ ታ ኣዛዞታ ኡባ ኔ ፖሊኮ፥ ታ ኦጌን ኔ ሄሜቲኮ፥ ታ ዋጋታኔ ማራታ ኔ ናጊኮ ታ ሲንፋን ሱሬ ሃንኮ ታኒ ኔና ጊዳና፤ ታ ዳዊቲስ ኦሲዳ ማላ ኔ ካዎቲፋካ ሚንፋና። ኢሰራኤሌካ ታኒ ኔስ ኢማና።

39 ሶሎሞኔ ናጋራ ጊሻስ ዳዊቲ ዜሬፋታ ታኒ ቃጻያና፤ ጊዶ ኣቲን ሜርናስ ጊዳና፤ ጌስ» ጊዳስ።

40 ሄሳ ጊሻስ ሶሎሞኔይ ኢዮርባኣሜ ዋፋናስ ኮዪዳስ፤ ጊዶ ኣቲን ኢዮርባኣሜይ ጊብጼ ካዎ ሺሻቄኮ ባቃቲ ቢዲ ሶሎሞኔይ ሃይቃና ጋካናስ ጊብጼን ታኪዳስ።

ሶሎሞኔ ሃይቆ

(2ታሪ 9:29-31)

41 ሶሎሞኔይ ሃኒዳ ሃራይ፥ ኢዚ ኦሲዳ ኡባይ፥ ኢዛስ ኣጵ ኤራቲፋይ ሶሎሞኔ ታሪኬ ማጻፋን ጳፌቲ ኡቲዳስ።

42 ሶሎሞኔይ ኢሰራኤሌ ኡባ ቦላ ዬሩሳላሜን 40 ላይፊ ካዎቲዳስ።

43 ሄሳፌ ጉዬ ሶሎሞኔይ ሃይቂዲ ባ ኣዋታን ጋይቲዳስ፤ ባ ኣዋ ዳዊቲ ካታማንካ ሞጌቲዳስ። ኢዛ ና ኤርቢኣሜይ ኢዛሶሆን ካዎቲዳስ።

12

ኢስራኤል ቆሞ ታማታ ማካላቴል

(2ታሪ 10:1-19)

¹ ኢስራኤል አሳይ ኡባይ ኤርቢአሜ ካዎፋናስ ሴኬሜ ቢዳ ገሻስ ኢዚካ ሄ ቢዴስ።

² ካዎ ሶሎሞን፤ ባቃቲዲ ገብጾን ዴኢዛ ናባጼ ና ኢዮርባአሜይ ሄሳ ሲዱዲ ገብጾ፤ ሲሚ ዪዴስ።

³ ሂስቲን ኢስራኤል አሳይ ኢዮርባአሜስ ከታ ዬዲ ጸይጊሲን ኢዚኔ ኢስራኤል ማባራይ ኡባይ ኤርቢአሜኮ ቢዲ።

⁴ «ኔ አዋይ ኑና ዴጾ ቃምባራ ቶሲዴስ፤ ጊዳ ኣቲን ሃኢ ኔኒ ኢዚ ኑና ኦሲሲዛ ዎልቃማ ኦሶኔ ዴጾ ቃምባራ ኑስ ካዉሻርኪ! ሂስቲኮ ኑኒ ኔስ ሃሬታና» ጊዳ።

⁵ ሂስቲን ኤርቢአሜይ ኢስታስ፡ «ቢቴ፤ ቢዲ ሄሻንሶ ጋላስ ሲሚዲ ታኮ ዪቴ» ጊን አሳይ ቢዴስ።

⁶ ሄሳፌ ጉዬ ካዎ ኤርቢአሜይ ኢዛ አዋ ሶሎሞን፤ ሼምፖራ ፓጻ ዲዛ ዎዴ ሶሎሞን፤ ዘሪዛ ጨማታ ዘሬ ኦይቺዴስ። ኢዚ ኢስታስ፡ «ሃ አሳስ ኣይ ጋዳ ዛራ ጌቲ?» ጊ ኦይቺዴስ።

⁷ ሂስቲን ጨማቲ ኤርቢአሜ፡ «ሃች ኔኒ አሳስ ኣይሌ ጊዳዳ ኦሊኮ፡ ኢስቲ ኦይቺዛይሳስ ኔኒ ሎኦ ቃላ ዛሪኮ፡ ኡባ ዎዴ ኢስቲ ኔስ ኣሽካራ ጊዳና» ጊዳ።

⁸ ጊዳ ኣቲን ኤርቢአሜይ ጨማቲ ዘሪዳ ዘሬዛ ኣጊዲ ኢዛራ ዲጨዲ ኢዛስ ኦሊዛ ዬላጋ አሳታ ዘሬ ኦይቺዴስ።

⁹ ኢዚ ኢስታስ፡ «ኢንቴ ታና ኣይ ዘሬቲ? ነኔ አዋይ ኑና ቶሲዳ ዴጾ ቃምባራ ኑስ ካዉሻርኪ» ጊዛ ሃ ዴሬዛስ ኣይ ጋዳ ዛር?» ጊ ኦይቺዴስ።

¹⁰ ኢዛራ ዲጨዳ ዬላጋቲ፡ « ነኔ አዋይ ኑና ዴጾ ቃምባራ ቶሲዴስ፤ ሃኢ ጊዲኮ ኔኒ ኑስ ካዉሻርኪ» ጊዛ አሳስ፡ «ታ ገልኢ ቢራዴይ ታ አዋ ጸሳፌ ኑርዴስ።

¹¹ ታ አዋይ ኢንቴ ቦላ ዴጾ ቃምባራ ዎሊዴስ፤ ታኒ ጊዲኮ ሄሳፌካ ኣላዳ ዴጾፋና። ታ አዋይ ኢንቴና ሊሶን ዎዲዴስ፤ ታኒ ጊዲኮ ኢንቴና ማሲማሶ ማላ ዲኪዛ ሊሶን ዎዳና» ጋዳ ዛራ» ጊዳ።

¹² ሄሳፌ ጉዬ ካዎ ኤርቢአሜይ፡ «ሄሻንሶ ጋላስ ሲሚዲ ታኮ ዪቴ» ጊዳ ማላካ፡ ኢዮርባአሜይኔ ኡባ አሳይ ሄሻንሶ ጋላስ ሲሚ ዪዳ።

¹³ ሂስቲን ካዎይ ጨማታ ዘሬ ኢዲዲ ዴራ ሃንቄሊዛ ዛር ኢሚዴስ።

14 ዩላጋታ ዘሬ ኤኪዲ፥ «ታ አዋይ እንቲ ቦላ ዴጾ ቃምባራ ዋሊዳሰ፤ ታኒ ጊዲኮ ሄሳፊካ አላ ዴጾፋና። ታ አዋይ እንቲና ሊሶን ዋዲዳሰ፤ ታኒ ጊዲኮ እንቲና ማሲማሶ ማላ ዲኪዛ ሊሶን ዋዲና» ጊ ዛሪዳሰ።

15 ካዋይ አሳይ ጊዛይሳ ሲዮንታ እዲዳሰ፤ ጋሶይካ ጎዳይ ሴሎፔ ዪዳ ናቤ አካያ ሳጋራ ካሴ ናባጼ ና ኢዮርባኣሜሰ ዮቲዳ ቃላይ ፖሌታና ማላ ሃይሲ ጎዳፔ ሃኒዳሰ።

16 ኢሰራኤል አሳይ ኡባይ ካዋይ ኢሰቲ ጊዛይሳ ሲዮንታ እዲዳይሳ ኤሪዲ ካዋዛሰ፥ «ዳዊቲራ ኑና ጋሊዛ ጋሶይካ አዜ? ኢሴዬ ናዛፔ ኑ አይ አካኔ! ኢሰራኤል አሳዉ! እንቲ ሶ እንቲ ሶ ሰሚቲ! ሃኢ ጊዲኮ ዳዊቲ ኔ ኩላ ኔ ናጋ!» ጊዳ። ሂሰቲዲ ኢሰራኤል አሳይ ኡባይ ባንታ ሶ ባንታ ሶ ሰሚዳ።

17 ኤርቢኣሜይካ ዩሁዳ ካታማታን ዲዛ ኢሰራኤል አሳ ቦላ ካዋቲዳሰ።

18 ሄሳፊ ጉዬ ካዋ ኤርቢኣሜይ ባ ጋባራታ ሃላቃ አዶራሜ ኢሰራኤል አሳኮ ከቲን ኢሰቲ ሹቻን ጫዲ ዋዲዳ። ሂሰቲን ካዋ ኤርቢኣሜይ ባ ፓራ-ጋሪ ቦላ ኤሶን ኬዚ ኡቲዲ ዬሩሳላሜ ባቃቲዳሰ።

19 ሄዴፔ ዶሚዲ ሃቕ ጋካናሰ ኢሰራኤል ቆዋታፔ ታማቲ ዳዊቲ ዛሬፔ ካዋቲዳ ካዋታ ቦላ ማካሊዳ።

20 ኢዮርባኣሜይ ጊብጾፔ ሰሚዳይሳ ኢሰራኤል አሳይ ኡባይ ሲዩዲ ኢዛ ባንታ ዱላታኮ ጾይጊሲዲ ኢሰራኤል ቦላ ካዋሊዳ፤ ዳዊቲ ዛሬፔ ካዋቲዳ ካዋታሰ አማኔቲዲ አቲዳይ ዩሁዳ ቆዋ ጸላ።

ሼማኤይ ዮቲዳ ቲንቢቲ (2ታሪ 11:1-4)

21 ሶሎሞን ና ኤርቢኣሜይ ዬሩሳላሜ ካታማ ጋኪዳ ማላ ኢሰራኤል ቢታ አሳራ ኦሌቲዲ ካዋቲላ ባሰ ዛራና ማላ ዩሁዳ ቆዋፊኔ ቢኒያሜ ቆዋፊ ዶሬቲዳ 180,000 ኦላንቻታ ሺሺዳሰ።

22 ሄ ዋዴ ጸሳ ቃላይ ጸሳ አሰ ሻማኤኮ ዪዲ፥

23 «ሶሎሞን ና፥ ዩሁዳ ካዋ ኤርቢኣሜሰ፥ ዩሁዳኔ ቢኒያሜ ቆዋታሲኔ አቲዳ አሳ ኡባሰ።

24 ጎዳይ እንቲና፥ ሳእንቲ ዳቦ ኢሰራኤሌታራ ኦሌታናሰ ቦፒቲ። ሃይሳ ታኒ ኦሊዳ ጊሻሰ እንቲ ኡባይካ እንቲ ሶ እንቲ ሶ ሰሚቲ፤ ጌሰ ጋዳ ዮታ» ጊዳሰ። ሂሰቲን ኢሰቲ ጎዳ ቃላ ሲዩ ሲሚ ሶ ቢዳ።

ኢዮርባኣሜይ ጎዳስ ዙዮ ዛሬል

25 ሄሳፌ ጉዬ ኢዮርባኣሜይ ኤፍሬሜን ሻራ ሜንፉን ዲዛ ሴኬሜን ሚጻ ገግሲ ኡቲዴስ፤ ሄሳፌ ኬዚ ቢዲ ፓኑኤሌን ሚጻ ገግሲዴስ።

26 ኢዮርባኣሜይ ባ ዎዚናን፥ «ካዎቲላይ ዳዊቲ ዘሬላስ ሲማና።

27 ሃ አሳይ ጎዳ ጸሳ ኬላን ያርሾ ያርሻናስ ዬሩሳላሜ ካታማ ቢዛ ገዲኮ፥ ኢስቲ ቃሴ ባንታ ጎዳ ካዎ ኤርቢኣሜኮ ሲማና። ኢስቲ ታና ዎጲዲ ዩሁዳ ካዎ ኤርቢኣሜኮ ሲማና» ገ ቆፒዴስ።

28 ሄሳ ገሻሰ ካዎይ ዘሬቲዳፔ ጉዬ ዎርቃፌ ኦሴቲዳ ማራ ሚሰሌ ናምኣታ ሜጲዲ አሳስ፥ «ኢስራኤል አሳዉ! ኢንቲ ሃይሳ ጋካናስ ዬሩሳላሜ ቦይሲ ገዳና። ቤኢቲ ኢንቲና ገብጾፔ ኬሲዳ ኢንቲ ጸሳቲ ሃይታንታ!» ገዴስ።

29 ኢስታፌ ኢሳ ቤቴሌን፥ ኢሳ ቃሴ ዳኔን ኤሲዴስ።

30 ማራ ሚሰሌስ ጎይናናስ አሳይ ዳኔ ጋካናስ ቢዳ ገሻሰ ሃ ዮኦይ ኢስታስ ናጋራ ገዲዴስ።

31 ኢዮርባኣሜይ ዙምቡላታ ቦላን ጎይኒዛሶሆን ኤቃ ሚሰሌታ ኦሊዴስ፤ ዴራ ገደፌ ሌዌ ቆዋ ገደንታይታ ቄሴ ሂስቲ ሱንሳዴስ።

32 ካሴ ዩሁዳን ቦንቹዛይሳላ ኦስፑንላ አገናን ታማኔ ኢቻሻንላ ጋላሳን ባኣሌይ ቦንቹታና ማላ ኢዮርባኣሜይ ዎጋ ዎሊዲ ያርሾ ያርሺዴስ። ኢዚ ባ ኦሲሲዳ ማራ ሚሰሌታስ ቤቴሌን ዲዛ ያርሾ ሶሆታን ያርሾ ያርሺዴስ። ቃሴ ዙምቡላታ ቦላ ጎይኒዛሶታን ባ ኦሲሲዳ ኤቃ ሚሰሌታስ ቄሴታ ቤቴሌን ሹሚዴስ።

33 ኢዚ ባ ዶሪዳ ኦስፑንላ አገናን ታማኔ ኢቻሻንላ ጋላስ ቤቴሌ ቢዲ ሄ ጋላስ ኢስራኤል አሳስ ባኣሌ ገዳና ማላ ኣዋጂዴስ፤ ሂስቲዲ ኤጻኔ ጨዋሳናስ ፑዴ ያርሾ ያርሺዛሶ ኬዚዴስ።

13

ቤቴሌ ቦላ ቲንቢቲ ዮቲዳ ናቤዛ

1 ኢዮርባኣሜይ ኤጻኔ ጨዋሳናስ ያርሾ ያርሺዛሶ ማታን ኤቂዲሺን ጎዳ ቃላን ከቲቲዳ ጸሳ አሲ ዩሁዳፔ ቤቴሌ ዪዴስ።

2 ጎዳይ አዛዚዳ ቃላ ማላ ያርሾ ያርሺዛሶዛ ኤቁቲሼ፥ «ሃይሶ ያርሾ ያርሺዛሶዛ! ጎዳይ ኔስ፥ ሩዊቴ ዜሬፋፌ ኢዮሲያሳ ጌቲቲዛ ኢሲ ናይ ዩሌታና።

« ሲዚ ሃኢ ሃይሳ ዙዎቡላ ቦላ ጎይኒዛሶታን ያርሾ ሺሺዛ ቁሴታ ኔ ቦላ ያርሻና፤ ኢስታ ሜቁፋካ ኔ ቦላ ጹጋና፤ ጌስ» ጌዴስ።

3 ሄ ጋላስ ጸሳ ኣሲ ማላታ ኢሚዲ፥ «ጎዳይ ዮቲዳ ማላታይ ሃይሳ፤ «ሃ ያርሾሶዚ ጳልቁታና፤ ኢዛ ቦላን ዲዛ ቢዲንፋይካ ዋራ ላሌታና » ጌዴስ።

4 ካዎ ኢዮርባኣሚይ ጸሳ ኣሲ ቤቴሌን ዲዛ ያርሺዛሶዛ ቦላ ዋሲዳይሳ ሲዪዳ ዋዴ፥ ያርሺዛሶዛ ቦላ ባ ኩሼ ሚጨዲ፥ «ሃይሳ ኣዴዛ ኦይኪቲ!» ጌዴስ። ጌዶ ኣቲን ኢዚ ሚጨዲ ኩሼዛ ጉዬ ባኮ ዛራናስ ዳንዳይቤና።

5 ቃሴካ ሄ ጸሳዴይ ጎዳ ቃላን ኢሚዳ ማላታ ማላ ያርሾሶዚ ጳልቁቲ ዋዲዴስ፤ ኢዛ ቦላ ዲዛ ቢዲንፋይካ ላሌቲዴስ።

6 ሂስቲን ካዎ ኢዮርባኣሚይ ጸሳዴዛ፥ «ታ ኩሼይ ካሴይሳፉ ሃናና ማላ ታስ ጋናታዳ ጎዳ ኔ ጸሳ ታስ ዋሳርኪ!» ጌዴስ። ሄሳ ጊሻስ ጸሳዴዚ ካዎዛስ ጋናቲዲ ጎዳ ዋሲን ካዎዛ ኩሼይ ሲሚዲ ካሴይሳ ማላ ሃኒዴስ።

7 ካዎይ ጸሳዴዛ፥ «ታናራ ታሶ ሄፉ፤ ካሊካ ማ። ቃሴ ታኒ ኔስ ኢዎታ ኢማና» ጌዴስ።

8 ጌዶ ኣቲን ጸሳዴዚ ካዎዛስ፥ «ሃራይ ኣቲን ኔኒ ኔ ኣቆታፔ ባጋ ታስ ኢሚዳኮካ ታኒ ኔናራ ቢኬ፤ ሃይሳን ካሊካ ሚኬ፤ ሃሊካ ኡዪኬ።

9 ጋሶይካ ጎዳ ቃላይ ታና፥ «ኔኒ ካሊካ ዋፓ፤ ሃሊካ ኡዮፓ፤ ኔ ዪዳ ኦጌራካ ሲማዳ ቦፓ » ጌዴስ።

10 ሄሳ ጊሻስ ኣዴዚ ካሴ ባ ቢዳ ኦጌራ ጊዶንታ ሃራ ኦጌራ ቤቴሌ ሲሚዴስ።

ቤቴሌን ዲዛ ጨማ ናቤዛ

11 ቲንቢቲ ዮቲዛ ኢሲ ጨማ ናቤይ ቤቴሌ ካታማን ዴስ፤ ኢዛ ናይቲ ቤቴሌን ሄ ጋላስ ጸሳዴዚ ኦሊዳ ኡባ ሚሺኔ ካዎዛካ ኢዚ ኣይ ጊዳኮ ቢዲ ባንታ ኣዋስ ዮቲዳ።

12 ሂስቲን ኣዋይ ኢስታስ፥ «ኣዎ ኦጌራ ቢዴ?» ጌዴስ፤ ዩሁዳፔ ዪዳ ጸሳ ኣሲ ቢዳ ኦጌዛ ባንታ ኣዎ ቤሲዳ።

13 ሄሳፌ ጉዬ ኢዚ ባ ናይታ፥ «ታስ ኣኔ ሃሬ ኮሪቲ» ጊን ኢስቲ ኢዛስ ሃሬ ኮሪን ቶጊዴስ።

14 ሂሰቲዲ ዳሳዴዛ ጌዶ ካሊ ቢዴሰ፤ ኢሲ ዋላ ኩዋን ኡቲዳይሳ ዳሚዲ፡ «የሁዳፔ ዪዳ ዳሳዴዛ ኔኔ?» ጌ ኦይቺዴሰ፡ ኢዚካ፡ «ኤ ታናኮ!» ጌዴሰ፡

15 ሂሰቲን ሄ ጨማ ናቤዚ ኢዛ፡ «ቁማ ማናሰ ታናራ ታሶ ሄፉ» ጌዴሰ፡

16 ዳሳዴዚ ዛሪዲ፡ «ታኒ ጉዬ ሲማዳ ኔናራ ባናሰ፡ ዋይኮ ሃይሳን ኔናራ ካል ማናሰ፡ ዋይኮ ሃል ኡያናሰ ዳንዳይኬ፡

17 ኣይሰ ገኮ ጎዳ ቃላይ ታና፡ ሳኒ ሄ ሶሆን ካሊካ ሞፓ፤ ሃሊካ ኡዮፓ፤ ኔ ዪዳ ኦጌራካ ሲማ ቦፓ» ጌ ኣዛዚዴሰ» ጌዴሰ፡

18 ጨማ ናቤዚ ጌዲኮ፡ «ታኒካ ኔ ማላ ቲንቢቲ ዮቲዛዴ፤ ኪታንቻይ ጎዳ ቃላን ታና፡ ሳል ኢዚ ማና ማላኔ ሃል ኡያና ማላ ኢዛ ዛራዳ ኔ ሶ ኔናራ ኤካ ባ» ጌዴሰ» ጌ ዮቲዴሰ፡ ጌዶ ኣቲን ጨማ ናቤዚ ሄሳ ኢዛሰ ዋርዶ ዮቲዴሰ፡

19 ሄሳ ገሻሰ ዳሳዴዚ ኢዛራ ሲሚዲ ኢዛ ሶን ሚዴሲኔ ኡዪዴሰ፡

20 ኢሰቲ ማዳን ኡቲዳሺን ጎዳ ቃላይ ዛሪ ኤሂዳ ጨማ ናቤዛኮ ዪዴሰ፡

21 ሂሰቲን የሁዳፔ ዪዳ ዳሳ ናቤዛሰ፡ «ጎዳይ ኔና፡ ሳኒ ዳሳ ቃላ ካዉሻዳሳ፤ ጎዳ ኔ ዳሳይ ኔና ኣዛዚዳ ኣዛዘካ ናጋቤካ፡

22 ሄ ሶሆን ሞፓ ዋይኮ ኡዮፖ ጌዳ ሶሆ ጉዬ ሲማ ባዳ ሄን ካሊካ ማዳሳ፤ ሃሊካ ኡያዳሳ፡ ሄሳ ገሻሰ ኔ ኣሃይ ኔ ኣዋታ ዲፎን ሞጌቲና» ጌሰ» ጌሼ ዋሲ ዮቲዴሰ፡

23 ዳሳ ኣሲ ሚዲኔ ኡዪ ገጌዳፔ ጉዬ ቲንቢቲ ዮቲዛይሲ ባ ጉዬ ዛሪ ኤሂዳ ናቤዛሰ ሃሪ ኮሪዴሰ፡

24 ሂሰቲን ኢዚ ኦጌራ ቢሺን ጋሞይ ጋይቲዲ ኢዛ ዋፏዴሰ፡ ኢዛ ኣሃይ ኦጌን ፖርጩ ጌዴሰ፤ ሃሪኔ ጋሞይ ናሞኣይካ ኢዛ ላንቁን ኤቁዳ፡

25 ሄ ኦጌራ ኣፏዛ ኣሳይ ኣሃይ ፖርጩ ጌ ኢቺዳይሳኔ ጋሞይካ ኢዛ ላንቁን ኤቁዳይሳ ቤኢዲ ጨማ ናቤዚ ዲዛ ካታማን ቢዲ ዮቲዳ፡

26 ቢዛሳፔ ኣዴዛሰ ቲንቢቲ ዮቲዲ ጉዬ ዛሪዳ ጨማ ናቤዚ ሄሳ ሲዪዳ ዋዴ፡ «ሄሲ ጎዳ ቃላሰ ኣዛዜቶንታ ኢጲዳ ዳሳ ኣሳ፡ ሄሳ ገሻሰ ጎዳ ቃላይ ኢዛሰ ካሴቲዲ ዮቲዳይሳ ማላ ጎዳይ ኢዛ ጋሞሰ ኣሊ ኢሚን ጋሞይ ኢዛ ሚንፊሬል ዋፏዴሰ» ጌዴሰ፡

27 ሄሳፌ ጉዬ ጨማ ኣዴዚ ባ ናይታ፡ «ታሰ ሃሪ ኮሪቲ» ጌዴሰ፡ ሂሰቲን ኢሰቲ ኢዛሰ ሃሪ ኮሪዳ፡

28 ናቤዚ ቢሼ አሃይ ኦጌ ቦላ ፖርጩ ገ እቺዳ ጋሞይኔ ሃሬይ ኢዛ ማታን ኤቁዳይሳ ዳሚዴስ። ጋሞዚ አሃ ሚቤና፤ ሃሬዛካ ቦቺቤና።

29 ጪማ ናቤዚ ጸሳ ናቤዛ አሃ ዴንፊዲ ሃሬዛ ቦላ ጫኒዴስ፤ ዩካናሲኔ ሞጋናስ ጉዬ ባ ካታማ ኤኪ ኤሂዴስ።

30 ሂስቲዲ ባስ ገገሲ ዋሊዳ ዱፎን አሃ ዋሊዲ፥ «ታ አሻዘ!» ገዲ ኢዛስ ዩኪዳ።

31 ሞጊ ሲሚዳፔ ጉዬ ባ ናይታስ፥ «ታኒ ሃይቁዛ ዋዴ ጸሳ አሲ ሞጌቲዳ ዱፎን ታና ሞጌቲ፤ ታ ሜቁላታካ ኢዛ ሜቁላታ ለንቁን ዋሊቲ።

32 ጋሶይካ ቤቱሌን ዲዛ ያርሾ ያርሺዛሶዛ ቦላ፥ ሳማሪያ ካታማታኒኔ ዙሞቡላታ ቦላ ዲዛ ጎይኒዛሶሆታ ቦላ ጎዳ ቃላ ማላ ኢዚ ዋሲ ዮቲዳይሲ ቱሙ ፖሌታና» ገ ዮቲዴስ።

ኢዮርባኣሜ ኬፋ አሳ ዳይሳናስ ጋሊዳ ናጋራ

33 ሃይሲ ኡባይ ሃንኮካ ኢዮርባኣሜይ ባ ኢታ ኦጌፔ ሲሚቤና፤ ሃሳፌ ቦላራካ ዙሞቡላታ ቦላ ዲዛ ያርሾሶታን ኦላናስ ዴሬ ኡባፌ ቁሴታ ሹሚዴስ፤ ቁሴ ገዳናስ ኮይዛ ኦናካ ዙሞቡላታ ቦላ ያርሺዛሶሆታን ዋሊዴስ።

34 ሃይሲ ሃ ናጋራይ ኢዮርባኣሜ ኬፋ አሳ ባሻሲኔ ቢታ ቦላፌ ዳይሳናስ ጋሶ ገዲዴስ።

14

አካያይ ኢዮርባኣሜ ቦላ ዮቲዳ ቲንቢቲ

1 ሄ ዋዴ ኢዮርባኣሜ ና አቢያይ ሃርገዴስ።

2 ሂስቲን ኢዮርባኣሜይ ባ ኬፋዮ፥ «ዴንዳ፤ ዴንዳዳ ኔኒ ኢዮርባኣሜ ኬፋዮ ገዲዳይሳ ኦኒኔ ኤርንታ ማላ፥ ኔ ማይኦ ላማ፤ ሂስታዳ ሴሎ ባ። ታኒ ሃ አሳ ቦላ ካዎታናይሳ ታስ ዮቲዳ ናቤ አካያይ ሄን ዴስ።

3 ታሙ ኡኬል፥ ጉፋ ዳቦኔ ኢሲ ኦቶ ኤስ ኤካዳ ኢዛኮ ባ፤ ኢዚ ናዛ ቦላ ጋካናይሳ ኔስ ዮታና» ገዴስ።

4 ኢዮርባኣሜ ኬፋያ ኢዚ ገዳ ማላ ኦላዲስ፤ ዴንዳዳ አካያ ሶ ሴሎ ባዲስ። አካያይ ጪሚዳ ገሻስ ኢዛ አይፌይ ዶልጂሚዲ ዴሚና።

5 ገዴ አቲን ጎዳይ አካያስ፥ «ኢዮርባኣሜ ኬፋ አይያ ሃርገዛ ባ ናዛ ገሻስ ኔና ኦይቻናስ ሃራ ማጫስ ሚሳታዳ ኔኮ ያና፤ ኔኒ ኢዚስ ሃይሳ ሃይሳ ጋዳ ዮታ» ገዴስ።

6 ሄሳ ጊሻስ አካያይ ማጫሳያ ፔንጌ ጌሊሺን ሲዩዲ፡ «ኢዮርባኣሜ ኩላ እዩ! እኔ ሃ ጌላ። አይስ ሃራ እስ ሚሳታዲ? ታኒ ኢታ ዮኦ ኔስ ዮታናስ ከቲታዲስ።

7 ኔኒ ኢዮርባኣሜኮ ባዳ ጎዳ ኢስራኤል ጸሳይ ኔና፡ ታኒ ኔና አሳ ጊዶፌ ዴንላዳ ታ ዴሬ ኢስራኤል ቦላ ካዎላዲስ።

8 ታኒ ዳዊቲ ዛሬፔ ካዎቲላ ዎላ ኤካዳ ኔስ አማዲስ፤ ጊዶ አቲን ኔኒ ታ አሽካራ ዳዊቲ ማላ ጊዳካ፤ ኢዚ ታ አዛዞ ናጊዴሲኔ ታ ሲንላን ሱሬ ሚሽ ጸላ ኦሊሽ ባ ኩሜላ ዎዚናን ታና ካሊዴስ።

9 ኔፔ ካሴ ሲንላን ዲዛይቲ ኡባይ ኦሊዳ ኢታፔ አጲዛ ኢታ ኔኒ ኦላዳሳ፤ ኔኒ ኔስ ቢራታፔ ሴሪሳዳ ኤቃ ጸሳታ ሜዳዳሳ። ታ ሃንቆ ዴንፍላዳሳ፤ ሂስታዳ ታና ጉዬ ኦላዳሳ።

10 « ሄሳ ጋሶን ታኒ ኢዮርባኣሜ ኩላ አሳ ቦላ ጳዮ ኤሃና። ኢስራኤል ቢታን ኢዮርባኣሜ ኩላ አሳፔ አይሌ ጊዲን ዎይኮ ጎቃ ጊዲን፡ አቲማስ ኡባ ጳይሳና፤ ታኒ ኢዮርባኣሜ ኩላ አሳ ከፊይ ቢዲንላ ኩዛና ጋካናስ ጸጊዛ ማላ ጸጋና።

11 ኢዮርባኣሜ ዛሬፔ ካታማን ሃይቂዳይታ ካናይ ማና፤ ጋጸሬን ሃይቂዳይታ ካፎይ ማና፤ ሃይሳ ዮቲዳይ ታና ጎዳ!፤ ጊዴስ።

12 «ኔኒ ጊዲኮ ሃኢ ዴንዳዳ ኔሶ ባ። ኔኒ ካታማ ጋኪዳ ማላ ናዚ ሃይቃና።

13 ኢስራኤል ኡባይ ናዛስ ዩኪዲ ዋጋና፤ ጎዳ ኢስራኤል ጸሳ ሲንላን ኢዮርባኣሜ ኩላ አሳፔ ሃ ናዛ ቦላ ጸላ ሎኦ ሚሺ ቤቲዳ ጊሻስ ዎጋን ዋጌታናይ ኢዛ ጸላ።

14 «ሄሳፌ ጉዬ ኢዮርባኣሜ ኩላ አሳ ጳይሲዛ ካዎ፡ ጎዳይ ባስ ኢስራኤል ቦላ ዴንላና፤ ሄሲካ ሃኢ ሃናና።

15 ሃላ ጊደን ቃጸዛ ማቃ ማላ ጎዳይ ሄ ዎዴ ኢስራኤሌታ ሾጪዲ ቃላና። አሽሮ ጌቲቲዛ ኤቃ ጸሳይ ሚስሌ ኤሲዲ ጎዳ ሃንቁሊዳ ጊሻስ ኢስታ አዋታስ ኢዚ አሚዳ ሎኦ ቢታፌ ኢስታ ዲጋና፤ ሂስቲዲ ኢስታ ኤፊራጺሴ ሻፋፔ ሄ ፒንላን ላላና።

16 ኢዮርባኣሜይ ኦሊዳ ናጋራ ጋሶኒኔ ኢስራኤል አሳ ኢዚ ኦሲሲዳ ናጋራ ጊሻስ ጎዳይ ኢስራኤል ዩጌ አጋና» ጊዴስ።

17 ሄሳፌ ጉዬ ኢዮርባኣሜ ኩላ አያ ዴንዳ ባዳ ቲርጸን ባ ኩላ ፔንጌ ጋኪዳ ማላ ናዚ ሃይቂዴስ።

18 ናሴ አካያ ባጋራ ጎዳይ ዮቲዳ ማላ ኢስራኤል አሳይ ኡባይ ኢዛስ ዩኪዲ ዋጊዴስ።

ኢዮርባኣሜ ሃይቆ

19 እቲዳ ኢዮርባአሜ ታሪኬይ፡ ኢዚ ኦሊዳ ኦሶቲ፡ ኢዚ ኦሌቲዳ ኦላቲኔ ኢዚ ኣይሲዳ ኣይሶ ዎጋቲ ኢሰራኤሌ ካዎታ ታሪኬ ማጽፋን ጸፊቲ ኡቲዳ።

20 ኢዮርባአሜይ 22 ላይሰ ካዎቲዳሰ፤ ሄሳፌ ጉዬ ሃይቂዲ ባ ኣዎታን ጋይቲዳሰ። ኢዛሶሆን ኢዛ ና ናዳቤይ ካዎቲዳሰ።

የሁዳ ካዎ ኤርቢአሜ

(2ታሪ 11:5—12:15)

21 ሶሎሞን ና ኤርቢአሜይ የሁዳን ካዎቲዳሰ፤ ኤርቢአሜይ ካዎቲዛ ዎዴ ኢዛሰ ላይሳይ 41። ጎዳይ ባ ሱንላይ ጸይጌታና ማላ ኢሰራኤሌ ቆሞታ ካታማታ ኡባ ጊዶፌ ዶሪዳ ዬሩሳላሜ ካታማን ኤርቢአሜይ 17 ላይሰ ካዎቲዳሰ። ኢዛሰ ኣዬይ ሱንላ ናኢሞ፤ ኢዛካ ኣሞን ቢታ ኣሳ።

22 የሁዳ ኣሳቲ ጎዳ ሲንላን ኢታ ሚሽ ኦሊዳ፤ ባንቲ ኦሊዳ ናጋራን ኢሰቲ ባንታ ኣዎታፔ ኣሊዲ ጎዳፔ ዴጾ ሃንቆ ባ ቦላ ዴንሴሊዳ።

23 ቃሴካ ኢሰቲ ባንታሰ ጎይኒዛ ቆቃሶሆታ፡ ኤቃ ሹቻታኔ ኣሼር ጌቲቲዛ ጸሳይ ሚሰሌታ ዙሞቡላታ ቦላኔ ጌታ ሚላታ ጋርሳን ኤሲዳ።

24 ሃራይ እቲን ኢሰቲ ጎይኒዛሶሆታን ጎይኖ ዎጋ ኦሊዲ ፓራ ላይማቲላ ዎጋታ ፖሊዛ ኣሳቲ ዴቲሰ። ጎዳይ ኢሰራኤሌታ ሲንላፌ ኬሲ ዬዴሊዳ ካዎቲላቲ ሜዜቲዳ ማላ ሃራሲዛ ኦሶታ ኡባ ኢሰራኤሌ ኣሳቲ ኦሊዳ።

25 ኤርቢአሜይ ካዎቲዳ ኢቻሻንሶ ላይላን ጌብጼ ካዎ ሺሻቂ ዬሩሳላሜ ካታማ ቦላ ዎራጂዳሰ።

26 ሂስቲዲ ጸሳ ኬላኒኔ ካዎ ኬላን ዲዛ ቡቁራ፡ ሶሎሞንይ ቆጶሲዳ ዎርቃ ጎንዳሌታራ ኡባ ቦንቂ ኤኪዲ ቢዳሰ።

27 ካዎ ኤርቢአሜይ ሄ ጎንዳሌታ ጊሻሰ ጸርቂማላፔ ጎንዳሌታ ኦሲሲዲ ኢሰታ ናጊዲ ዎላና ማላ ካዎ ኬላ ናጊዛ ዛቤታ ሃላቃታሰ ኢሚዳሰ።

28 ካዎዚ ጸሳ ኬላ ቢዛ ዎዴ ኡባን ናጊዛይቲ ጎንዳሌታ ኦይኬቲሰ፤ ሄፔ ሲሚዲ ኢሰታ ዛቤታ ሃላቃ ኬላን ዛሪ ዎሌቲሰ።

29 ኤርቢአሜይ ኣይሲዳ ኣይሶ ዎጋቲኔ ኢዚ ኦሊዳ ኡባ ኦሶቲ የሁዳ ካዎታ ታሪኬ ማጽፋን ጸፊቲ ኡቲዳ።

30 ኤርቢአሜይ ኢዮርባአሜይ ባ ዎዴ ኡባን ባ ጊዶን ኦሌቲሼ ዴኢዳ።

31 ኤርቢአሜይ ሃይቂዲ ባ አዋታን ጋይቲዴስ፤ ኢዚ ዳዊቴ ካታማን ዲዛ ባ አዋታ ዱፎን ሞጌቲዴስ። ኢዛ አዬይ ሱንሊ ናኢሞ፤ ኢዛካ አሞኔ ቢታ አሳ። ኤርቢአሜ ሶሆን ኢዚ ና ኣቢያይ ካዎቲዴስ።

15

የሁዳ ካዎ አቢያ

(2ታሪ 13:1—14:1)

1 ናባጼ ና ኢዮርባአሜይ ካዎቲዳ ታማኔ አሰፑንላ ላይላን አቢያይ የሁዳን ካዎቲዴስ።

2 አቢያይ ዬሩሳላሜን ሄዙ ላይላ ካዎቲዴስ፤ ኢዛ አዬያ አቤሴሎሜ ቦሎቶ፤ ኢዚ ሱንላይካ ማኢኮ።

3 ኢዚ ካሴ ኢዛ አዋይ ኦሊዳ ናጋራ ኡባ ኦሊዴስ፤ ኢዛ ዋዚናይ ኢዛ ማይዛ ዳዊቴ ዋዚናይ ኩሜላ አማኔቲዳ ማላ ጎዳ ባ ጸሳስ ኩሜላ አማኔቲቤና።

4 ጊዲኮካ ኢዛፔ ጉዬ ዬሩሳላሜን ካዎታና ማላኔ ዬሩሳላሜ ሳርቲላ ናጋና ማላ ጎዳ ኢዛ ጸሳይ ዳዊቴ ጊሻስ አቢያስ ኢሲ አቱማ ና አሚዴስ።

5 ጎዳይ ሄሳ ኦሊዳይ ዳዊቲ ሂቴ አስ ኦሪዮ ቦላ ኦሊዳ ናጋራይፔ አቲን ጎዳ ሲንላን ሱሬ ሚሽ ኦሊዴስ፤ ባ ዴኦ ላይላ ኡባን ጎዳ አዛዞታፔ ካሬ ኬዚቤና።

6 አቢያይ ካዎቲዳ ላይላ ኡባን አቢያ አሳራኔ ኤርቢአሜ አሳራ ባንታ ጊዶን ኦሌቲሼ ዴኢዳ።

7 አቢያይ ኦሊዳ ሃራ ሚሻቲ ኡባይ የሁዳ ካዎታ ታሪኬ ማጽፋን ጸፊቲ ኡቲዳ። አቢያይኔ ኢዮርባአሜይ ባንታ ጊዶን ኦሌቲሼ ዴኢዳ።

8 አቢያይ ሃይቂዲ ባ አዋታን ጋይቲዴስ፤ ኢዚ ዳዊቴ ካታማን ሞጌቲዴስ። ኢዛ ሶሆንካ ኢዛ ና ኢሲ ካዎቲዴስ።

የሁዳ ካዎ አሳ

(2ታሪ 15:16—16:6)

9 አሲራኤሌ ካዎ ኢዮርባአሜይ ካዎቲዳ ናሞኡ ታማንላ ላይላን አሲ የሁዳን ካዎቲዴስ።

10 አሲ ዬሩሳላሜን 41 ላይላ ካዎቲዴስ፤ ኢዛ አዋ አያ አቤሴሎሜ ቢዮ ማኢኮ።

11 እሲ ባ ማካኩሌ ዳዊቲ ኦሊዳ ማላ ጎዳ ሲንላን ሱሬ ሚሽ ኦሊዳ።

12 ጎይኖ ዋጋ ፖላናስ ፓራ ላይማ ላይማቲዛይታ እሲ ባ ቢታፌ ዳይሲዳስ፤ እዛፔ ካሴ ዳኢዳ ካዎቲ ኦሊዳ ኤቃ ጸሳ ሚሰሌታ ኡባ ቶቃሌሬሊ ዩጊዳስ።

13 እዛ ኦዋ ኣያ ማእካ ኣሼሮ ጌቲቲዛ ሃራሲዛ ኤቃ ሚሰሌ ሜዲዳ ጊሻሰ ጎዳቲይንታ ጌቲቲዛ ቦንቾፌ እዛ ዲጊዳስ። እሲ ሄ ኤቃ ሚሰሌዛ ቃንጾሬሊዲ ቄዲርኔ ዙሌን ጸጊዳስ።

14 እሲ ዙዋቡላታ ቦላ ጎይኒዛሶሆታ ኡባ ዳይሶንታ ኣገኮካ እዚ ባ ዳኢዳ ላይሰ ኡባን ጸሳስ ዋዚናፔ ኣማኔቲዛ ኣስ ጊዲ ዴዲዳስ።

15 እዚኔ እዛ ኦዋይ ጸሳስ ዲማሲ ዋሊዳ ቢራ፣ ዋርቃኔ ሃራ ሚሻታ ኤሂዲ ጎዳ ጸሳ ኬላ ጊደን ዋሊዳስ።

16 ዩሁዳ ካዎ ኣሲኔ ኢሰራኤሌ ካዎ ባሼይ ባንታ ዴኦ ላይሰ ኡባን ኦሊቲሼ ዴዲዳ።

17 ኢሰራኤሌ ካዎ ባሼይ ዩሁዳ ቦላ ዋራጂዲ ዩሁዳ ካዎ ኣሳ ቢታ ጌሎንታ ማላኔ ኬኦንታ ማላ ቲቃናስ ኤራማ ካታማ ዩዩ ኣዳናስ ሚጸ ሂስቲ ጊምቢዳስ።

18 ሄሳ ጋሶን ካዎ ኣሲ ጎዳ ጸሳ ኬላኒኔ ባ ካዎቲላ ኬላን ኣቲዳ ዋርቃኔ ቢራ ኡባ ኬሲዲ ባ ኦሳንቻታ ኩሼን ዋሊዳስ። ሂስቲዲ ሄዚዮናሳ ና ጸብሪሞና ናዛስ ዳማሰቆ ካታማን ዴዲዛ ኣራማ ካዎ ቤኒ-ሃዳዳስ ኢሞታ ሂስቲ ዩዲዳስ።

19 ሂስቲዲ እዛስ፡ «ካሴ ታ ኣዋሲኔ ኔ ኣዋስ ኢስታ ጊደን ጫቆ ቃላይ ዲዛ ማላ ሃኢ ታ ጊደኒኔ ኔ ጊደንካ ጫቆ ቃላይ ዴኦ፤ ሄኮ ቢራኔ ዋርቃ ታኒ ኔስ ኢሞታ ኢማናስ ዩዳዲስ። ኢሰራኤሌ ካዎ ባሼይ ባ ኦላንቻታ ታ ቢታፌ ኬሳና ማላ ኔኒ ካሴ እዛራ ጫቂቲዳ ጫቆ ቃላ ላላ» ጊዳስ።

20 ቤኒ-ሃዳዳይ ካዎ ኣሲ ጊዳ ቃላ ኤኪዲ ባ ኦላ ጋዳዋታ ኢሰራኤሌ ካታማታ ኦላናስ ዩዲዳስ፤ ኢስቲ ኢዮኔ፣ ዴኔ፣ ኣቤሊ-ቤቲ-ማእካ ጌቲቲዛ ካታማታ፣ ቃሴ ኒፍታሌማኔ ጌንሴሬጾ ኡባ ኦሊ ኦይኪዳስ።

21 ካዎ ባሼይ ሄሳ ሲዩዲ ኤራማ ካታማ ጊምቢዛይሳ ኣጊዲ ቲርጸ ጌቲቲዛ ካታማ ጉዬ ሲሚዳስ።

22 ሄሳፌ ጉዬ ካዎ ኣሲ ዩሁዳን ዴዲዛ ኣሳይ ኡባይ ኣቶንታ ኬዛና ማላ ኣዋጂሲዳስ፤ ባሼይ ካሴ ሄን ጎኡቲዛ ሹቻኔ ሚላ ኤራማፔ ሚዩዳ። ካዎ ኣሲ ሚጸዲኒኔ ቢኒያማ ቢታን ዴዲዛ ጌባ እዛን ሚንላ ጊምቢዳስ።

23 እሲ ሃኒዳ ሃኖታቲ፥ ኢዛ ሚኖቴል ኡባይ፥ ኢዚ ኦሊዳ ኦሶቲኔ ኢዚ ኤሲዳ ካታማቲ ዩሁዳ ካዎታ ታሪኬ ማጻፋን ጸፊቲ ኡቲዳ። ጊዳ ኦቲን ኢዚ ጨሚዳ ዎዴ ቶሆ ሳኬቲዳሰ።

24 እሲ ሃይቂዲ ባ ኣዎታን ጋይቲዳሰ፤ ባ ማካኩሌ ዳዊቲ ካታማንካ ሞጌቲዳሰ። ኢዛ ና ኢዮሳፊጾይ ኢዛሶሆን ካዎቲዳሰ።

ኢሰራኤል ካዎ ናዳቤ

25 ዩሁዳ ካዎ እሲ ካዎቲዳ ናሞኣንል ላይል ኢዮርባኣሜ ና ናዳቤይ ኢሰራኤልን ካዎቲዳሰ፤ ኢዚ ኢሰራኤል ቢታ ናሞኡ ላይል ሃሪዳሰ።

26 ናዳቤይ ካሴ ባ ኣዎይ ናጋራ ኦሊዳ ኢሰራኤል ኣሳይ ናጋራ ኦፋና ማላ ካሌሊዳሰ።

27 ሄ ዎዴ ናዳቤይኔ ኢዛ ኦላንቻቲ ፊሊሰጾሜን ዲዛ ጋባቶኔ ካታማ ዶዲ ዲሽን ዩሳኮሪ ዛሬ ጊዲዳ ኣካያ ና ባሼይ ናዳቤ ቦላ ዴንዲዲ ኢዛ ዎዲዳሰ።

28 ዩሁዳ ካዎ እሲ ካዎቲዳ ሄሻንል ላይላን ባሼይ ናዳቤ ዎዲዲ ኢዛሶሆን ካዎቲዳሰ።

29 ባሼይ ካዎቲዳ ማላ ኢዮርባኣሜ ሶ ኣሳ ኡባ ዎዲ ወርሲዳሰ፤ ጎዳይ ሴሎፔ ዩዳ ባ ኣሽካራ ናቤ ኣካያ ባጋራ ዮቲዳ ማላ ኢዮርባኣሜ ኬፋ ኣሳይ ኡባይ ሃይቂ ወሪዳሰ።

30 ሄሲ ሃኒዳይ ኢዮርባኣሜይ ባ ሁኡን ኦሊዳ ናጋራ ጊሻሰ፥ ኢሰራኤል ኣሳ ኢዚ ኦሲሲዳ ናጋራ ጊሻሲኔ ጎዳ ኢሰራኤል ጾሳ ሃንቄሊዳ ጊሻሳ።

31 ናዳቤይ ሃኒዳ ሃኖታቲኔ ኢዚ ኦሊዳ ኦሶቲ ኡባይ ኢሰራኤል ካዎታ ታሪኬ ማጻፋን ጸፊቲ ኡቲዳ።

32 ዩሁዳ ካዎ እሲኔ ኢሰራኤል ካዎ ባሼይ ባንታ ላይል ኡባን ኦሌቲሼ ዴኢዳ።

ኢሰራኤል ካዎ ባሼ

33 ዩሁዳ ካዎ እሲ ካዎቲዳ ሄሻንል ላይላን ኣካያ ና ባሼይ ኢሰራኤል ኣሳ ኡባ ቦላ ካዎቲዳሰ፤ ኢዚ ቲርጸ ካታማን 24 ላይል ካዎቲዳሰ።

34 ኢዮርባኣሜይ ኢሰራኤል ኣሳ ኦሲሲዳ ናጋራ ኦሊዳኔ ኢዛ ኦጌን ሄሜቲዲ ባሼይ ጎዳ ሲንላን ኢታ ሚሽ ኦሊዳሰ።

16

1 ሃናኒያ ና ኢዩ ባጋራ ጎዳ ቃላይ ባሼ ቦላ ሂዝጊሼ ዩዳሰ፤

2 «ታኒ ኔና ጉዱላፌ ዴንፋዳ ታ ዴራ ኢሰራኤል ቦላ ካዋሳዲስ፤ ጊዶ ኣቲን ኔኒ ኢዮርባኣሜይ ቢዳ ኦጌራ ባዳ ታ ዴራ ኢሰራኤል ናጋራ ኦሲሳዳሳ፤ ሂስታዳ ታ ኢስታ ናጋራን ሃንቄታና ማላ ታና ዴንፋዳዳ።

3 ሄሳ ጊሻሰ ታኒ ባሼኔ ኢዛ ኬፋ ኣሳ ሙሌራ ቆይሳና፤ ታኒ ኔ ኬፋ ኣሳ ናባጼ ና ኢዮርባኣሜ ኬፋ ኣሳ ማላ ኦፋና።

4 ባሼ ዛሬ ካታማን ሃይቂዛ ኦናካ ካናይ ማና፤ ቃሴ ጋጸሬን ሃይቂዛ ኦናካ ካፎይ ማና» ጊዴስ።

5 ባሼይ ሃኒዳ ሃኖታይ፤ ኢዚ ኦፊዳ ኦሶይኔ ኢዛ ሚኖቴፋይ ኢሰራኤል ካዎታ ታሪኬ ማጻፋን ጸፊቲ ኡቲዴስ።

6 ባሼይ ሃይቂዱ ባ ኣዎታን ጋይቲዴስ፤ ቲርጸ ካታማን ሞጌቲዴስ። ኢዛ ና ኤላይ ኢዛሶሆን ካዎቲዴስ።

7 ጎዳይ ሃናኒያ ና ናቤ ኢዩ ባጋራ ባሼ ቦላኔ ኢዛ ሶ ኣሳ ቦላ ቲንቢቲ ዮቲዳ ጋሶይካ ባሼይ ኦፊዳ ናጋራ ጊሻሰ፤ ኢዮርባኣሜይኔ ኢዛ ሶ ኣሳይ ኦፊዳ ኢታ ኦሶ ማላ ጎዳ ሲንፋን ኦፊዳ ጊሻሲኔ ኢዮርባኣሜ ሶ ኣሳ ኡባ ዎፂ ቆይሲዳ ጊሻሳ።

ኢሰራኤል ካዎ ኤላ

8 ዩሁዳ ካዎ ኣሲ ካዎቲዳ 26 ላይፋን ባሼ ና ኤላይ ኢሰራኤልን ካዎቲዴስ። ቲርጸ ካታማን ኢዚ ናምኡ ላይፋ ካዎቲዴስ።

9 ካዎ ሹሜኔ ኢዛ ፓራ-ጋሬታፔ ባጋ ኣዛዚዛ ዚሚሬይ ካዎ ቦላ ማካላቴፋን ዴንዲዴስ። ሄ ዎዴ ካዎ ኤሊ ቲርጸን ዲዛ ካዎ ኬፋሰ ሹሜ ጊዲ ዲዛ ኣርጸሶን ማፅቲ ዴስ።

10 ዩሁዳ ካዎ ኣሲ ካዎቲዳ 27 ላይፋን ዚሚሬይ ኣርጸሶ ጌሊዲ ካዎ ኤላ ዎፂዲ ኢዛሶሆን ካዎቲዴስ።

11 ዚሚሬይ ካዎቲዲ ካዎቴፋ ኣራታን ኡቲዳ ማላ ባሼ ሶ ኣሳ ኡባ ዎፂዴስ። ባሼስ ዳቦ ጊዲን ዎይኮ ላጌ ጊዲን ኢሳዴካ ኣሸቤና።

12 ናቤ ኢዩ ባጋራ ጎዳይ ባሼ ቦላ ሃሳይዳ ቃላ ማላ ዚሚሬይ ባሼ ሶ ኣሳ ኡባ ዎፂዴስ።

13 ሄሲ ሃኒዳይ ባሼይኔ ኢዛ ና ኤላይ ባንታ ኤቃ ጸሳስ ጎይኖን ኦፊዳ ናጋራ ኡባ ጋሶኒኔ ኢሰራኤል ኣሳ ኦሲሲዳ ናጋራ ጋሶን ጎዳ ኢሰራኤል ጸሳ ሃንቄፊዳ ጊሻሳ።

14 ኤላይ ሃኒዳ ሃራ ሃኖታቲኔ ኢዚ ኦፊዳ ኦሶቲ ኡባይ ኢሰራኤል ካዎታ ታሪኬ ማጻፋን ጸፊቲ ኡቲዴስ።

ኢሰራኤል ካዎ ዚሚሬ

15 የሁዳ ካዎ አሲ ካዎቲዳ 27 ላይላን ዘሚሬይ ቲርጸን ላፑን ጋላሰ ጸላ ካዎቲዳስ። ሄ ዎዴ ኢሰራኤል ኦላንቻቲ ጋባቶኔ ጌቲቲዛ ፊሊስጶሜ ካታማ ዶዲዲ ኡቲዳ።

16 ሄን ዶዲ ኡቲዳ ኢሰራኤልቲ ዘሚሬይ ካዎዛ ቦላ ዴንዲዲ ኢዛ ዎዲዳይሳ ሲዪዳ ማላ ኦላ ጋዳዎ ኦሚሬ ሄ ጋላሲካ ሄ ሶሆን ኢሰራኤል ቦላ ካዎሊዳ።

17 ኦሚሬይኔ ኢዛራ ዲዛ ኢሰራኤል አሳይ ኡባይ ጋባቶኔ ካታማፔ ፑዴ ኬዚዲ ቲርጸ ካታማ ዶዲዳ።

18 ካታማዚ ኦይኬቲዳይሳ ቤኢዳ ማላ ዘሚሬይ ካዎ ኬላ ጊዶን ዲዛ ሚጸን ጌሊዲ ካዎ ኬላን ታማ ኦይሊዲ ሄን ኢዛን ሃይቂዳስ።

19 ሄሲ ሃኒዳይ ኢዮርባኦሜይ ኦሊዳ ናጋራኔ ኢሰራኤል አሳ ኦሲሲዳ ናጋራ ካሊዲ ዘሚሬይ ጎዳ ሲንላን ኢታ ሚሽ ኦሊዳ ገሻሳ።

20 ዘሚሬይ ሃኒዳ ሃራ ሃኖቲኔ ኢዚ ኦሊዳ ማካላ ኦሶይ ኡባይ ኢሰራኤል ካዎታ ታሪኬ ማጻፋን ጻፊቲ ኡቲዳስ።

ኢሰራኤል ካዎ ኦሚሬ

21 ሄ ዎዴ ኢሰራኤል አሳይ ናምኡ ኬዚ ሻኬቲዳስ። አሳፔ ባጋይ ጊናቲ ና ቲቢኔ ካዎላና ኮዪን ባጋይ ቃሴ ኦሚሬ ካዎላናሰ ኮዪዳስ።

22 ኦሚሬ ማዲዛ አሳይ ጊናቲ ና ቲቢኔ ማዲዛ አሳፔ ሚኒዳስ። ሄሳ ገሻሰ ቲቢኔይ ሃይቂን ኦሚሬይ ካዎቲዳስ።

23 የሁዳ ካዎ አሲ ካዎቲዳ 31 ላይላን ኦሚሬይ ኢሰራኤል አሳ ቦላ ካዎቲዲ 12 ላይላ ሃሪዳስ፤ ሂስቲዲ 6 ላይላ ቲርጸ ሃሪዳስ።

24 ኦሚሬይ ሳማሪያን ዲዛ ዙሞቡላ ሺሜሬፔ 6,000 ሳቂሌ ቢራን ሻሚዲ ካታማ ኬጺዳስ። ሂስቲዲ ሄ ካታማዛ ካሴ ዙሞቡላ ጎዳ ሱንላን ሳማሪያ ጊዲ ሱንሊዳስ።

25 ጊዶ አቲን ኦሚሬይ ጎዳ ሲንላን ኢታ ሚሽ ኦሊዳስ፤ ኢዚ ባፔ ካሴ ዴኢዳ ካዎታ ኡባታፔካ አዲዳ ናጋራ ኦሊዳስ።

26 ናባጼ ና ኢዮርባኦሜይ ኦሊዳ ናጋራኔ ኢሰራኤል አሳ ኦሲሲዳ ናጋራ ኦሚሬይ ካሊዳስ፤ ሄ ኤቃ ጸሳሰ ጎይኒዛ ሃኖታይ ጎዳ ኢሰራኤል ጸሳ ሃንቄሊዳስ።

27 ኦሚሬይ ሃኒዳ ሃራ ሃኖታይ፡ ኢዚ ኦሊዳ ኦሶቲኔ ኢዛ ሚኖቲላይ ኢሰራኤል ካዎታ ታሪኬ ማጻፋን ጻፊቲ ኡቲዳስ።

28 ኦሚሬይ ሃይቂዲ ባ ኦዋታን ጋይቲዳስ፤ ሳማሪያ ካታማንካ ሞጌቲዳስ። ኢዛ ና አካቤይ ኢዛሶሆን ካዎቲዳስ።

ኢስራኤል ካዎ አካቤ

29 የሁዳ ካዎ አሲ ካዎቲዳ 38 ላይላን ኦሚሬ ና አካቤይ ኢስራኤልን ካዎቲዳስ፤ ኦሚሬ ና አካቤይ ሳማሪያ ካታማን ኢስራኤል ቦላ 22 ላይላ ካዎቲዳስ።

30 ኦሚሬ ና አካቤይ ባፔ ካሴ ዎዴ ዴኢዳ ካዎታ ኡባታይሳፊካ አጂዳ ኢታ ሚሽ ጎዳ ሲንላን ኦሊዳስ።

31 ናባጼ ና ኢዮርባኦሚይ ኦሊዳ ናጋራ ላፋ ሚሽ ጊዲ ቆፎ ጸላ ጊደንታ ሲደናታ ካዎ ኤቲባኦሌ ናዮ ኤልዛቤሎ ባስ ማቾ ኤኪዲ ባኦሌ ጌቲቲዛ ኤቃ ጸሳስ ሃጋዚዳሲኔ ጎይኒዳስ።

32 ሳማሪያ ካታማን ኢዚ ኬጲሲዳ ኤቃ ጸሳ ባኦሌ ኬላን ያርሾ ያርሽዛሶ ኬጲዳስ።

33 ቃሴ አካቤይ አሽሮ ጌቲቲዛ ጸሳይ ሚስሌ ኤሲዲ ባፔ ካሴ ዴኢዳ ካዎታ ኡባታፔ ኦሊዲ ጎዳ ኢስራኤል ጸሳ ሃንቄሊሲዛ ናጋራ ኦሊዳስ።

34 አካቤ ካዎቲላ ዎዴ ቤቴሌፔ ዩዳ ሂኤሌይ ኢያርኮ ካታማ ዛሪ ኤሲዳስ። ናቄ ና ኢያሶ ባጋራ ጎዳይ ዮቲዳ ማላ ሂኤሌይ ኢያርኮ ኬጸናስ ዮቾ ዩጊዛ ዎዴ ኣብራማ ጌቲቲዛ ኢዛስ ባይራ ናዚ ሃይቂዳስ፤ ጊምቤ ፔንጌታ ጌልሊዛ ዎዴ ሳጉቤ ጌቲቲዛ ኢዛስ ዉርሴላ ካሎ ናዚ ሃይቂዳስ።

17

ኤላሳ ቁርቲ ሚዚዳ

1 ጋላኦዴን ቱሲቤ ጌቲቲዛሶፔ ዩዳ ናቤ ኤላሲ ካዎ አካቤስ፤ «ታኒ ኢዛስ ኦሊዛ ጎዳ ኢስራኤል ጸሳይ ቤዪን ሃይሳፊ ያና ላይላታን ታኒ ዮቶንታ ዲሺን ሳኦን ኢራይ ቡኬና ዎይኮ ጸዛይካ ጸዛቴና» ጊዳስ።

2 ሄሳፊ ሲሚን ጎዳ ቃላይ ናቤ ኤላሳኮ ዩዲ ኢዛስ፤

3 «ሃይሳፊ ዴንዳዳ ኣርሼይ ሞኪዛ ባጋ ባ፤ ሄን ዮርዳኖሴ ሻፋፔ ኣርሼይ ሞኪዛ ባጋራ ዲዛ ኮራቴ ሻፋ ማታን ቆቴታ።

4 ኔኒ ሄ ሻፋፔ ሃላ ኡያና፤ ቁርቲ ኔና ሄን ቁማ ሚዛና ማላ ታኒ ኢስታ ኣዛዛዲስ» ጊዳስ።

5 ኤላሲካ ጎዳይ ጊዳ ማላ ቢዳስ፤ ዮርዳኖሴ ሻፋፔ ኣርሼይ ሞኪዛ ባጋራ ዲዛ ኮራቴ ሻፋ ቢዲ ሄን ኡቲዳስ።

6 ማላዶኔ ኦማርስ ቁርቲ ኡኬሊኔ ኣሾ ኤላሳስ ኤሂዳ፤ ሃሊካ ሄ ሻፋፔ ኡዪሼ ዴኢዳስ።

7 ቢታን ኢራይ ቡኮንታ ኣጊዳ ጊሻስ ጉላ ዋዴፔ ጉዬ ሻፋዚ ማሊዴስ።

ኤላሳኔ ሲራፍታን ዲዛ ኣምኤዮ

8 ሄሳፌ ጉዬ ጎዳ ቃላይ ኤላሳኮ ዪዲ፥

9 «ሃይሳፌ ዴንዳዳ ሲዶናን ዲዛ ሲራፍታ ባዳ ሄን ዴኣሻ። ኢሲ ኣምኤ ማጫሳያ ኔና ቁማ ሚዛና ማላ ታኒ ኣዛዛዲስ» ጊዴስ።

10 ሄሳፌ ጉዬ ኤላሲ ዴንዲዲ ሲራፍታ ቢዴስ፤ ኢዚ ቢዲ ካታማ ፔንጌ ጋኪዳ ማላ ኢሲ ኣምኤ ማጫሳያ ሚላ ማጸዛር ዴሚዴስ፤ ኤላሲ ኢዞ ጳይጊዲ፥ «ዛይ ታስ ኡያና ሃላ ኤካ ያርኪ!» ጊ ዋሲዴስ።

11 ማጫሲያ ሃላ ኤሃናስ ቢሺን ኢዚ ኢዞ ጳይጊዲ፥ «ዛይ ታስ ኣይኮ ባጂዛ ሚሽ ኤካ ያርኪ!» ጊዴስ።

12 ሂስቲን ማጫሳያ ኢዛስ፥ «ጎዳ ኔ ጳሳይ ቤዪን ታስ ኦቶን ዲዛ ኩጳ ጳሌደፌኔ ጳርን ዲዛ ጉላ ዛይቴይፔ ኣቲን ሃራይ ኣይኮይካ ዴና። ታኒ ሃይሳ ዪዳይ ጉላ ሚላ ሚጳ ሶ ሲማዳ ሂናካ ታኒኔ ታ ናዚ ኢሲቶ ኡኪ ሚዲ ሃይቃናሳ» ጋዲስ።

13 ኤላሲካ ማጫሳይስ ዛሪዲ፥ «ኣይኮይ ባዋ፥ ያዮፋ፤ ሶ ባዳ ኔ ጊዳ ማላ ኦፋ፤ ጊዶ ኣቲን ካሴታዳ ኔ ጳሌፌ ጉላ ኡኬላ ኡካዳ ታስ ኤካ ያ፤ ሄሳፌ ጉዬ ኔሲኔ ኔ ናዛስ ኡካ።

14 ጋሶይካ ጎዳ ኢስራኤሌ ጳሳይ፥ «ጎኣ ሶላን ጎዳይ ኢራ ቡኪሳና ጋካናስ ጳሌዚ ኦቶፔ ወሬና፤ ዛይቴዚካ ጳርፔ ሙሌካ ወሬና፤ ጌስ» ጊዴስ።

15 ማጫሲያካ ባዳ ኤላሲ ዮቲዳ ማላ ኦፋዲስ፤ ሄሳ ማላን ኤላሲ፥ ኣምኤያኔ ኢዚ ሶ ኣሳይ ዳር ዋዴስ ጊዲዛ ካላ ዴሚዳ።

16 ኣይስ ጊኮ ጎዳይ ኤላሳ ባጋራ ዮቲዳ ቃላ ማላ ኦቶፔ ጳሌይ ወሪቤናኔ ጳርፔ ዛይቴይ ሙሌካ ወሪቤና።

17 ጉላ ዋዴፔ ጉዬ ሄ ኣምኤይ ናይ ሃርጊዴስ፤ ሃርጊዚ ሚኒ ሚኒ ቢን ናዚ ሃይቁዴስ።

18 ማጫሳያ ኤላሳ፥ «ሃይሶ ጳሳ ኣሶ! ታ ኔስ ኣይ ኢታ ኦፋዲና? ኔኒ ታ ናጋራ ታና ሃሳኢሳዳ ታ ናዛ ዋፋናስ ታኮ ያዲ?» ጋዲስ።

19 ኤላሲካ ኢዚስ ዛሪዲ፥ «ኣኔ ናዛ ታስ ሃማ» ጊዴስ። ናዛ ኢዚ ኪኦፔ ኤኪዲ ፑዴ ባ ዴኢዛ ፖቄ ኬሲዲ ባ ሂጸን ኢሺሲዴስ።

20 ሂሰቲዲ ጎዳስ፡ «አቤት ጎዳው፡ ታ ጸሳው፡ ቃሴ ሃኖ ታኒ ኢዚኮን ዴኢዛ አምኤ ሚሺራይ ናዛ ዋዳዳ ኢዚ ቦላካ ማቶ ኤሃይ?» ጌዲ ዋሲዴስ።

21 ሂሳፌ ሲሚዲ ናዛ ቦላ ሄሹቶ ዛቁሊዲ ጎዳስ፡ «አቤት ጎዳው፡ ታ ጸሳው! ሃ ናዛ ሼምፖ ዛራ» ጌዲ ዋሲዴስ።

22 ሂሰቲን ጎዳይ ኤላሳ ዋሶ ሲዱዴስ። ናዛ ሼምፖይካ ሲሚን ናዚ ፓጺዴስ።

23 ኤላሲ ናዛ ኤኪዲ ፖቄዛፔ ዱጌ ዋዲዴስ፤ ናዛ አዬይሰ አሚዲ፡ «ቤኣ! ኔ ናዚ ፓጺዴስ» ጌዴስ።

24 ሂሳፌ ጉዬ ሚሺሬያ ኤላሳ፡ «ኔኒ ጸሳ አሰ ጌዲዳይሳኔ ኔ ደናፔ ኬዚዛ ጎዳ ቃላይ ቱሙ ጌዲዳይሳ ታኒ ሃኢ ኤራዲስ» ጋዲስ።

18

ኤላሳኔ ባኣሌ ናቤታ

1 ኢራይ ዳዮሶፌ ሄሸንሉ ላይላን፡ ዳር ዋዴፔ ጉዬን ጎዳይ ኤላሳ፡ «ባዳ ካዎ አካቤስ ቆንጫ። ታኒ ሃ ቢታ ቦላ ኢራ ቡኪሳና» ጌዴስ።

2 ሂሰቲን ኤላሲ አካቤስ ቤታናስ ዴንዲ ቢዴስ።

3 ሄ ዋዴ ሳማሪያን ዋልቃማ ኮሻይ ዴስ።

4 አካቤይ ባ ካዎቴላ ኬላን አላፌቴላን አዛዚዛ አብዲዩ ጴይጌዴስ። አብዲዩይ ጎዳስ ኬሂ ያዩዛ አሳ።

5 ኤልዛቤላ ጎዳ ናቤታ ዋዲሲዛ ዋዴ አብዲዩይ ኢስታፌ ጴታታ ኤኪዲ ናምኤ ኬሲ ሻኪዴስ፤ ኢቻሽ ታማታ ኢሲ ጎንጎሎን ሃንኮ ኣቲዳ ኢቻሽ ታማታ ሃራ ጎንጎሎን ኤፊ ቆቲዲ ካፈኔ ሃል ኢስታስ አሚሼ ጋምኢዴስ።

6 አካቤይ አብዲዩ ጴይጌዲ፡ «ኦኒ ኤሪዜ ኮኒ ማታ ዴሚዲ ፓራታኔ ባቁሎታ ዋዲንታ ማላ አሻናኮ ሳኣን ፑልቶይ ዲዛሶ ኡባኔ ሻፋይ ዲዛሶ ኡባ ባ» ጌዴስ።

7 ሄሳ ጌሻስ ባ ባናሶ ባናሶ ሻኬቲ ቢዳ፤ አካቤይ ኢሲ ባጋራ ባርካ ቢዴስ፤ ቃሴ አብዲዩይካ ሃራ ባጋራ ቢዴስ።

8 አብዲዩይ ቢሼ ኦጌ ቦላ ኤላሳራ ጋይቲዴስ። አብዲዩይ ኤላሳ ጌዲዳይሳ ኤሪዲ ቢታ ቦላ ጉፋኒዲ፡ «ታ ጎዳ ኤላሳ! አዳፌ ሃይሲ ኔኔ?» ጌዴስ።

9 ኤላሲ ኢዛስ፡ «ኤ ታናኮ! ኔኒ ባዳ፡ «ኤላሲ ሃይሳን ዴስ» ጋዳ ኔ ጎዳስ ዮታ» ጌዴስ።

9 ሂስቲን አብዲዩይ ኤላሳስ፡ «ታኒ ኔና አይ ቆሂኔ ኔኒ ታና ኔ አይሌዛ ሃይቃና ማላ አካቤ ኩሼን አላ አሚዛይ?

10 ኔ ጎዳይ ዴኦ ጸሳይ ቤዪን ታ ጎዳይ ኔና ኮይሳናስ ከቶንታ ዴሬይ ዎይኮ ካዎቲሊ ሙሌካ ባዎ። ኢሰቲ፡ «ኤላሲ ሃይሳን ዴና» ጊዛ ዎዴ ኔኒ ሃይሳን ባይንዳይሲ ቱማ ጊዲዳይሳ ኤራናስ አካቤይ ዴሬ ሃሪዛይታ ጫቂሲዴስ።

11 ሃኢ ታኒ ታ ጎዳኮ ባዳ፡ «ኤላሲ ሃይሳን ዴስ» ጋና ማላ ኔ ኮያሳ።

12 ታኒ ኔፔ ሻኬታ ቢዛ ዎዴ ጎዳ አያናይ ኔና ዴንሊዲ አዋ ኤፋናኮ ታ ኤሪኬ፤ ታኒ አካቤስ ዮቲዳፔ ጉዬ ኢዚ ኔና ዴሞንታ አጊኮ ታና ዎዳና፤ ታኒ ኔ አሽካራይ ናቴላፌ ዶማዳ ጎዳስ ያዩዛ አሳ።

13 ኤልዛቤላ ጎዳ ሱንላን ቲንቢቲ ዮቲዛይታ ዎዲሲዛ ዎዴ ታኒ ኢሰታፌ ጾቱ አሳታ ኤካዳ ኢቻሽ ታሙ ኢቻሽ ታሙ ኢሲ ጎንጎሎን ቆታዳ ቁማ ሚዛዲሲኔ ሃሊካ ኡሻዲሲ። ሂስቲን ሄሳ ታኒ አሊዳይሳ ኔኒ ታ ጎዳይ ሲያቤኪ?

14 ሃኢ ታኒ ታ ጎዳኮ ባዳ፡ «ኤላሲ ሃይሳን ዴስ» ጋና ማላ ኔ ኮያሳ፡ ሂስቲኮ ኢዚ ታና ዎዳና» ጊዴስ።

15 ኤላሲካ ኢዛስ፡ «ታኒ ኢዛስ አዛዜቲዛ ኡባፌ ዎልቃማ ጎዳይ ቤዪን ቱማፔ ታኒ ሃቕ አካቤ አይፌን ቤታና» ጊዴስ።

16 አብዲዩይ አካቤራ ጋይታናስ ቢዲ አካቤስ ዮቲን አካቤይ ኤላሳራ ጋይታናስ ቢዴስ።

17 አካቤይ ኤላሳ ዴሚዲ፡ «ኢሰራኤሌ ቢታ ቡልኣካ ካኢዛይ ኔኔ?» ጊዴስ።

18 ኤላሲ አካቤስ፡ «ጎዳ አዛዞ አጊዲ ባኣሌ ኤቃታስ ጎይኒዲ ቢታ ቡልኣኪዛይ ኔናኔ ኔ አዋ ሶ አሳ አቲን ኢሰራኤሌ ቢታ ቡልኣኪዛይ ታና ጊዲኬ።

19 ሃኢ ኢሰራኤሌ አሳ ኡባ ቃርሜሎሴ ዙማ ቦላ ታናራ ጋይታና ማላ ጸይጋ፤ ቃሴ ኤልዛቤሊ ማዳፌ ሚዛይታ 450 ባኣሌ ናቤታኔ 400 ኣሼሪ ናቤታ ሺሻ» ጊዴስ።

20 ሄሳ ጊሻስ አካቤይ ከቲዲ ኢሰራኤሌ አሳ ኡባኔ ናቤታ ቃርሜሎሴ ዙማ ቦላ ሺሺዴስ።

21 ኤላሲ ሸቂዳ አሳኮ ቢዲ፡ «ኢንቲ አይዴ ጋካናስ ናሞኡ ቆፋን ዳኔ? ጎዳይ ጸሳ ጊዲኮ ኢዛ ካለቲ! ዎይኮ ባኣሊይ ጸሳ ጊዲኮ ኢዛ ካለቲ» ጊዴስ። ዴሬዚ ጊዲኮ ኢሲ ቃላካ ቃቲቤና።

22 ሄሳፌ ጉዬ ኤላሲ ዴራስ፡ «ጎዳ ናቤታፔ ታ ጸላ አታዲስ፤ ባኣሌስ ኦይዱ ጾታኔ ኢቻሽ ታሙ ናቤቲ ዴቲስ።

23 እኔ ኩስ ናምኡ ኮርማ ቦራታ ኢሚቲ፤ ሄ ኮርማታፔ ኢሳ ኢስቲ ዶሬቶ፤ ኮርማ ሹኪዲ ቃንጾሬጮቶ፤ ሂስቲዲ አሾዛ ሚላ ቦላ ዋፊቶ፤ ጊዶ አቲን ታማ ኤሶሬቶ። ታኒካ ናምእንላ ኮርማ ጊጊሳዳ ሚላ ቦላ ዋላና፤ ሂስታዳ ታማካ ኤሲኬ።

24 ኢንቲ ኢንቲ ጸሳ ሱንላ ጾይጊቲ፤ ታኒካ ጎዳኮ ዋላና፤ ሱንላ ጾይጊን ሲዪዲ ያርሾዛ ሚዛ ታማ ከቲዛይሲ ጸሰ ጊዶ» ጊዳሰ። ሂስቲን አሳይ፤ «ሃይሲ ሎኦ ቆፋ» ጊዲ ኤኪዳሰ።

25 ሄሳ ጊሻሰ ኤላሲ ባኣሌ ናቤታሰ፤ «ኢንቲ ጮራ ጊዲዳ ጊሻሰ ኢሲ ኮርማ ዶሪ ኤኪዲ ኮይሮቲ ጊግሲቲ። ሂስቲዲ ኢንቲ ጸሳ ሱንላ ጾይጊቲ አቲን ኢዛን ታማ ኤሶፍቲ» ጊዳሰ።

26 ኢስቲ ባሰ ኢሚቲዳ ኮርማ ኤኪዲ ጊግሲዳ። ማላዶፔ ሴታ ጋላሰ ጋካናሰ ባኣሌ ሱንላ ጾይጊዲ፤ «ሃኢ ባኣሌ! ኩ ዋሳ ሲያ» ጊዲ ዋሲዳ፤ ጊዶ አቲን ሲዬቲዛ ጩንጉርሲ ዳና፤ ዛሮ ኢሚዛይካ ዳና። ሂስቲን ባንቲ ጊግሲዳ ያርሺዛሶ ዱሪሽ ዩዪዳ።

27 ሳኣይ ሴታ ጋላሰ ጊዲን ኤላሲ፤ «ኢንቲ ቃላ ቆቁ ሂስቲዲ ዋሲቲ! ኢዚ ጸሰ ጊዳኔ! ኢዚ ቆፋን ሹኪዳኮ ኦኔ ኤሪዛይ፤ ዋይኮ ኢዛሰ ኦሶይ ዳሪዳኮ፤ ዋይኮ ማንዳሪዳኮ፤ ዋይኮ ጳሰኪዳ ጊዲኮ ዳንፋናሰ ኮሼሰ!» ጊዲ ኢስታ ቦላ ቂልጪ ካኢዳሰ።

28 ሄሳ ጊሻሰ ባንታ ቃላ ቆቁ ሂስቲዲ ዋሲዳ። ቃሴ ካሴ ባንታ ጎይኒዛ ዋጋ ማላ ባንታ ቦላራ ሱላይ ጎጋና ጋካናሰ ቶራኒኔ ማሻን ባና ማዲንላዳ።

29 ሴታ ጋላሲ አጲን ኦማርሳ ያርሾ ሺሺዛ ዋዳይ ጋካናሰ ኢስቲ ሃፓኔ ቡራ ቲንቢቲ ሃሳይዳ ሺን አይኮ ዛሮካ ዳሚቤቲና፤ ኢስታ ጩንጉርሳ ሲዪዲ ዛሮ ኢሚዛይ ሳዋ።

30 ሂስቲን ኤላሲ ኡባ አሳሰ፤ «ሃ ታኮ ሸቂቲ» ጊን አሳይ ኢዛኮ ሸቂዳሰ፤ ጎዳሲ ያርሾ ያርሺዛሶዚ ላሊቲዳይሳ ዛሪ ጊምቢዳሰ።

31 ጎዳ ቃላይ ያቆቤኮ ዪዲ፤ «ኔ ሱንላ ኢስራኤሌ ጌቲታና» ጊዲ ዮቲዳ ያቆቤ ናይታ ቆሞታ ቆዳን ኤላሲ ታማኔ ናምኡ ሹቻታ ኤኪዳሰ።

32 ሂስቲዲ ጎዳ ሱንላሰ ሄ ሹቻታን ያርሾሶሆ ጊምቢዳሰ፤ ያርሾ ያርሺዛሶዚ ዩዪ ኣቆናሰ ታማኔ ኦይዱ ሊቲሮ ሃላ ኦይኪዛ ኦላ ቦኪዳሰ።

33 ሄሳፌ ጉዬ ያርሾ ያርሺዛሶዚ ቦላ ሚላ ጊግሲ ዋሊዲ ኮርማ አሾዛ ቆሞን ቆሞን ቃንጾሬሊዲ ሚላ ቦላ ዋሊዳሰ። ሂስቲዲ

አሳ፡ «ኦይዱ ባላታን ሃሐ ኩንሊዱ ጹጋና ያርሾዛ ቦላኔ ሚላ ቦላ ጉሲቱ» ጊን ኢሰቲ ጉሲዳ።

34 ዛሬዲካ ኤላሲ አሳታ፡ «ናምእንሶካ ጉጂቱ» ጊን ኢሰቲ ናምእንሶካ ጉጂዳ።

ቃሴካ ኤላሲ አሳታ፡ «ሄቸንሶካ ጉጂቱ» ጊን ሄቸንሶካ ጉጂዳ።

35 ሃላይ ያርሾ ያርሺዛሶ ኦላ ኩሚ ጎጊዴስ።

36 ኦማርሳ ዋዴ ያርሾ ሺሺዛ ዋዴይ ጋኪን ናቤ ኤላሲ ያርሾሶሆ ሺቂዱ፡ «እቤት ጎዳዉ! ኣብራሃሜ ጸሳዉ፡ ዪሳቃ ጸሳዉ፡ ኢሰራኤል ጸሳዉ፡ ኔኒ ኢሰራኤል ጸሳ ጊዲዲይሲ፡ ታኒካ ኔ ኣይሌ ጊዲዲይሲኔ ታኒ ሃይሳ ኡባ ኔ ቃላን ኦሊዲይሲ ሃቶ ኤሬቶ።

37 እቤት ጎዳዉ! ኔኒ ጎዳይ ቱማ ጸሳ ጊዲዲይሳኔ ኔኒ ኢሰታ ዋዚና ኔኮ ዛሮ ቦላ ዲዛይሳ ሃ አሳይ ኤራና ማላ ኔኒ ታ ዋሳ ሲያ፤ ሲያዳካ ታሰ ዛሮ አማ!» ጊዴስ።

38 ሂሰቲን ጎዳ ታማይ ዋዲዱ ጸጊዛ ያርሾ፡ ሚላ፡ ሹቻኔ ቢታ ሚዴስ፤ ኦላ ጊዶን ዲዛ ሃላካ ላጨዴስ።

39 አሳይ ኡባይ ሄሳ ቤኢዳ ዋዴ ጉፋኒዱ፡ «ጎዳይ ጸሳ! ጎዳይ ኢዚ ጸላ ቱሙ ጸሳ!» ጊዳ።

40 ሄሳፌ ጉዬ ኤላሲ ኢሰታስ፡ «ባኣሌ ናቤታ ኦይኪቱ። ኢሰታፌ ኢሲ ኣሲካ ኬሲ ኤኪ ቦፖ» ጊዴስ፤ ሂሰቲን ዴሬዚ ኢሰታ ኦይኪዴስ፤ ኤላሲ ኢሰታ ቂሶኔ ሻፋ ኤፊዱ ሹኪሲዴስ።

ጎዳይ ኢራ ቡኪሲዴስ

41 ኤላሲ ኣካቤስ፡ «ዋልቃማ ኢራ ጉንላይ ሲዬቲዛ ጊሻሰ ኬዛ ባዳ ማ፡ ኡያ» ጊዴስ።

42 ሄሳ ጊሻሰ ኣካቤይ ማናሲኔ ኡያናሰ ቢዴስ። ጊዶ ኣቲን ኤላሲ ቃርማሎሴ ዙማ ዴራ ኬዚዱ ባ ሁኤ ጉልባቲታ ጊዶ ዲጌ ጌልሊዱ ጸጉኒዴስ።

43 ሄሳፌ ጉዬ ኤላሲ ባ ኣሽካራ፡ «ባ፤ ፑዴ ኬዛዳ ኣኔ ኣባኮ ዛራ ዴላ» ጊዴስ።

ኣሽካራዚካ ቢ ዴሊዱ ኢዛስ፡ «ኣይኮይካ ዴና» ጊዴስ።

ኤላሲ ባ ኣሽካራ፡ «ባዳ ዴላ» ጊዱ ላፑንቶ ኣዛዚዴስ።

44 ኣሽካራዚ ላፑንሶዛን፡ «ቤኣ! ኣሳ ኩሼ ኬና ሻራይ ኣሳፌ ኬዚሼ ዴስ» ጊዴስ።

ሂስቲን ኤላሲ ባ አሸካራ፡ «ባ፤ ባዳ አካቤ፡ ሲራይ ኔና ቤል ዲሳንታ ማላ ኔ ፓራ-ጋሪን ኡታዳ ዱጌ ኔ ሶ ዋፉ» ጋዳ ዮታ» ጊደሰ።

⁴⁵ ጉል ጋምኢሺን ኢራ ሻራይ ሳሎ ጂፒ ሂስቲደሰ፤ ጫርኮይ ጫርኪደሰ፤ ዋልቃማ ኢራይካ ቡኪደሰ። አካቤይ ፓራ-ጋሪን ኡቲዱ ኢዘራኤል ካታማ ቢደሰ።

⁴⁶ ጎዳ ዋልቃይ ኤላሳ ቦላ ዋጂደሰ፤ ኤላሲ ባ ማይኦ ፑዴ ማርጺዱ ኢዘራኤል ካታማ ጋካናሰ አካቤ፤ ሲንፋን ሲንፋን ዋጺደሰ።

19

ኤልዛቤሊፕ ኤላሲ ቤትዳ ቤቲ

¹ ኤላሲ ኦሲዳ ኦሶ ኡባ፡ ባኣሌ ናቤታካ ጊላ ማሻን ኢዚ ዋስቲ ዋጂሲዳኮ አካቤይ ኤልዛቤሊሰ ዮቲደሰ።

² ሂስቲን ኤልዛቤላ፡ «ኔኒ ሄ ናቤታ ቦላ ኦሶይሳላ ታኒካ ኔ ሸምፖ ዋንቶ ሃኒ ዋዴ ኢዚላ ኦሶንታ አጊኮ ጸሳቲ ሄሳፊካ አጂዛ ኢታ ታ ቦላ ጋፊቶ» ጋዳ ቃስታኔ ኤላሳሰ ዬዳዱሰ።

³ ሂስቲን ኤላሲ ባቢዱ ባ ሸምፖ አሻናሰ ዩሁዳ ቢታን ዲዛ ቤርሳቤሄ ጋካናሰ ቤቲደሰ፤ ባ አሸካራካ ሄን አጊደሰ።

⁴ ኢሲ ጋላሳ ኦጌ ባዞን ሄሜቲደሰ። ቢሼ ሳንካራ ሚላ ኩዋ ጋርሳን ኡቲዱ፡ «አቤት ጎዳዉ! ታስ ጊዳና፤ ታኒ ታ አዋታፔ አጂኬ። ታ ሸምፖኖ ኔ ኤካ» ጊዱ ሃይቆ አሞቲ ዋሲደሰ።

⁵ ሄሳፌ ጉዬ ሳንካራ ኩዋን ኢቺዱ ጂሰኪደሰ፤ ኢዚ ሄን ጂሰኮን ዲሺን ኢሲ ኪታንቻይ ኢዛ ቦቺዱ፡ «ዴንዳዳ ሃይሳ ማ» ጊደሰ።

⁶ ሂስቲን ዴንዲዱ ኢዚ ጸሊዛ ዋዴ ሴላን ኡኬቲዳ ኮምፓኔ ኦቶራ ዲዛ ሃል ባ ሁኤሶፔ ዴሚደሰ፤ ኢዛፔ ሚ ኡዩዳፔ ጉዬን ሲሚ ጂሰኪደሰ።

⁷ ጎዳ ኪታንቻይ ናምኣንሐካ ዩ ኤላሳ ቤጎሊዱ፡ «ኔኒ ባናሶይ ሃሆ ጊዱዳ ጊሻሰ ዴንዳዳ ማ» ጊደሰ።

⁸ ሂስቲን ኤላሲ ዴንዲዱ ሚደሰኔ ኡዩደሰ። ኤላሲ ካላ ሚ ሚኒዱ ጸሳ ዙማ ኮሬቤ ጋካናሰ ኦይዱ ታሙ ጋላሲኔ ኦይዱ ታሙ ኦማርሰ ሄሜቲደሰ።

⁹ ሄን ዲዛ ጎንጎሎ ጊዶ ጌሊዱ አቂደሰ።

ኤላሳሰ ጎዳ ቆንጩል

ጎዳ ቃላይ ኢዛኮ ዩዱ፡ «ኤላሳ! ሃይሳን ኣይ ኦላይ?» ጊደሰ።

10 ሂሰቲን ኤላሲ፥ «ኡባፌ ዋልቃማ ጎዳ ጸሳስ ታኒ ኬሃ ዚልኤታዲስ፤ ጋሶይካ ኢስራኤሌ አሳይ ኔናራ ጫቄቲዳ ጫቆዛ ማንሊዳስ፤ ኔስ ያርሾ ያርሺዛሶሆታካ ላሊዳስ፤ ኔ ናቤታካ ጊላ ማሻን ዋዲዳስ፤ ታኒ ታርካ አታዲስ ሺን ሃኢ ታናካ ዋዳና ኮዬቲስ» ጊዳስ። *

11 ጎዳይ ኢዛስ፥ «ሄሳፌ ኬዛ ባዳ ዙማ ጸራን ታ ሲንፋን ኤቃ፤ ጎዳይ ሄራ አዳና» ጊዳስ። ሄሳፌ ጉዬ ዋልቃማ ጫርኮይ ዙማታ ጳልቄሬዲዳስ፤ ዛላታካ ኪንቼሬዲ ዬጊዳስ፤ ጎዳይ ጊዲኮ ሄ ጫርኮዛ ጊደን ዴና። ሄ ጫርኮዛ፤ ሲሚን ቢታይ ቃጸዳስ፤ ጎዳይ ሄ ቢታ ቃላንካ ዴና።

12 ቢታ ቃላፌ ሲሚን ታማይ ኬዚዳስ፤ ጊደ አቲን ጎዳይ ታማ ጊደን ዴና። ታማ፤ ሲሚን ሳሱኩላ ጨንጉርሲ ሲዬቲዳስ።

13 ኤላሲ ሄሳ ሲዬዲ ባ ማይኢዳ ሃሼ ማይኦን ባ አይፌሶ ካሚዳስ። ሂሰቲዲ ካሬ ኬዚ ጎንጎሎዛ ፔንጌን ኤቂዳስ።

ሄሳፌ ጉዬ፥ «ኤላሳ! ሃይሳን አይ ኦላይ?» ጊዛ ጨንጉርሲ ሲዬዳስ።

14 ኤላሲ ዛሪዲ፥ «ኡባፌ ዋልቃማ ጎዳ ጸሳስ ታኒ ኬሃ ዚልኤታዲስ፤ ጋሶይካ ኢስራኤሌ አሳይ ኔናራ ጫቄቲዳ ጫቆዛ ማንሊዳስ፤ ኔስ ያርሾ ያርሺዛሶሆታካ ላሊዳስ፤ ኔ ናቤታካ ጊላ ማሻን ዋዲዳስ፤ ታኒ ታርካ አታዲስ ሺን ሃኢ ታናካ ዋዳና ኮዬቲስ» ጊዳስ።

15 ሂሰቲን ጎዳይ ኤላሳስ ዛሪዲ፥ «ኔ ካሴ ዪዳ ኦጌዛራ ሲማዳ ዳማስቆ ባዙ ባ። ሄ ባ ጋካዳ አዛሄሌይ አራሜ ቦላ ካዎታና ማላ ኢዛ ቲያ።

16 ቃሴካ ኒሚሼ ና ኢዩ ኢስራኤሌ ቦላ ካዎታና ማላ ቲያ። ሄሳሶካ ኔ ሶሆን ናቤ ጊዳና ማላ አቤሊ-ማሆሌ ዴሬ አስ ሳፋጾ ና ኢልሳኤ ቲያ።

17 አዛሄሌ ማሻፌ ኬሲ ኤኪ አቲዳይሳ አዩይ ዋዳና፤ ቃሴ አዩ ማሻፌ ኬሲ ኤኪ አቲዳይሳ ኤልሳኤ ዋዳና።

18 ባኣሌስ ጉልባቶንታይታኔ ባ ዶናን ባኣሌ ጌቲቲዛ ኤቃ ሚሰሌዛ ዬርንታ አቲዳ 7,000 አስ ታኒ ኢስራኤሌን ታስ አሻና» ጊዳስ።

ኤልሳኤ ጴይጌቲል

* 19:10 ዚልኤታዲስ ጊዛይሳ ኢሲ ኢሲ ባጋ ጋሞላ ቃላን ሚሺታዲስ፥ ቃናታዲስ ጌቲስ። 19:10 ኦሮ 11:3 19:15 2ካዎ 8:7-13 19:16 2ካዎ 9:1-6 19:18 ኦሮ 11:4

19 ኤላሲ ሄፔ ዴንዲ ቢሺን ሳፋጾ ና ኤልሳኢ ታማኔ ናምኡ ዋጸ ቦራን ጎዩሺን ዴሚዴስ፤ ታማኔ ናምኡንሳ ዋጸ ቦራታን ኤልሳኢ ጎዩስ። ኤላሲ ኢዛኮ ሺቂዲ ባ ሃሼ ማይኦ ኢዛ ቦላ ዩጊዴስ።

20 ኤልሳኢ ቦራታ ኣጊዲ ኤላሳኮ ዋጸ ቢዲ፡ «ታኒ ታ ኣዋኔ ታ ኣዮ ሳሮ ጋዳ ዋይሴታ ሰማዳ ታ ኔና ካላና ማላ ታና ዩዳርኪ!» ጊዴስ።

ሂሰቲን ኤላሲ ኤልሳኤ፡ «ባዳ ያ! ታ ኔና ኣይዴ ዲጋዲና?» ጊዴስ።

21 ሄሳ ጊሻስ ኤልሳኢ ኣጊ ጉዬ ሰሚዲ ናምኡ ቦራታ ሹኪዴስ፤ ቦራ ሚሻታ ቄሪዲ ኢዛን ኣሾዛ ደይሲዴስ፤ ሄ ካጺዳ ኣሾዛ ዴራስ ኣሊን ኣሳይ ሚዴስ። ሄሳፌ ጉዬ ዴንዲ ቢዲ ኤላሳ ካሊዴሲኔ ኤላሳ ማዲዴስ።

20

ኣራሜ ካዎ ቤኒ-ሃዳዴይ ሳማሪያ ቦላ ዴንሊዳ ኦላ

1 ኣራሜ ካዎ ቤኒ-ሃዳዴይ ባ ኦላንቻታ ኡባ ኢሲፌ ሺሺዴስ። ሄሹ ታማኔ ናምኡ ካዎታን፡ ኢስታ ፓራታኒኔ ፓራ-ጋሪታን ማዴቲዲ ፑዴ ቢዲ ሳማሪያ ካታማ ዋራጂ ደዲዴስ።

2 ጌዴ ካታማ ጊዶ ኢስራኤሌ ካዎ ኣካቤኮ ቃስታኔታ ኪቲን ኢስቲ ቢዲ፡

3 «ቤኒ-ሃዳዴይ፡ ሳ ቢራይኔ ኔ ዋርቃይ ታሳ፤ ኔ ማቼታፔኔ ኔ ናይታፔ ሎኢዛይቲ ታሳ» ጊዳ።

4 ሂሰቲን ኢስራኤሌ ካዎይካ ዛሪዲ፡ «ኤ፡ ታ ጎዳ ካዎ! ኔኒ ጊዳ ማላ ታኒካ ታስ ዲዛ ኡባይ ኔሳ» ጊዴስ።

5 ቃሴካ ቃስታኔቲ ናምኡንሳ ዩዲ፡ «ኔና ቤኒ-ሃዳዴይ፡ ሳኒ ካሴ ኔናኔ ኔ ቢራ፡ ኔ ዋርቃ፡ ኔ ማቼታኔ ኔ ናይታ ታስ ሼፋና ማላ ኪታዲስ።

6 ሄሳሳካ ዋንቶ ሃኒ ዋዴ ኔ ካዎቴላ ኬላኔ ኔ ሹሜታ ኬላ ቆጪሪ ጸላና ማላ ታ ሹሜታ ዩዳና። ኢስቲካ ኔስ ዴስ ጊዛ ፓያ ሚሽ ባ ኩሼ ዩዲ ኤካና» ጊዴስ።

7 ኢስራኤሌ ካዎይ ሄ ቢታ ጨማታ ኡባ ጸይጊ ሺሺዲ፡ «ቤኢቲ ሃይሲ ኣዴዚ ኦሽ ኮዩዲ ታ ማቼታ፡ ታ ናይታ፡ ታ ቢራኔ ታ ዋርቃ ኤካናስ ኦይቺን ታ ኢዛ ዲጋቤኬ» ጊዴስ።

8 ሂሰቲን ጨማቲኔ ዴሬዚ ኡባይ ኣካቤ፡ «ኢዚ ጊዛ ሚሽ ሲያዳ ኤኖ ጎፓ!» ጊዳ።

9 ሄሳ ጊሻስ በኒ-ሃዳዴይ ከቲዳ ቃስታኔታስ አካቤይ፡ «አንቲ ታ ጎዳ ካዋዛስ፡ ሄኒ ኮይሮ ከቲዳ ከታ ታኒ ፖላና፤ ጊዶ አቲን ሃኢ ከታ ታኒ ፖላናስ ዳንዳይኬ፡ ጌስ ጊዱ ዮተቱ» ጊዴስ።

ሂስቲን ከቲቲ ዩዳ ቃስታኔቲ ሲሟ በዱ በኒ-ሃዳዴስ ዮተቱ።

10 ሄሳፌ ጉዬ በኒ-ሃዳዴይ ሃራ ቃስታኔታ ዩዱዲ፡ «ታና ካሊዛ እሳ ሳማሪያ ካታማ ጉዱላይ ኢሲ ኢሲ ኩች ጋኪኮ ጸሳቲ ታና ዎጴቶ» ጊዴስ።

11 ኢስራኤል ካዎይ ከቲቲ ዩዳይታስ፡ «ፋጮ አላንቻይ አላፔ ሲሟዱ ጋይሬስ አቲን ቡሮ አላስ ቢሼ ጋይሬና፡ ጊዱ ዮተቱ» ጊዴስ።

12 በኒ-ሃዳዴይ ካዎቲ ባንታ ዱንካኔታ ጊዶን ኡሹ ኡዩሼ ሄሳ ሄ ከታ ሲዩዳ፤ ካዎ በኒ-ሃዳዴይ ባ አላንቻታ፡ «አላስ ጊጌቲቱ» ጊ አዛዚን አላንቻቲ ካታማ አላናስ ጊጌቲዳ።

13 ሄ ዎዶ ኢሲ ናቤይ ኢስራኤል ካዎ አካቤኮ በዱ፡ «ጎዳይ ኔና፡ ሃይሳ ዳሮ አላ እሳ በአይ? ታኒ ሃች ኢስታ ኔ ኩሼን አላ አሟኮ ታኒ ጎዳ ጊዱዳይሳ ኔ ሄሳን ኤራና፡ ጌስ» ጊዴስ።

14 አካቤይ፡ «አላስ ሲንፋቲ ኬዛናይ ኦኔ?» ጊዴስ።

ናቤዚካ፡ «አዉራጃን አዉራጃን ዲዛ አላ ጋዳዋቲ ኬዜቶ» ጊዴስ።

ሂስቲን ካዎይ፡ «አላ ኦኒ ዶሞ ጋይ?» ጊዴስ።

ናቤዚካ፡ «ኔኒ ዶማ» ጊዴስ።

15 ሄሳ ጊሻስ አካቤይ አዉራጃን አዛዚዛ 232 አላ ጋዳዋታ ሺሺዴስ። ቃስ አቲዳ 7,000 ኢስራኤል አላንቻታ ሺሺዴስ።

16 በኒ-ሃዳዴይ ባና ማዲዛ 32 ካዎታራ ኢሲፌ ዱንካኔን ኡቲ ኡዩሼ ማፉቲ ዲሺን ሴታ ጋላስ ኢስራኤል አላንቻቲ አላስ ኬዚዳ።

17 አዉራጃን አዛዚዛ ዬላጋ ሞኮኔቲ አላስ ኮይሮ ኬዚ በዱ።

በኒ-ሃዳዴይ ዩዩ ዎቺዛይታ ከቲን ኢስቲ ሲሟዱ ኢዛስ፡ «ሳማሪያፔ አሳይ ኬዚዱ ዩሼ ዴስ» ጊ ዮተቱ።

18 በኒ-ሃዳዴይካ፡ «ኢስቲ ሳሮስ ጊዲን ዎይኮ አላስ ዩኮካ ኢስታ ሼሞፖራ ፓጻ ኦይኪዱ ሃ ኤሂቱ» ጊዴስ።

19 አዉራጃን አዛዚዛ ዬላጋ ሞኮኔቲ ካታማፔ ጋጻ ኬዚዳ፤ ኢስራኤል አላንቻቲካ ኢስታ ካሊዱ ኬዚዳ።

20 ኡባቲካ ባናራ ቲራን ጋይቲዳ ሞርኬታ ኡባ ዎፏዳ። ሂስቲን አራሜ አሳይ ባቃቲን ኢስራኤል አሳይ ካሊ ካሊዱ ኢስታ ዩዳሊዴስ። ቃስ አራሜ ካዎ በኒ-ሃዳዴይ ቶጋ አሳታራ ባ ፓራን ኬሲ ኤኪዱ በዴስ።

21 ኢስራኤል ካዎ አካቤይ ኦላ ሲንል ሲንል ሱጊ ቢዲ ፓራታኔ ፓራ-ጋሬታ ዲኢ ኤኪዳስ፤ አራማ አሳካ ዲፒ ሂስቲዳስ።

22 ሄሳፌ ጉዬ ናቤዚ ኢስራኤል ካዎኮ ዩዲ፣ «ዪዛ ላይላ ኦፊንሳን አራማ ካዎይ ኔና ኦላናስ ሲሚ ያና ጊሻስ ሚና! ኔ አይ ኦላና ቤሲዛኮ ሻካ ኤራ» ጊዳስ።

አራማ ካዎይ ሳማሪያ ቦላ ዴንሲዳ ናምኣንሶ ኦላ

23 ሄ ዎዴ አራማ ካዎ ዘሪዛ ሹሜቲ፣ «ኢስታ ጸሳቲ ዙማ ጸሳታ፤ ኢስቲ ኑስ ዎልቃሚዳይካ ሄሳሳ። ኑኒ ኢስታራ ዴምባን ኦላ ጋይቲዛኮ ሲዴይ ባይንዳ ኢስታ ጸናና።

24 ሃኢ ጊዲኮ ኢሲ ሚሽ ኦላ፤ ካዎታ ኡባ ኢስታ ካዎቴላፌ ዴንሳዳ ኢስታሶሆን ሃራ ዎላ።

25 ኑኒ ኢስራኤሌታራ ዴምባን ኦሌታናሲኔ ጸናናስ ዳንዳያና ማላ ኔስ ካሴ ወሪዳ ኦላንቻታ ሶሆን ኦላንቻታ፣ ፓራታ ሶሆን ፓራታ፣ ፓራ-ጋሬታ ሶሆን ፓራ-ጋሬታ ዛራ ጊጊሳ» ጊዳ። ሂስቲን ኢዚካ ኢስታ ዘሪዛ ኤኪዲ ሄሳሶ ኦሊዳስ።

26 ዪዛ ላይላ ኦፊንሳ ጋኪን ቤኒ-ሃዳዴይ አራማ ኦላንቻታ ሺሺዲ ኢስራኤሌታራ ኦሌታናስ ኣፌቄ ጌቴቲዛ ካታማ ቢዳስ።

27 ኢስራኤል ኦላንቻቲካ ሺንቄኔ ኦላ ሚሽ ኤኪዲ ኢስታራ ኦሌታናስ ናምኡ ቡቴ ጊዲዲ ኬዚዳ። አራማ ኦላንቻቲ ቢታ ጋዳ ማይኢ ኡቲን ኢስራኤል ኦላንቻቲ ጊዲኮ ናምኡ ጉላ ዴይሻ ወዴታ ማላ ኢስታፌ ሲንላ ባጋራ ዳንካኒ ኡቲዳ።

28 ጸሳ ናቤ ኢሶይ ኢስራኤል ካዎዛኮ ቢዲ፣ «ሳዳይ፣ «አራማ አሳቲ ሳዳይ ዙማታ ጸሳፌ ኣቲን ዴምባታ ጸስ ጊዳና፤ ጊዳ ጊሻስ ሃ ኬንቺዳ ኦላንቻታ ኡባ ታኒ ኔ ኩሼን ኣላ ኢማና። ሄ ዎዴ ታኒ ሳዳ ጊዲዳይሳ ኔኒኔ ኔ ኣሳይ ኤራና፣ ጌስ» ጊዳስ።

29 አራማቲኔ ኢስራኤል ኣሳይ ኢሶይ ኢሳኮ ሲሚ ዛማዲ ኡቲዲ ሳፑን ጋላስ ጋካናስ ጋምኢዳስ። ሳፑንላ ጋላሳን ኦላ ኦይኬቲዲ ሄ ጋላስ ኢስራኤል ኣሳይ አራማ ኣሳፔ 100,000 ኦላንቻታ ዎዳዳስ።

30 ኢስታፌ ኣቲዳይቲ ኣፌቄ ካታማ ባቃቲዳ፤ ሄን ካታማ ገምቤይ 27,000 ኣሳ ቦላ ኩንዲዲ ዎዳዳስ።

ቤኒ-ሃዳዴይካ ሄ ካታማ ባቃቲ ቢዲ ኢሲ ኢልፒኔ ኬላ ጊዳን ቆቴቲዳስ።

31 ኢዛ ሹሜቲ ኢዛ፣ «ኢስራኤል ካዎቲ ማሪዛይታ ጊዲዳይሳ ኑኒ ሲዩዳስ፤ ሃኢ ማቃ ማይኢዲ፣ ዎዶሮ ኑ ሁኤን ጸጺዲ ኣኔ ኢስራኤል ካዎኮ ቦስ። ኢዚ ኔ ሹምፖ ኣሻናኮ ኦኔ ኤሪዛይ» ጊዳ።

32 ሂሰቲን ኢስቲ ማቃ ማይኢዲ፥ ወደር ባንታ ሁኔን ጸጺዲ፥ ኢስራኤል ካዎኮ ቢዲ ኢዛ፥ «ኔ አሽካራ ቤኒ-ሃዳዴይ ኔና፥ ሃኢ ታና ዋጶፓርኪ» ጌዳ።

ሂሰቲን ካዎዚ፥ «ኢዚ ሃኖ ጋካናሰ ፓጸ ዲዜ? ኢዚ ታሰ አሻ» ጌዳሰ።

33 አሳይ ኢዚ ጌዳ ቃላ ኤሌሲ ሎኦ ቆፋን ኤኪዲ፥ «ኤ፥ ቤኒ-ሃዳዴይ ኔ አሻ» ጌዳ።

ካዎዚ ኢስታሰ፥ «ኣኔ ቢዲ ኢዛ ታኮ ኤኪ ዪቴ» ጌዳሰ። ቤኒ-ሃዳዴይ ኬዚ ዪን ኣካቤይ ኢዛ ፑዴ ባ ፓራ-ጋሪ ቦላ ኬዚ ኤታና ማላ ኦሊዴሰ።

34 ቤኒ-ሃዳዴይ ኣካቤ፥ «ታ ኣዋይ ኔ ኣዋፔ ኤኪዲ ካታማታ ታኒ ኔሰ ዛራና። ታ ኣዋይ ባሰ ሳማሪያን ጊያ ኤሲዳ ማላ ኔኒካ ዳማሰቆ ካታማን ኔሰ ጊያ ኤሳና ዳንዳያሳ» ጌዳሰ።

ኣካቤይካ ኢዛሰ፥ «ሃይሳን ኔ ጫቆ ቃላ ዋሊዛ ጊዲኮ ታኒ ኔና ዬዳና» ጌዳሰ። ሄሳ ጊሻሰ ኢዛራ ጫቆ ቃላ ጌሊን ዬዲዴሰ።

ኣካቤ ቦላ ዮቴቲዳ ቲንቢቲ

35 ናቤታ ናይታፔ ኢሶይ ጎዳ ቃላሰ ኣዛዜቲዲ ባ ላጌዛ፥ «ታና ሾጫ» ጌዳሰ፤ ጌዳ ኣቲን ላጌዚ ሾጫንታ ኢጲዴሰ።

36 ሄሳ ጊሻሰ ናቤዚ ኢዛ፥ «ኔኒ ጎዳሰ ኣዛዜቶንታ ኢጲዳ ጊሻሰ ኔኒ ታፔ ሻኬታ ቢዳ ማላ ጋሞይ ኔና ዋፋና» ጌዳሰ። ኣዴዚ ናቤዛፔ ሻኬቲ ቢዳ ማላ ጋሞይ ኢዛራ ጋይቲዲ ዋፋዴሰ።

37 ናቤዚ ሃራ ኣሰ ዴሚዲ፥ «ዲጫ ኣኔ ታና ሾጫ» ጌዳሰ። ሂሰቲን ኣዴዚ ኢዛ ሾጪ ማዲንሊዴሰ።

38 ሄሳፌ ጉዬ ናቤዚ ኦጌ ቦላ ቢ ኤቂዲ ካዎዛ ናጎ ደሚዴሰ፤ ኤራቶንታ ማላ ባ ሁኤ ቁራጩ ቢርሺዲ ባ ሲንሐ ካሚዴሰ።

39 ካዎይ ኦጋራ ካንሊ ቢሺን ናቤዚ ካዎዛ፥ «ታኒ ኔ አሽካራይ ዋልቃማ ኦላ ኦሌቴላን ዲሺን ኢሲ ኣሲ ታኮ ዪዲ፥ ሃ ዲኤቲዳ ኣዴዛ ናጋ። ኢዚ ኬሲ ኤኪ ቢዛ ጊዲኮ ኔ ኢዛሰ ጊጌዳ ዋጸማዴን ጌላሳ ዋይኮ 3,000 ሳቂሌ ቢራ ቃንጸሳ» ጌዳሰ።

40 ታሰ ኔ አሽካራዛሰ ኦሶይ ዳሪን ታኒ ያኔ ሃ ጊሺን ኣዴዚ ኬሲ ኤኪ ቢቺዴሰ» ጌዳሰ።

ሂሰቲን ኢስራኤል ካዎይ፥ «ኔኒ ኔርካ ፒርዳዳሳ፤ ሄ ፒርዳይካ ኔ ቦላ ፖሌታና» ጌዳሰ።

41 ናቤዚ ባ ሲንሐ ካሚዳ ቁራጩዛ ቃሪ ዬጌዴሰ፤ ኢስራኤል ካዎዚ ሄ ኣዴዚ ናቤታፔ ኢሳ ጊዲዳይሳ ሄራካ ኤሪዴሰ።

42 ናቤዚ ካዎዛስ፡ «ጎዳይ፡ ታኒ ኢዚ ሃይቃና ቤሴስ ጊዳ እዳዛ ኔኒ ዬዲዳ ገሻስ ኢዛ ወጺማዳን ኔ ጌላና፤ ኢዛ ዳሬይ ጌላና ወጺማዳዛን ኔ ዳሬይ ጌላና፡ ጌስ» ጊዳስ።

43 ሂስቲን ኢሰራኤል ካዎይ ዪሎቲሼኔ ሃንቁቲሼ ሳማሪያ ካታማን ዲዛ ባ ካዎቲፋ ኬል ሲሚዳስ።

21

ናቡቲይ ዋይኔ ቶኪዛሶሆ

1 ኢዘራኤል ዳሬ እስ ናቡቲስ ሳማሪያ ካዎ እካቤ ኬፋ ማታን ዋይኔ ቶኪዛሶሆይ ዳስ።

2 እካቤይ ናቡቲስ፡ «ታ ኬፋ ማታን ዲዛ ገሻስ ታኒ ታስ እታኪልቲሶሆ ሂስታና ኮይዛ ገሻስ ኔኒ ዋይኔ ቶኪዛሶሆዛ ታስ አማ። ኢዛ ገሻስ ኔስ ታኒ ሃራ ሎኦ ዋይኔ ጋዴ አማና፤ ዋይኮ ኔኒ ዶሲኮ ኢዛ ዋጋ ታኒ ኔስ ቃንጸና» ጊዳስ።

3 ሂስቲን ናቡቲይ እካቤስ፡ «ታኒ ታ አዋታፔ ላቲዳ ጸንጾ ኔስ አሚሲዛዛፔ ጎዳይ ታና አሾ» ጊዳስ።

4 ኢዘራኤል እስ ናቡቲይ፡ «ታኒ ታ አዋታፔ ላቲዳ ጸንጾ ኔስ አሚኬ» ጊዳ ገሻስ እካቤይ ዪሎቲሼኔ ላንጨሼ ባ ሶ ቢዳስ። ሂስቲዲ ባ ሂጸን ጎዳኮ ሲሚ ኢቺዲ ካል ዋንታ ኢጺዳስ።

5 ኢዛ ማቻ ኤልዛቤላ ኢዛኮ ጌላዳ፡ «ኔኒ ሃይሳ ኬሃ አዛስ ዪሎታዲ? አይስ ካል ዋንታ ኢጸዲ?» ጋ ኦይቻዲስ።

6 እካቤይ ኢዚስ፡ «ኢዘራኤል እስ ናቡቲ ታኒ፡ «ኔኒ ዋይኔ ቶኪዛሶሆዛ ታስ ባይዛ፤ ዋይኮ ኔ ዶሲኮ ኢዛ ገሻስ ታኒ ኔስ ሃራ ዋይኔ ቶኪዛሶሆ አማና፡ ጌን ኢዚ፡ ታኒ ታ ዋይኔ ቶኪዛሶሆዛ ኔስ አሚኬ» ጊዳስ። ሂስቲን ታኒ ሃሳ ገሻስ ዪሎታዲስ» ጊዳስ።

7 ኢዛ ማቻ ኤልዛቤላ ኢዛስ፡ «ኔኒ ኢሰራኤል ቦላ ካዎ ጊዳ ኡታዳ ሃይሳላ ሃናይ? ዳንዳዳ ካል ማ! ዋዚናፔካ ኡፋዬታ! ኢዘራኤል እስ ናቡቲይ ዋይኔ ቶኪዛሶሆዛ ታኒ ኔስ አማና» ጋዲስ።

8 ሃሳ ገሻስ ኤልዛቤላ እካቤ ሰንፋን ዳብዳቤ ጸፋዳ ኢዛ ማታማን ሾጫዳ ናቡቲይ ዲዛ ካታማን ዲዛ ጨማታሲኔ ሹሜታስ ዬዳዲስ።

9 ሄ ዳብዳቤዛ ጊዶን፡ «ኢሲ ጋላሳ ጸማ አዋጂቲ፤ ሂስቲዲ ናቡቲ እሳ ጊዶን ቦንቾ ሶሆን ኡቲሲቲ።

10 ሃሳፌ ጉዬ ዋርዶ ማርካ ናምእታ ኢዛ ሰንፋን ኡቲሲቲ፤ ኢስታስ፡ «ናቡቲይ ካዎኔ ጸስ ጫዪዳስ» ጊዲ ኢዛ ቦላ

ማርካቴቶ። ሂስቲኮ ኢጎቴ ኢዛ ካታማፔ ካሬ ኬሲዲ ሹቻን ጫዲ ዋዲቴ» ጋዳ ጸፋዲሰ።

11 ሄሳ ጊሻሰ ናቡቴይ ዲዛ ካታማን ዲዛ ጪማቴኔ ሹማቴ ኤልዛቤላ ኢስታሰ ጸፊዳ ዲብዳቤዛ ማላ ፖሊዳ።

12 ኢስቲካ ኢሲ ጋላሳ ጾማ አዋጂዲ ናቡቴ አሳ ጊዶን ቦንቾ ሶሆን ኡቲሲዳ።

13 ሄሳፌ ጉዬ ዋርዶ ማርካ ናምኣቲ ዪዲ ኢዛ ሲንሳን ኡቲዳ፤ ሂስቲዲ ዳራ ሲንሳን፤ «ናቡቴይ ካዎኔ ጸሰ ጫዪዳሰ» ጊ ዋርዶ ማርካ ማርካቲን ናቡቴ ካታማፔ ካሬ ኬሲዲ ሹቻን ጫዲ ዋዲቴ።

14 ሄሳፌ ጉዬ ጪማቴ ኤልዛቤሊኮ ከቲዲ፤ «ናቡቴይ ሹቻን ጫዳቲ ሃይቂዳሰ» ጊዳ።

15 ናቡቴይ ሹቻን ጫዳቲ ሃይቂዳሳ ኤልዛቤላ ሲዪዳ ማላ አካቤሰ፤ «ናቡቴይ ሃይቂዳ ጊሻሰ ካሴ ኢዚ፤ ሂስ ሚሻን ባይዚኬ» ጊ ኢጲዳ ዋይኔ ቶኪዛሶሆዛ ዳንዳ ባዳ ኔሰ ጸንጾ ሂስታ ኤካ» ጋዲሰ።

16 ኢዝራኤሌ አሰ ናቡቴይ ሃይቂዳዳሳ አካቤይ ሲዪዲ ናቡቴ ዋይኔ ቶኪዛሶሆዛ ባሰ ኤካናሰ ዳንዲዲ ዱጌ ቢዳሰ።

17 ሄሳፌ ጉዬ ቴሲቤ አሰ ኤላሳኮ ጎዳ ቃላይ ዪዳ፤

18 «ሳማሪያን ካዎቲዳ ኢሰራኤሌ ካዎ አካቤራ ጋይታናሰ ዱጌ ዋዳ። ኢዚ ሃኢ ናቡቴይ ዋይኔ ቶኪዛሶሆዛ ኤካናሰ ቢዲ ሄን ዳሰ።

19 ኔኒ ኢዛሰ፤ «ናቡቴ ዋዳዳ ኢዛ ጸንጾ ላታኔ?» ጌሰ። ቃሴካ ኢዛሰ፤ «ናቡቴ ሱላ ካናቲ ላጪዳሶን ኔ ሱላካ ካናቲ ላጪና» ጌሰ ጎዳይ ኔና» ጊዳሰ።

20 አካቤይካ ኤላሳሰ ዛሪዲ፤ «ሃኢ ታ ሞርኬዞ ታና ዳማይቻዲ?» ጊዳሰ።

ሂስቲን ኤላሲ፤ «ኤ፤ ታኒ ኔና ዳማይቻዲሰ፤ ጋሶይካ ኔኒ ጎዳ ሲንሳን ኢታ ሚሽ ኦላናሰ ኔናቴላ ናጋራሰ ባይዛዳሳ።

21 ጎዳይ ኔና፤ «ሲያ፤ ታኒ ኔ ቦላ ኢታ ሚሽ ኤሃና። ኔ ዜሬላ ሙሌራ ቆይሳና፤ ታኒ ኢሰራኤሌ ቢታን አካቤ ኬላ አሳፔ አይሌ ጊዲን ዋይኮ ጎቃ ጊዲን አዳፌ ኢሳካ አሾንታ ፒታ ቆይሳና።

22 ኔኒ ኢሰራኤሌ አሳ ናጋራ ኦሲሲዳ ጊሻሲኔ ታና ሃንቄሊዳ ጊሻሰ ታኒ ኔ ሶ አሳ ናባጼ ና ኢዮርባአማ ሶ አሳ ማላኔ አካያ ና ባሽ ሶ አሳ ማላ ኦላና» ጌሰ።

23 «ቃሴካ ጎዳይ ኤልዛቤሊ ገሻሰ፤ ለኢዝራኤል ካታማ ገምቤ ላንቄን ካናቲ ኤልዛቤሎ ማና» ገደሰ።

24 እካቤ ዛሬፔ ካታማ ገደን ሃይቂዳ ኦናካ ካናይ ማና፤ ቃሴ ጋጾሬን ሃይቂዳይታ ሳሎ ካፎቲ ማና» ገደሰ።

25 ኢዛ ማቻ ኤልዛቤሊ ዴንፌሊን ጎዳ ሲንላን ኢታ ሚሽ ኦላናሰ ባናቴላ ናጋራሰ ባይዚዳ እካቤ ማላ እሲ ሙሊካ ዴና።

26 ጎዳይ ኢሰራኤል እሳ ሲንላፌ ጎዲ ኬሲዳ አሞሬቲ ኦሊዳ ማላ ኢዚካ ኤቃ ጸሳታ ጎይኖን ኬሂ ሃራሲዛ ቱና ሚሻታ ኦሊዳሰ።

27 እካቤይ ሃ ዮኦዛ ሲዪዳ ማላ ባ ማይኦ ፖሺ ዩጊዲ ማቃ ማይኢ ጸሚዳሰ። ማቃ ማይኢዳ ማላ ኢቺዳሰ፤ ጨጨሽካ ዩዪዳሰ።

28 ሄሳፌ ጉዬ ጎዳ ቃላይ ቴሲቤ አሰ ኤላሳኮ ዪዲ፤

29 «እካቤይ ባናቴላ ታ ሲንላን ዋሰቲ ካወሺዳኮ ቤአይ? ኢዚ ታ ሲንላን ባናቴላ ካወሺዳ ገሻሰ ታኒ ሃ ሜቶዛ ኢዛ ዋዴን ኢዛ ቦላ ኤሂኬ። ገደ አቲን ታኒ ኢዛ ና ዋዴን ኢዛ ሶ እሳ ቦላ ሃ ሜቶዛ ኤሃና» ገደሰ።

22

ናቤ ሚኪያሲ እካቤሰ አሚዳ ሴራ

(2ታሪ 18:2-27)

1 አራሜይኔ ኢሰራኤሌይ ባ ጋርሳን ኦላ ኦሌቶንታ ሄዡ ላይሰ ሳሮን ዴኢዳ።

2 ሄዡንሶ ላይሳን ዩሁዳ ካዋ ኢዮሳፊዴይ ኢሰራኤሌ ካዋ ቤአናሰ ቢዳሰ።

3 ኢሰራኤሌ ካዋይ ባ ሹሜታሰ፤ «ጋላኦን ዲዛ ኤራሞቴ ካታማይ ኩሰ ገዲዳይሳኔ ኑኒ ሃኖ ጋካናሰ ሄ ካታማ አራሜ ካዋፔ ዋሊ ኤካናሰ ኑ እይኮካ ኦቶንታይሳ እንቲ ኤሬኬቲ?» ገደሰ።

4 ቃሴካ ኢዚ ኢዮሳፊዴ፤ «ጋላኦን ዲዛ ኤራሞቴ ካታማ ኦላናሰ ታናራ ባኔ?» ገደሰ፤ ያይቺዳሰ።

ሂሰቲን ኢዮሳፊዴይ ኢሰራኤሌ ካዋሰ፤ «ኤ! ታኒ ኔ ማላ፤ ታ ዴሬይ ኔ ዴሬ ማላ፤ ታ ፓራቲካ ኔ ፓራታ ማላ» ገደሰ።

5 ቃሴካ ኢዮሳፊዴይ ኢሰራኤሌ ካዋሰ፤ «ገዲኮካ ኔኒ ካሴታዳ ጎዳ ኦይቻ» ገደሰ።

6 ኢሰራኤሌ ካዋይ ቲንቢቲ ዮቲዛ ኦይዱ ጾቱ ናቤታ ሺሺዲ፤ «ጋላኦን ዲዛ ኤራሞቴ ካታማ ኦላናሰ ቦዬ ቦፖ?» ገዲ ኢሰታ ኦይቺዳሰ።

ኢስቲካ፡ «ባ! አይስ ጊኮ ሄ ካታማ ካዎዛ ጎዳይ ኔ ኩሼን አሏ ኢማና» ጊዳ።

7 ኢዮሳፌጾይ ዛሪዲ፡ «ኮኒ ጎዳ ኦይቻና ማላ ሃራ ናቤይ ባዌ?» ጊዳስ።

8 ኢስራኤል ካዎ ኢዮሳፌጾስ ዛሪዲ፡ «ኮኒ ኢዛ ባጋራ ጎዳ ኦይቻናስ ዳንዳይዛ ኢሲ ሃራ ኣሲ ዳስ፤ ኢዚ ዩሚላ ና ሚኪያሳ። ጊዶ ኣቲን ታኒ ኢዛ ኢጻዲስ፤ ኣይስ ጊኮ ኢዚ ኡባ ዎዳካ ታ ጊሻስ ኢታ ሚሽ ዮቲሰፌ ኣቲን ሎኦ ሚሽ ዮቲ ኤሬና» ጊዳስ።

ኢዮሳፌጾይ ኢስራኤል ካዎስ፡ «ካዎይ ሄሳላ ጎፖ!» ጊዳስ።

9 ሄሳፌ ጉዬ ኢስራኤል ካዎይ ባ ሹሚታፔ ኢሳ ጳይጊዲ፡ «ዩሚላ ና ሚኪያሳ ኤሶን ኤካ ያ» ጊዳስ።

10 ኢስራኤል ካዎይኔ ዩሁዳ ካዎ ኢዮሳፌጾይ ባንታ ካዎቴላ ማይኦ ማይኢዲ፡ ሳማሪያ ካታማ ጌሊዛ ፔንጌ ማታን ዲዛ ካላ ባሌን ባንታ ካዎቴላ ኣራታን ኡቲዳ፤ ናቤቲ ኡባይ ኢስታ ሲንላን ቲንቢቲ ዮቲዳ።

11 ኢስታፌ ኢሶይ ኪንኣኔ ና ሳዶቂይ ቢራታፔ ካጩታ ገግሲዲ ኣካቤስ፡ «ጎዳይ፡ ሳራሜ ኣሳይ ጳያና ጋካናስ ኔኒ ኢስታ ሃ ካጩታን ቃይጫና ጌስ» ጊዳስ።

12 ሃንኮ ናቤቲ ኡባይካ፡ «ጋላኣዴን ዲዛ ኤራሞቲ ካታማ ባዳ ኦላ፤ ኦላዳካ ጸና። ኣይስ ጊኮ ጎዳይ ሄ ካታማ ካዎዛ ኩሼን አሏ ኢማና» ጊዲ ኢሲ ቃላን ሃሳይዳ።

13 ሄሳፌ ጉዬ ሚኪያሳ ጳይጋናስ ኪቲቲ ቢዳ ኣዴዚ ኢዛ፡ «ቤኣ፡ ቲንቢቲ ዮቲዛ ኡባቲ ኢሲ ዶና ጊዲዲ፡ ኣካዎይ ሃ ኦላ ጸናና» ጊዲ ዮቲዳ። ኔኒካ ኢስታይሳላ ዮታ» ጊዳስ።

14 ጊዶ ኣቲን ሚኪያሲ ሄ ኣዴዛስ፡ «ዴኦ ጎዳይ ቤኣን ጎዳይ ታስ ዮቶሮ ጸላ ታ ኢዛስ ዮታና» ጊዳስ።

15 ሚኪያሲ ካዎዛኮ ጋኪዳ ማላ ካዎዚ ኢዛ፡ «ሚኪያሳ! ኮኒ ጋላኣዴን ዲዛ ኤራሞቲ ካታማ ኦላናስ ቦኒዬ ቦፒና?» ጊዲ ኦይቺዳስ።

ሚኪያሲ ካዎዛስ፡ «ኤ ባዳ ኦላ፤ ኦላዳካ ጸና። ጎዳይ ሄ ካታማ ካዎዛ ኔ ኩሼን አሏ ኢማና» ጊዳስ።

16 ካዎዚ ጊዲኮ ኢዛስ፡ «ኔኒ ጎዳ ሱንላን ቱማፔ ኣቲን ሃራ ሚሽ ታስ ዮቶንታ ማላ ታኒ ኔና ኣፑንቶ ጫቁላናስ ኮሺዜ?» ጊዳስ።

17 ሚኪያሲ፡ «ኢስራኤል ኦላንቻቲ ኡባይ ሄንላንቻይ ባይንዳ ዶርሳታ ማላ ላሌቲ ዲሺን ቤኣዲስ። ጎዳይ ኢስታስ፡ ሃይሳ

ዴራስ ጎዳይ ባዋ። ኢስቲ ኡባይካ ባንታ ሶ ባንታ ሶ ሳርን ቤቶን
ጌስ» ጌዴስ።

18 ኢስራኤል ካዋ ኢዮሳፊዴይ፥ «ኢዚ ታ ጊሻስ ኢታፔ አቲን
ሎኦ ሚሽ ዮቲ ኤሪና፣ ጋዳ ካሴ ኔስ ዮታቤኪና?» ጌዴስ።

19 ሚኪያሲ ዛሪዲ፥ «ሂስቲኮ ጎዳይ ጊዛይሳ ሲያ! ጎዳይ
ባ ካዎቲላ አራታን ኡቲን ሳሎ ኦላንቻቲ ኡባይ ኢዛ ኡሻቻራኔ
ሃዲርሳሪ ኤቂዳይታ ታኒ ቤኣዲስ።

20 ጎዳይ፥ «ኣካቤይ ጋላኣዴን ዲዛ ኤራሞቲ ካታማ ቢዲ ሄን
ሃይቃና ማላ ኢዛ ባሌላናይ ኦኔ?» ጌዴስ። ኢሶይ ሃይሳ ኢሶይ
ሄሳ ጊዛ ዲማ ዲማ ቃላ ሃሳይዳ።

21 ዉርሴላን ኢሲ ኣያናይ ኬዚ ጎዳ ሲንላን ኤቂዲ፥ «ታኒ ኢዛ
ባሌላና» ጌዴስ።

22 «ጎዳይ ኣያናዛ፥ «ኔ ኢዛ ዎስታ ባሌላኔ?» ጌዴስ።

«ኣያናዚካ፥ «ታኒ ኬዛ ባዳ ኢዛ ናቤቲ ኡባቲ ዎርዶ ሃሳያና
ማላ ኦላና» ጌዴስ።

«ሂስቲን ጎዳይ፥ «ኤር ሃኢ ኬዛዳ ባ! ባዳ ባሌላ፤ ኢዚ ኔስ
ሃናና» » ጌዴስ።

23 ሄሳ ጊሻስ ሚኪያሲ፥ «ጎዳይ ሃይታ ኔ ናቤታ ኡባታ ዶናን
ዎርዶ ኣያና ዎሊዴስ፤ ኣይስ ጊኮ ጎዳይ ኔ ቦላ ባሽ ኤሃናስ
ዮቲዴስ» ጌዴስ።

24 ሄሳፊ ጉዬ ኪንኣኔ ና ሴዴቂያሲ ሺቂዲ ሚኪያሳ ሻጋላን
ባቃ ሻዬዲ፥ «ጎዳ ኣያናይ ታፔ ኣዋ ባጋራ ኣፄ ቢዲ ኔስ ዮቲዴ?»
ጌዲ ኦይቺዴስ።

25 ሚኪያሲካ ዛሪዲ፥ «ሄሳ ኔኒ ቆልኣን ቆቲታና ጌሊዛ ጋላስ
ኤራና» ጌዴስ።

26 ሄሳፊ ጉዬ ኢስራኤል ካዎይ ባ ኦላንቻታፔ ኢሳ ኣዛዚሹ፥
«ሚኪያሳ ኦይኪዲ ካታማ ሃሪዛ ኣሞኔሲኔ ካዎዛ ና ኢዮኣሳስ
ጉዬ ዛሪቲ።

27 ሂስቲዲ ካዎዚ፥ «ታ ሎኦን ሲማናሼ ጋካናስ ሃይሳ ኣዴዛስ
ሜላ ኡኬሊኔ ሃላ አቲን ሃራ ኢሞንታ ማላ» ጌስ» ጌዴስ።

28 ሚኪያሲ ኢዛስ፥ «ኔኒ ሳርን ሲሚዛ ጊዲኮ ጎዳይ ታ ዶናራ
ሃሳይቤና» ጌዴስ። ቃሴካ ሚኪያሲ፥ «ሃይሳን ዲዛ ኣሳይ ሃይሳ
ታ ጊዛ ቃላ ዎዚናን ዎሊቲ» ጌዴስ።

ኣካቤ ሃይቆ

(2ታሪ 18:28-34)

29 ሄሳፌ ጉዬ ኢስራኤል ካዎ አካቤይን ዩሁዳ ካዎ ኢዮሳፊዬይ ጋላኣዴን ዲዛ ኤራሞቲ ካታማ ቢዳ።

30 ኢስራኤል ካዎይ ኢዮሳፊዬይ፡ «ታኒ ማይኦ ላማዳ ሃራ አስ ሚሳታዳ ኦላን ጌላና፤ ኔ ጌዲኮ ኔ ካዎቴላ ማይኦ ማይኦ» ጌዴሰ። ሄሳ ጊሻስ ኢስራኤል ካዎይ ባ ማይኦ ላማ ሃራ አስ ሚሳቲዲ ቆቲቲ ኦላዛ ጌዶ ጌሊዴሰ።

31 አራሜ ካዎይ ባ ፓራ-ጋሬታ አዛዚዛ 32 ሹሜታ፡ «ኢስራኤል ካዎዛራፔ አቲን ጉሐ ጌዲን ጌታ ጌዲን ሃራ ኦናራካ ኦሌቶፍቲ» ጌ አዛዚዴሰ።

32 ፓራ-ጋሬታ አዛዚዛይቲ ኢዮሳፊዬይ ቤኢዳ ማላ፡ «አዳፌ ሃይሲ ኢስራኤል ካዎዛኮ!» ጌዳ። ሂስቲዲ ኦላ ኦይካናስ ኢዛ ጌዶሊዳ፤ ኢዮሳፊዬይ ዋሲዴሰ።

33 አዚ ዋሲን ፓራ-ጋሬታ አዛዚዛይቲ ኢዚ ኢስራኤል ካዎዛ ጌዶንታይሳ ኤሪዲ ኢዛ ጎዲዛይሳ አጌዳ።

34 ኢሳዴይ ጮ ባ ዎንዳፌ ኦላንቻታ ቦላ ዬዲን ኢስራኤል ካዎዛስ ኦላ ማይኦይ ጋይቲዛሶራ ዱኪዴሰ፤ ሄሳ ጊሻስ ኢስራኤል ካዎይ ባ ጋሬዛ ሳጊዛይሳስ፡ «ጋሬዛ ጉዬ ዛራዳ ታና ኦላ ጌዶፌ ኬሳ፤ አይሰ ጊኮ ታኒ ኢታ ጫኝ ጫዶታዲሰ» ጌዴሰ።

35 ሄ ጋላስ ኦላይ ሱሊሼ ፔኢን ኢስራኤል ካዎ አካቤይ ባ ፓራ-ጋሬ ጌዶን ዜምፒዲ አራሜ አሳ ሲንሳን ታኪዴሰ። ኢዛ ሱላይ ፓራ-ጋሬዛ ቦላ ጉኪሺን ሄ ጋላሳ ኦማርስ ካዎዚ ሃይቂዴሰ።

36 አርሼይ ወላናስ ማቲሺን ኦላ አሳ ጌዶን፡ «አሳይ ኡባይ ባ ካታማ ካታማ ቦ! አሳይ ኡባይ ባ ዴሬ ዴሬ ሲሞ!» ጌዛ ዋሶይ ሲዬቲዴሰ።

37 ሄሳፌ ጉዬ ኢስቲ ካዎዛ ሳማሪያ ካታማ ኤፊዲ ሞጌዳ።

38 ላይማቲዛይቲ ሜጩቲዛ ኤሌ ሃላን ፓራ-ጋሬዛ ሜጪዳ። ጎዳይ ካሴ ዮቲዳ ቃላ ማላካ ኢዛ ሱላ ካናቲ ሳጪዳ።

39 አካቤይ ሃኒዳ ሃራ ሃኖቲ፡ ኢዚ ኦሊዳይሲ ኡባይ፡ ዳንጋርሳ ዛሌን ካዎ ኬላ ኢዚ ኬጺዳይሲኔ ኢዚ ገምቢዳ ካታማታ ሃኖቲ ኡባይ ኢስራኤል ካዎታ ታሪኬ ማጻፋን ጻፊቲ ኡቲዳ።

40 አካቤይ ሃይቂዲ ባ አዋታን ጋይቲዴሰ፤ ኢዛ ና አካዚያሲ ኢዛሶሆን ካዎቲዴሰ።

የሁዳ ካዎ ኢዮሳፊዬይ

(2ታሪ 20:31—21:1)

41 ኢስራኤል ካዎ አካቤይ ካዎቲዳ ኦይዳንሉ ላይላን አሳ ና ኢዮሳፊዬይ ዩሁዳን ካዎቲዴሰ።

42 ኢዚ ካዎቲዛ ዎዴ ኢዛሰ ላይላይ 35፤ ኢዚ ዩሩሳላሜን 25 ላይላ ካዎቲዴስ፤ ኢዛ ኣዩያ ሺሊሄ ና ኣዙቦ ጌቲታዉስ።

43 ኢዮሳፊዴይ ባ ኣዋ ኣሳ ኦጌ ኡባ ካሊዴስ፤ ኢዚ ሄ ኦጌፔ ሸርኢ ጊቤና፤ ጎዳ ሲንላን ሱሬ ሚሽ ኦሊዴስ። ጊዲኮካ ጶቃሶሆን ዲዛ ኤቃሰ ጎይኒዛሶሆታ ጳይሲቤና፤ ኣሳይ ሄ ሶሆታን ያርሾ ሺሾኔ ኤጸኔ ጩዋሴላ ኣጊቤና።

44 ኢዮሳፊዴይ ኢሰራኤሌ ካዎራ ሲጋን ዴኢዴስ።

45 ኢዮሳፊዴይ ሃኒዳ ሃራ ሃኖቲ፤ ኢዛ ሚኖቴላይኔ ኢዚ ኦሌቲዳ ኦላይ ዩሁዳ ካዎታ ታሪኬ ማጻፋን ጸፊቲ ኡቲዴስ።

46 ኤቃ ጸሳታ ኬላን ፓራ ላይማ ላይማቲዛይታ ካሴ ኢዛ ኣዋ ኣሲ ጳይሲሺን ኣቲዳይታ ቤታፌ ጳይሲዴስ።

47 ሄ ዎዴ ኤዶሜ ቤታን ካዎይ ባዋ፤ ሄ ቤታይ ዩሁዳ ካዎይ ዎሊዳዴን ሃሪቴስ።

48 ኦፊሬ ቤታ ቢዲ ዎርቃ ኤሃና ማላ ኢዮሳፊዴይ ጌታ ማርካቤታ ሜጲዴስ፤ ጌዶ ኣቲን ሄ ማርካቤቲ ኤጲዮን-ጋቢሬን ሜቂ ኣቲዳ ጊሻሰ ሙሊካ ሄ ባና ዳንዳይቤቲና።

49 ሄ ዎዴ ኣካቤ ና ኣካዚያሲ ኢዮሳፊዴስ፤ «ታ ኣሳይ ኔ ኣሳራ ኢሲፌ ማርካቤን ቢኮቺ?» ጌ ኦይቺን ኢዮሳፊዴይ ኢጲዴስ።

50 ኢዮሳፊዴይ ሃይቂዲ ባ ኣዎታን ጋይቲዴስ። ኢሰቲ ሞጌቲዳ ባ ኣዋ ዳዊቲ ካታማን ሞጌቲዴስ። ኢዛ ና ኢዮራሜይ ኢዛሶሆን ካዎቲዴስ።

ኢሰራኤሌ ካዎ ኣካዚያሳ

51 ዩሁዳ ካዎ ኢዮሳፊዴይ ካዎቲዳ ታማኔ ላፑንላ ላይላን ኣካቤ ና ኣካዚያሲ ኢሰራኤሌ ቦላ ሳማሪያን ካዎቲዴስ፤ ኢሰራኤሌ 2 ላይላ ሃሪዴስ።

52 ኣካዚያሲ ጎዳ ሲንላን ኢታ ሚሽ ኦሊዴስ፤ ኢዚካ ባ ኣዋ፤ ባ ኣዮኔ ኢሰራኤሌ ኣሳ ናጋራ ኦሲሲዳ ናባጼ ና ኢዮርባኣሜ ኦጌ ካሊዴስ።

53 ኣካዚያሲ ካሴ ኢዛ ኣዎይ ኦሊዳይሳላ ኢዚካ ባኣሌሰ ኦሊዴስኔ ጎይኒዴስ፤ ኢዚ ሄሳንካ ጎዳይ፤ ኢሰራኤሌ ጸሳይ ሃንቂታና ማላ ኦሊዴስ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b